

26082

КОНСТАНТИН ТУРКИН



# ЗВЕРЬЯС БÖРСЯ

КОМИ ГИЗ - 1952



65  
95 - 04

КОНСТАНТИН ТУРКИН

788

# ЗВЕРЬЯС БÖРСЯ

26682



1954

Сыктывкарско-  
библиотечный отдел  
Пом. библиотеки имени  
МАРШАКА

ПОВЕСТЬ

Городская Детская  
БИБЛИОТЕКА №  
Сыктывкар, П.О.Комп.

КОМИ ГОСУДАРСТВЕННОЙ ИЗДАТЕЛЬСТВО  
СЫКТЫВКАР 1952

КОНСТАНТИН ТУРКИН

ПО СЛЕДАМ ЗВЕРЕЙ

ПОВЕСТЬ  
на коми языке

ДЛЯ ДЕТЕЙ СРЕДНЕГО И СТАРШЕГО ВОЗРАСТА

*Оформление книги  
художника М. П. БЕЗНОСОВА*

Редактор *Д. Конюхов.*

Техн редактор *И. Оплесник.*

Ц03408. Тираж 2000 экз. Заказ № 2071. Бумага  $70 \times 92\frac{1}{16}$  = 2,75 бум. лист. — 6,4 печ. листов. Уч.-изд. листов 6,1. Подписано к печати 20-VIII-1952 г. Цена 2 р. 85 коп.

г. Сыктывкар, Республиканская типография Управления Полиграфиздата  
при Совете Министров Коми АССР.



## ВӖР КЕРКАЫН

ЧукльӖдлӗгтыр пьськӖдчӖ вӖр шӖрлань лыжи туй, кодӗ тырӖма лым-йӖн да муртса тӖдчыштӖ.

Борд вылын моз кокныда ӧта-мӖд бӖрсяис исковтӖны лыжи туй кузя кык детинка: ЛӖва Чарин да Петя Козлов. НайӖ пеля шапкааӖсь, фуфайкааӖсь, нопьяӖсь, кыкнанныслӖн пельпом вомӖныс ӧшӖдӖма двухстволка. Чизыр тӖлыс банийӖдӖма нальсь чужӖмьяссӖ. Шапка увсьыс петыштӖм юрсиясныс гыртӖмаӖсь.

Еджыд паськӖма пармаис дзирдалыштӖ лӗччысь шондӗ водзас да скӖрысь чушнитлывлӖ, биттьӖкӖ пыдӗсянь ышловзылас пуяс костӖдыс тӖлӖс лӗдзигӖн.

— Петя, ӗн на мудз?— сувтӗс да бӖрланьыс бергӖдчис ЛӖва, ачыс тшӖкыда лолалӖ, быд лолыштигӖн нырсьыс и вомсьыс пуркнитлӖ еджыд ру.

— Эг на, а тэ?— пелька да тэрыба исковтис ёргыс дорөдз да орччөн сувтис Петя.

Став вöрас сертиыс позьö вöли казаявны, мый тайö физкультурник: тэрыб да пельк. Тушаыс сылөн другыс серти кузьджык. Но паськыд пельпомьяса, латшкөсник тушаа Лёва дорысь сийö кажитчис жеблжыкөн, вийёрджыкөн.

— Менам кок кусыньяс доймöны нин-а,— быттö норасыштис Лёва да сёрнисö бергөдис мөдарö.— Аттö, кутшöма мичмөдöма тэнö дед-Морозыд!

Петялөн и сідзи нин сьöd сэтөр кодь синъясыс гыөртөм еджыд синкымъяс улас кажитчисны öни ещö нин сьөдөн.

— Тэ öд дзикөдз жö дзормөмыд,— кепыся кинас асьыс чужөмсö чышкыштис Петя.— Вай мунам, дедыд, көнкө, виччысьö нин.

— Сийö и төрыт, ме чайта, виччысис, төдö öд, мый миян каникульяс заводитчисны.

— Да öд и гажтөм өткөннад,— мунны лөсьөдчигмоз шуис Петя.

— Сийö велалöма нин, нэм чөжыс вöрын... Но, дерт, гажыс быри миянысь,— лымйö сатшкөм лыжи бедьяссö кыкнан киас босьтис Лёва. Посныдик берин чутось, гөгрөс чужөм вылас сылөн вуджөртчис төждысьöм, еджгов синкымъясыс чукуртчылісны. Тыдалö, мыйкө вөрзьөдис сылысь сьөлөмсö.

Мыйөн эштис колхозын нянь идралөм да вартан уджъяс, мыйөн кынмыштис вөр-ва, Пиля дед кайис вөрö кыйсыны. И арсяныс эз на лэчыв гортас, няньсö катөдліс сылы Лёва аслас другыскөд, Петякөд. Выходной лунъяслы паныд кайлывлісны вөрö, узылісны вөр керкаын, петавлісны кыйсыны. Найö жö лэччөдлывлісны гортаныс дедыслысь кыйдөссö да сдайтлісны сийөс.

Коймөд во нин кысьö Отечественной война. Тайö каднас сёясөн ур куяс, дасьясөн сьөдбөж куяс да тулан куяс, руч куяс муңлісны оборона фондö. Кор детинкаяс мөдөдчывлісны лэччыны гортаныс, дед пыр бөр-йивліс кызкө медбурсö, меддонасö да шулывліс:

— Тайөс сетанныд оборона фондö,— сэсся индывліс мөд чукөр вылө:— Тайөс нянь вылө да прөдукта вылө сдайтанныд, а тайөс — учительшалы,— медбөрын вайліс сийö да сетліс детинкаяслы өтлаө көрталөм сьöd пель йывъяса, пытшлань гөнөн кульöм көч куяс.

«Учительшакөд» дедлөн вөлі аслысыяма йитөд. Школаын котыртөма, позьö шуны, дзонь мастерскöй. Шырөм кöч гöнысь вурун сорөн кыöны кэни шоньд кепысьяс, чулкияс, дөрөмъяс да мөдөдалöны фронт вылө. Дед кыйö, детинкаяс лэччөдлöны да небыд гöна кöч куяссö сдایتöны асланыс учительницалы, Лидия Ивановналы, школаса директорлы, а нывкаяс кыöны. И шоньд көлуй тыра посылкаяс мунöны фронт вылө.

Лёвалөн и аслас гажыс бырөма дедсыс. Сьөлөм вөрзёдмөн мусаөн, донаөн кажитчис сылы дзор дедыс. Көнхөр өтнас вöрын! Кутшөма, көнкө, виччысьö найöс! И дедыскөд орчөн сы син водзö сувтис мөд муса чужөм, сэтшөм жö ус-тошка, сöмын абу дзор, а пемыдгөрд. «Сийö абу нин ловъя»,— ёнтыштіс детинкалөн сьөлөмыс, и сөдз лөз синъясыс вазыштісны, но сэки жö син лапъясыс топыда куньсьылісны, бытьёкө чышкыштісны югнитысь васö. Кык во сайын нин Лёвалысь батысьö, зэв бур снайперöс, виисны фашистьяс. Гортас колины квайт чоя-вока да мам. Лёва медыджыд, и найö дедыскөд вердöны семьясьö. Мужичöйыд этша вөлі колхозын, и Пиля дед тулыснас гөрис-көдзис, гожөмнас зорөдьяс чөвтис, водз арнас нянь тэчасьяс тэчис, а сэсся вöрын кыйсис арбыд и төвбыд. Дедыс висьөдчигьясьö моньыс, Лёвалөн мамыс, шулывліс:

— Он нин вермы да кытчö мунан? Позьö өд и шойчыштыны.

— Öні абу шойччан кад!— торкліс сийöс дед.— Война помасяс да сэки шойччыштам.— И ружтігтыр мунлывліс удж вылө.

Лёва пыр вөлі дедыс дінын—гөриг-көдзигөн агсасис, турун пуктігөн юр кыскаліс, нянь идралігөн сю ваяліс.

«Эз жö өд нинөм ло!»— сьөлөм доймымөн думыштіс Лёва да ышловзис, сэсся топыдджыка чабыртіс лыжи бедьяссö да, мыйвынсьыс йөткаситгыр, мөдіс котөртны, весиг эз кут кывны кок кусыньяс доймөмсö.

Эз кольчы и Петя. Мунігмозыс сийö кызкө зэв пелька кучкаліс лыжи бедьнас туй потшысь лыс лапьясьö, ачыс шуаліс вомгорулас:

Коми му кузя ме муна,  
Гөгөр сулалө сьөд вөр.  
Вөрыс вывті, вывті уна,  
Сысь унаыс оз төр...

Кельыд кыа водзас руд нисө лөз вөрыс збыльысь кажитчис помтөмөн, өтторьяөн, көть мыйта эн мун, некор он во помас. Унаысь нин

адзыліс Петя тайё вёрсё. Но вөрё кайнгөн сійё пыр любуйтчис сись кодь веськыд, пашкыр юра пожомьясён да нэм чөжыс веж кузь козьясён. Но и тани сійё эз вермы вунёдлыны ассыс став шоглунсё. Петялөн батыс важён нин фронт вывсынь нинём оз гиж. Медбөрья письмоас вёлі гижёма, мый сійё воюйтё кёнкё Днепр сайын, кёні муноны чорыд бойяс. Но тайё письмоыс воліс гожомнас на, сэксянь некутшом юөр эз волы. Гашкё, абу и ловья нин да! Эз вунлы детинкалөн и сійё, мый шогён тырём мамыс мөдөд төлысь нин куйлө вольпась вылын, висё, а гортсё олө өтнас дас кык арёса чойыс. И тайё ставыс вёсна Петялы вёлі зэв окота аслыс участвуйтны врагкөд тышын, война вылын да, ковмас кё, Александр Матросов моз тупкыны морёснас врагысь пулемётсё—дугөдны лыйсёмсё. И детинка дась вёлі коть талун мунны фронт вылө да, кызди шульвліс сійё, «котшкөдны фашистьясёс». Но фронт вылө мунөмысь медводз өлөдіс сійёс Лёва, сэсса дедыс. А кор пионерскөй сбор вылын вожатөй шуис: «Ми коть ылынөсь фронтсянь, но вермам тшөтш воюйтны: фронтлы отсалөм, тыл ёнмөдөм—тайё воюйтөм жө», сэк Петя энөвтис гортсыс пышйөм йылысь думсё да пунктис ас водзас өти мөг: кызди-мый вермас отсавны фронтлы. И өні, шуштөма вашкөдчысь да шувгысь парма шөрті мунігөн, детинка юрысь эз петав тайё думыс. Пөжалуй, сійё эськө өтрасён эз повззы мунны ош вылө.

«Пиля дед тай уна ошкөс өтнас вилөма»,— юрае воис сылыг мөвп, и ае төдлытөгыс друг думыштис вөр керка йылысь, сэні олысь мелі дед йылысь.

Пиля дед Петялы вёлі бокөвөй, сөмын орчча керкаса сосед. Но Петя сійёс радейтис рөднөй дедөс моз и шуис дедушкаөн. Кызди нө он радейт сійёс? Од кутшөм сійё мелі да бур, кутшөма төждысьё Петя вёсна! Пыр бур вылө велөдө и мыйлакө некор өз скөрмыв. Петя чувствуйтис асьсё сылөн внүкөн и мыйвынсыс зіліс ставсё вөчны сы тшөктөм серти. И батыяныс Лёвалөн да Петялөн овлөмаөсь зэв өтсөгласён — пыр өтлаын вөрөвлөмаөсь. И найөс, колөкө, Пиля дед жө велөдіс кыйсынысё. Дед йылысь думайтгөн детинкалөн морёсас визлаліс висьтавны позьтөм пөсь чувство.

Төвся небесаыс вылөн на йизьөм ты кодь — дон, сэзь, дзирдалөны биа өгыр моз кодзувьяс, вашкөдчө парма.

Ылісянь на кыліс вөр керкалөн төдса дукуыс. Тайё дук сертиыс

вѳралысь корсьлывлѳ некор аддзывлитѳм вѳр керка, а аслас керкаыс сюрѳ сылы сап пемыд войѳ.

Первой кѳнкѳ пыдын, быттьѳкѳ гуын, кыліс Катшѳлѳн увтыштѳм, сѳсся дзуркнитіс ѳдзѳс, и пон чѳпѳсйіс локтысьяслы паныд. Сйѳ кыкысь кымын чѳччыштліс Лѳвалы морѳсас, нюлыштіс сылысь банбоксѳ, сѳсся уськѳдчыліс Петя дінѳ, бара Лѳва дінѳ да, радпырысь никсігыр, котѳртіс гортланыс.

Дедлѳн вѳралан керкаыс еджыд шапкаа гѳб кодъ куткыртчѳма ягдорса пуяс костѳ, сипѳвнас — ичѳтик ѳтка ѳшинынас — видзѳдѳ рѳмыд вѳрѳ. Ачыс дед, дерт нин, виччысьѳ детинкаясѳ: керкаас ымралѳ шоныд, трачкакылігырйи ѳзйѳ сартаса би — югдѳдѳ керка пытшкѳссѳ. Тшынассѳмысла сьѳд рѳмѳн дзирдалѳны стенъяс, ѳгар-мѳдар дорас наръяс, на костын — ѳдзѳсланъ паныда — ичѳтик гор. Нырад сатшѳ сирѳд тшын дук.

— А-а! Воинныд! Но-но, пѳрчысьѳй, шонтысьѳй, — воысьяс дінын бергаліс старик, быдлунъя саѳн сьѳдасыштѳм чужѳм вылас сьлѳн сьякыис радлун.

Нимкодя нюмъялігыр Лѳва видзѳдіс дедыс вылѳ да чѳв оліс.

— Тѳрыт нин эськѳ ми кѳсйылім, дедушка, локны, но миян ппѳнерскѳй сбор вѳлі, сѳтчѳ кольччылім, сѳсся вечер вѳлі, дай талун на луншѳр бѳрѳдз нюжмасим, сйѳн и сѳрмим, — пѳрчысигмозыс правдайтчис Петя.

— Дерт, быдѳнлѳн аслас удж да робота.

Пѳрчысьѳм мысти да чѳскыд кѳра пѳтка яя шыд сѳйѳм бѳрын детинкаяс заводитісны видлавны дедыслысь недельчѳжся кыйдѳссѳ.

Гыркѳн<sup>1</sup> кульѳм да косьтѳм ур куяс кѳртавлѳма десяткаясѳн. Налѳн кузь гѳна плавкѳс бѳжъясныс, туша кузътаныс жѳ, ѳшалѳны мича тугйѳн. Зѳвтѳмѳн косьтѳм, кык пѳвстѳн кусыньтѳм векныдык бумага лист кодъ, сьѳдбѳж куяс быттьѳ чачаяс. Ичѳтик бѳжныс налѳн лым еджыд, а дзык бѳж йылыс смоль сьѳд. Абу прѳстѳ шуѳмаѳсь сьѳдбѳжѳн. Сѳні жѳ канъ куысь неуна ыджыдджык тулан ку, гѳрдов руд да небыд гѳна. И медбѳрын, шошаѳдыс кутѳмѳн пыркѳдігыр дед петкѳдлѳ кыз бѳжа зарни рѳма гѳрдов руч ку. Пушнинаысь кындзи, дерт, дедлѳн ывлаын эмѳсь на кынтѳм таръяс, сьѳлаяс... Та йылысь и висьтавтѳгыс тѳдѳны кык друг.

— Дедушка, — волнуйтчана гѳлѳсѳн да пѳся друг ныясис Петя, —

<sup>1</sup> Гыркѳн — пытшланъ гѳнѳн, трубкаѳн кульѳм.

тѡдѡн ѡ тѡ, кутшѡм ыджыдтор тайѡ ставыс, ок, кутшѡм ыджыдтор! Ѳд быд ур ку, сьѡдбѡж ку, тулан ку, руч ку — тайѡ пуляяс, минаяс, бом-баяс... фашистьяслы юр выланыс. Кутшѡм ыджыд содтѡд вын мяян Краснѡй Армиялы!

— А кыдзи нѡ ог тѡд, — сьѡлѡмсяныыс шуис старик. — Тѡда. Сійѡн тай и зїлям унджык кыйны, медым регыдджык вермыны лѡк гундыртѡ. Россияса мукѡд бур йѡзыскѡд тшѡтш и ми тїянкѡд кыам петлясѡ эсїйѡ Дитьлерыды.

— Ме сѡсыс нин тѡныд, дедѡ, висьтавлї, мися, абу Дитьлер, а Гитлер,— шыасис Лѡва.

— А-а, кѡйнѡс кѡть мыйѡн эн нимты, век кѡинѡн и лѡѡ. Сылысыс и нимсѡ казтыштны грек, прѡсти господи, непѡштѡ помнитны,— кинас ѡвтыштїс Пиля дед, пуксис нар вылѡ да, мыйкѡ виччысигмоз, мѡдїс видзѡдны руч ку да тулан ку видлалысыс челядь вылѡ: — Тї нѡ мый, гортсянь локтїнныд и он висьталѡй, мый нин выльторйыс паськыд свет вылас. Радивоыд ѡд менам танї абу.

Лѡва тѡрмасьѡмѡн ѡшѡдїс руч кусѡ тувйѡ, судзѡдчыліс фуфайкаысла, пытшкѡс зепсыс кыкис газета да ученическойѡй тетрадь, кытчѡ гижалѡма вѡлї радио пыр передайтѡм важнѡйджык бѡрря юѡрряс, сѡсся пуксис нар вылѡ.

— Сѡветскойѡй информбюросянь,— шуйга кинас лѡптыштїс син вылас лѡчысыс ид илзас рѡма юрсисѡ да, сартаса билань тетрадьсѡ пѡлѡстыштѡмѡн, заводитїс сїйѡ лыддыны 1943 вося декабрь 31 лунся сводка:— «Декабрь 31 лунѡ Украинскойѡй фронтлѡн войска стремительнѡй атакаѡн босьтїсны Украинаса областнѡй центр да ыджыд железнодорожнѡй узел Житомир...»

Сводка да мукѡд юѡрряс йылысыс лыддыѡмсѡ кывзѡм бѡрын Пиля дед неумынысыс шуис:

— Житомир, Житомир...— быттьѡкѡ мыйкѡ казтыліс сїйѡ.

— Война заводитчѡм бѡрас регыд мысти немецьяс босьтїсны тайѡ карсѡ,— висьталїс Лѡва.

— Талун нѡ нин мый луныс?— джадж дорѡ судзѡдчигмоз да сѡтысыс босьтѡм аслас календарь вылѡ — серѡдлѡм чѡрс кодь пуптор вылѡ — видзѡдлїгѡн юалїс дед да, чуньнас ѡти тшупѡд вылѡ индѡм бѡрын, содтїс:— Выль во лунысыс мѡд лун?

Детинкаяс шензьѡмѡн видзѡдлїсны ѡта-мѡд выланыс. Налы раз-мѡд

нин висътавліс дед, кыдзи пöльзуйтчыны тайö квайт пельöса, тшуплöм-бедьторнас календарь пыдди. Но найö некыдзи эз вермыны гөгөрвоны, мый татшöм стöча позьö сы кузя лун тöдны, и öнi кыкнанныс пöшти öттшöтш шуисны:

— Да, 1944 вося январь 2-öд лун.

— Видзöдтö, кык во да джын олöмаöсь фашистъяс ки улын. Ёна жö, кöнкö, страдайтисны сэнi йöзыс, быд лёкторсö адзылісны, коньöръяс... А чорыда, тыдалö, пашистъястö, проклятöйясöс, мöдісны гындыны мян,— скöрысь шуис пöрысь вöралась.

— Регыд нин, дедушка, йöртасны найöс асланыс няйт позъяс,— чорыда шуис Петя.— Фашистскöй гундыртö Берлинöдз зырасны да сэнi и кераласны сылысь пеж юрсö. Да öд, Лёва?

— Сталин ёрт тай шуліс, аслас позыын пö внасны фашистскöй звертö,— шыасис Лёва.

— Кыдзи Сталин ёрт шуис, сідзи и лоö!— эскöдöмөн висъталіс дед, и чукурöсь чужöм пасътаыс сылөн вуджöртчис ыджыд надея.— Лёк звертö аслас позыын и вилöны.

— Дзик зверь кодьöсь öд и эмöсь,— ышловзис Петя да заводитіс висътавлыны, буракö, газетаысь лыддылöмтор йылысь.— Фашистъясөн займитöм öти карын вöлöма школа. Пионерскöй да комсомольскöй организация сэнi олöмаöсь гусьөн. Пионер кывсö он лысьт весиг казътыштны. А казяласны кö гөрд галстук новлöм, пыр жö лыйласны либö петляö öшöдасны. Но унаөн пö вöлі новлöны пионерскöй галстуктö дөрöм улаыс. Сöветскöй сыланкывъяс сывны и думайтнытö оз позь. Челядь гажтöмпырысь ветлывлöны школаö. Көркö öтчид, перемена дырйи, кодкө ньöжйöник заводитöма сывны: «В бой за родину! В бой за Сталина!» Школьникъяслөн, тöдöмысь, ёна нин гажныс бырöма сöветскöй сыланкывйысь и найö асьныс абу казявлöмаöсь, кыдзи школатырнас мöдöма юравны: «В бой за Родину! В бой за Сталина!» Сылöмтö кылöма учительницаыс да кабинетсыс чепöсйöма классö, сывтырсö бордыяс мозшевкинөмөн сувтöма öдзöс дорö, быттьökö лöсьöдчöма кодъскö дорйыны вунöдчöм челядьöс. Аслас пö синваыс чужöм пасътаыс лэччö сылысьясöс öлөдгөн,— ассяныс нин содтіс Петя.— Вунöдчылöм челядь ланьтöмаöсь,— водзö висъталіс сійö.— Но вöлöма сёр нин. Школа дорті шляйтчысь фашистъяс кылöмаöсь сылöмтö да уськөдчöмаöсь классö.

Ыж гидö пырöм кöйнъяс моз найö дыр тешитчöмаöсь челядьды вылын, сэсся школасö томналöмаöсь да öзтöмаöсь.

— И челядьдыс школаас жö вöлöмаöсь?!— эз вермы терпитнысö да торкис дед.— Вот пез понъясыд, вот проклятойясыд... Абу жö прöста нимтöмаöсь найöс пашистъяснад.

— Да, уна челядьдöс найö виисны, но ещö на унджыкöс колисны мамтöг-батътöг,— жугыля, но скöрысь шуис Лёва.— Найö көмтöмөсь, пасьтöмөсь, тшыгöсь, весиг узыланиныс абу... И Житомирад уна сэтшöм челядьдыд колины.

— Коньöръясöй, посни войтырöй,— норапырысь шуис Пиля дед.— Ми со шоныд пывсянынöсь, пöтöсь, а найö, гашкö, кöнкö пос улын узьöны, тирзьöны кöдзыдысла да тшыгйысла.

— Дедушка, Лёва!— нар вылысь чеччытитис да шыясис первой öти-ыслы, сэсся мöдыслы Петя.— Фронт вылö ми кепысь-носки мöдöдлывлам? Мöдöдлывлам. А лун-мöдся кыйöм пöткакысь кö ми лöсьöдам посылка да мöдöдам Житомирса челядьды... мый тi шуанныд?!

— Кызди сийö посылка Житомирö?— эз гөгөрво старик.

— Мый нö кыздыс,— пельпомъяссö лэптыштлис Лёва,— кыям, лэччöдам, косьтам и ыстам.

Дед чöв ланьтис. Сийö тöдис, мый Лёва зэв асыра — шуис кö, вöчаснин, мед кöть мый. А быдтор вылö чуйдöдö сийöс Петя, ачыс пыр мелiөн босьтö, сийö некор оз шу Лёва моз — «кыям, лэччöдам, косьтам да ыстам» — а пыр «кыям кö» да «лöсьöдам кö»... Весиг дедыс дiнö шыясигөн сийö пыр шулывлis «дедушка», а эз «дедö», кызди Лёва да мукöд детинкаяс. Та вöсна старик пырджык зiлис öлöдны Лёваöс, нöбти эз кажитчысылы «риск» кыв, кодöс частö шулывлö Лёва. Рискуйтöмысь öлöдлывлis сийöс весиг Петя, кодi вöли рамджык сьöлöма да и полысьджык. Но кор кык друг мый бердö кö öтвылысь босьтчывлисны, сэки найöс некутшöм öлöдöмөн он дугöд, гусьөн, а вöчасны асногыс. И öнi дед эскис, мый посылка Житомирса челядьды лöö мöдöдöма, сийö и ачыс вöли рад та вылö, сöмын эз тöд, мый позьö мöдöдны посылка тöдтöминса челядьды.

— Позьö кö нö мый, мöдöдам,— шуис сийö.— Пöткасö лэччöданныд, посылкасö лöсьöданныд да сетанныд учительшаныдлы, сийö и мöдöдас. Йирк вылын эм дас кымын кöч ку, найöс сылы жö сетанныд.

— Ок, дедушка, ме и вунöдлi,— учительница йылысь казътыштöм бöрын шыясис Петя.— Лидия Ивановналы фронт вывсянь вöма воча

письмө, и боецъяс тшөктөмаосъ висътавны тэныд зэв ыджыд благодарность...

— Меным! Мыйысь нин? Кыдзи найö төдöны ме йылысьсö?—чуй-мис водны лөсöдчысь старик.

— Тэныд,—дедыслысь шөйөвошөмсö казяліс да пöся висъталіс детинка.—Посылкаяс мөдөдігас учительницаыд, буракö, гижöма, коді кыйö небыд да шоныд гöна көчьяссö, вот боецъясыд и төдöны... Збыль, налысь письмөсö ме ачым-лыдди. Сідзи веськыда и гижöма: «Висъталöй ыджыд благодарность Чарин дедлы да ськөд кыйсьысьяслы,—кинас тувкнитіс аслыс морөсас Петя,—кодъяс асланыс отсөгөн öзтöны миянлысь сьөлөмъяснымөс подвигыяс вылө, врагөс победитөм вылө. Ми чувствуйтам, мый и ылыс войвыв вөръясын кыйсьысьяс думайтöны миян йылысь да төждысьöны миян вöсна...»

— Энлы, энлы,—торкис дед, чусмыштөм синъясас сьлөн öзйис помтөм ыджыд гордость.—Благодарность пö меным. Со öд... а! Вот мый, пиянö: лэччаныд да учительшаныдлы висъталöй: Чарин дед пö тшөктіс ыстыны зэв ыджыд поклон, юрвысянныс да кок улөдэныс, став боецъяслы, сөветскöй мунымөс и миянөс лөк зверысь дорйысьяслы. А ми нин ог вунөдöй найөс, кутам и вердны да юктавны, и көмөдны да пасьтөдны... Тадз мед и гижас...—сэся недыр чөв олыштіс да содтіс:—Гижас ешö мед сы йылысь, мый Чарин дед пö төртөдз-көдзтөдз оз лэччыв вөрысь, а арнас, сезон заводитчигас, бара каяс вөрө да кыяс сы мында прөмыс, мыйта некор на эз кыйлыв... Со мый... А тайөс, мый öні кыйöма, лэччөданныд да тайö разö ставнас сдайтанныд оборона фондö...

— А ми быд выходнöй лунö да каникулъяс дырйи кутам вöравны тэкөд, тшөтш мөдам отсавны фронтлы. Да öд, дедушка? — нимкодясис пыр тэрмасысь да варов Петя.— А арнас тэкөд тшөтш жö каям да кыйсям сезон чөж.

— Велөдчөмныд нө?—кызкө аслысногөн видзөдліс Лёва вылө старик. Буракö, чайтіс сійö, мый внукуыс бара решитöма энөвтны велөдчөмсö. Öд арнас на та йылысь пансьыліс зэв ыджыд сёрни.

— Ми жö таво 7-өд класс помалам, а водзö велөдчыны огö мунöй... кытчөдз война оз помась,—неуна мыкталігмоз шыясис Лёва.—Миян-көд и тэныд гажаджык лөö.

— Менымтö, дерт эськө да. Но ладнө, арөдзыс ылын на. Көлөкө, сэк кежлө и войнаыс помасяс, водöй да узьöй.

Водалом бõрын дыр на сёрнитисны война мунõм йылысь. Дерт, война помасяс сõмын сэки, кор мян Красной Армия воас Берлинõдз да босьтас сийõс. Но тайõ туйыс зев на кузь да сьõкыд, и найõ сёрнитисны, кызди да мыйõн отсавны фронтлы, медым кокньõдны тайõ туйсõ, медым регыдджык помасяс война. Кутшõм нин лоõ сийõ луныс-а?!

Кык друг водõмаõсь õти нар вылõ, а дедыс куйлõ мыш вылас мõдар стендорса нар вылын. Детинкаяс ни õтчыд эз казтыштлыны асланыс батыс йылысь. Чõв олис та йылысь и старик, медым не выльдыны сьõлõм дойсõ ассые и челядылысь.

Сартаса би важõн нин кусõма, и вõр керкаын дзуре пемыд. Тõвся войыс сõмын ичõтик лõзторийõн тõдчыштõ юр тõрмõн õшиньõд. Кõнкõ вылын шумõн котралõ вõрõд вильыш тõв, дзуртõ пуясõн, гылõдõ лым пластьяс. Швачкакылигтыр чепасьõ пармаõд дед-Мороз, быттьõкõ корсьõ, кодõс эськõ кынтыны. Но пармаын олысьяс тõвся войõ кужõны дзесбыны кõдзыдысь. Вõралысьяс шоньд керкаынõсь. Ошьяс куйлõны гуын — нёнялõны певныкõ. Туланьяс тõщõ пу пытшкынõсь. Сьõдбõжьяс да визя-ордаяс пырõмаõсь вужля улõ. Ур да посни лëбачьяс — пыста, кальсы, жõнь, кеня — поздысьõмаõсь сук лапьяса козьяслы питшõгас. Пõtкаяс: сьõбла, тар, дозмõр — пукалõны репасьясын<sup>1</sup>. Кõч шонтысьõ котралõмõн. Шоньд пася руч шыннлõ вõртi, корсьõ пõtкаяслысь репасьяс либõ шойччыны ланьтõм кõчõс да оз кынмы. Оз кынмыны и шоньд пася мукõд зверьяс — йõраяс, кõрьяс, саньяс, низьяс... Ставныс аслысногõн коллялõны тõвся кузь вой.

## БЫДЛАÕ КОЛÕ КУЖÕМ

Небесаыс муртса на еждõдõма, õти-õтиа чутьясõн дзирдалисны кодзувьяс, вõрын сõмын на тõдчыштõ лõз югыд, а вõралысьяс лыжи вылынõсь нин. Шоньдiнысь петõм мысти йирмõг, но, лыжи вылын пуяс костõд писькõдчигõн, регыд пõсялан.

Кызд тай утка нуõдõ ассые пиянсõ эжõра ты вывтi — ачыс водзын, найõ вõtчõны бõрсяныс, — сiдз жõ Пиля дед нуõдис внукьяссõ вõртi, ачыс медводзын, сы бõрын Петя, сэсся Лёва и медбõрын Катшõ — чургõдчõм

<sup>1</sup> Р е п а с — пõtкаяслõн лымийõ кодйõм гу, кытчõ найõ дзесбыны кõдзыдысь.

пельяса, ёсь ныра съод пон. Лымйыс коть и эз на вöv зэв джуджыд, но понлы келавны вöлі съöкыд нин, и Катшö видзчысигтыр восьлаліс лыжня кузя, корсюрö лэптыштывліс васöд нырсö да исаліс воздухсö.

Недыр мунöм мысти ставныс петісны паськыд прöсек вылö.

Вольсалöм еджыд дöра отөн прöсек поткöдö вöрсö. И от помъясыс кöнкö зэв вылын дзёбсьöны вöрас. Прöсек веськыда муніс лунö-войö.

— Ті мунö татчань,— шуйгавыв индіс дед.— Сэні öтарас-мöдарас и лыйсьöй. Тэ накöд жö мун,— тшöктіс сійö понлы, ачыс вуджис прöсек вомöн да суніс вöрас.

Детинкаяс кежисны шуйгавыв да мöдісны искөвтны луныввлань. Вöрсö моз прöсекеыс быттьöкө поткöдіс и небесасö. Öтарладорыс—шуйгавылыс — алöй, мöдарладорыс — еджгов.

— Катшö, корсь, корсь!— горöдіс Лёва. Тайö асья шынитöлас гөлöсыс сылөн юрöбтіс гораа.

Друг мыйкö жбыркмуни. Виччысьтöмнысла челядь чурмулисны. Дзик Лёва лыжи ныр дорысь лэбис тар, сэсса мöд, коймöд.

— Сулав!— шöпнитіс Петя, сылөн синъясыс гöгрöсмылісны да сэсса бөр лоины векниöсь да кузьмөсöсь.

Найö сувтісны, ружьяснысö босьтісны кианыс, видзöдöны: ещö озö лэбны. Катшö вунöдчис да таръяс бөрся уськөдчис лымйö.

Кык друг дыр сулалісны да бара мөдөдчисны водзö. Но эз на и удитны найö дасысь воськөвтны, кызди бара кутісны жбыракывны таръяс. Видзöдан — пасьтала еджыд, и друг ыджыд съод лэбач чөпөсь-яс дзик ныр увсьыд, быттьöкө чужö лымсьыс! Öд он и аддзыв, кызди сійö петас лымйö кодйысьöм позсьыс—репасысь. Вöрыс ловзис.

— Ку-ку-ку-ку, ку-ку-тыр-р-р,— неылö пуяс вылö пуксялісны таръяс да кутісны пинясьны дөзмөм и повзыштöм гөлөсөн.

— Кот-кот-кот-кот,— кылö котсьö мөдлаын. Тайö понйöс казялысь тар шыасьö ёртъясыслы: видзчысьöй пö.

— Ув-ув!— увтыштлас Катшö да дзик пыр бөр ланьтас, а недыр мысти мөдлаын нин кылыштас: — Ув-ув!

Арын тар оз пов понйысь, сибөдас сійөс дзик аслас пукалан пу бердөдз да, бордьяссö пашкыртөмөн, дзоргö рамника увтысь пон вылö. Тöлын шоч тар сибөдө понйөс. Муртса на Катшö кутас матыстчыны сы дінö, пötкаөс ылөдөм могысь увтыштас, мөдыс скöрысь шыасяс сылы: «кот-кот-кот» да лэбас. Сы бөрся лэбасны и орчча пуын пукалысьяс. Но

пон оз дōзмы вōтлысьōмысь, сьōкыдырысь лытї собигтыр, сїйō кысьōпыр водзлань: кодкō да сибōдас, кодкō ылалас сы увтōм вылō!

— Тэ надзōник мун прōсек кузяыс, а ме, час, кежала сэтчō,—шуис Лѣва да кежис веськыдладорō.

Муртса-муртса кокъяссō вōрōдыштїгмоз Петя исковтō веськыд лента вывтї, сюся видзōдō гōгōр: оз-ō тыдовтчыв еджыд лым вылас сьōдтор — тарлōн юрыс. Таръяс пыдди сы дїнын, дзик матын, жбыракылісны-лѣбалїсны зѣв ичōт лѣбачъяс. Тайō медїчōт лѣбачъяс вōрын — пыстаяс. Асьныс мича чача кодбōсь. Кынōмувныс виж, бордъясныс еджыд визъяс сьōд, юрныс чим сьōд, а син гōгōрныс да сыліясныс еджыд, ныръясныс ем йыв ыджда сōмын. Найō неважōн на садьмōмабсь да «ци-ци-ци» чипсїгтыр живакылōны пуяс улын, лѣбалōны ōти пу дїнысь мōд дїнō, быттьбкō вōтлысьōны ōта-мōд бōрсяыс, корсьōны сѣян. Со ōти пыста злōдчōмōн пыксьōма си кызта кокнас увїй да мыйвынсьыс нетшкō рой, корсялō гагъясōс.

— Аттō, зонмō, кутшōм ичōтик, а кутшōм зїль. Сьōкыда жō кынēm-пōтсō перїйō, коньōр,— думыштїс Петя.— Вот эськō вердышты найōс.

Лѣва мунїс таръяс кургōминлань. Ылынкодъ кылыштїс: «ув-ув».

Друг пон увтанїсянь кутїс кывны швачōдчōм, быттьбкō кодкō ыджыд кучик кепысьōн кучкаліс пуясас.

Лѣва ляскысис кыз пожōм бердō. Сысянь неылō, кос конда вылō, пуксис зѣв ыджыд сьōд лѣбач.

«Дозмōр!—думыштїс сїйō.—Қартечōн колō зарядитны».—И ньōжїй-ник перїис патронташьсьыс «К»-ōн пасїйōм патрон да, пу сайō дзѣбсьōмōн, ружьесō зарядитїс тайō патроннас.

Ас синнас детинка адзывліс сōмын дедыслысь кыйōм дозмōрōс да шензывліс: кызди та ыджда тушаыс вермō лѣбавны да ещō и сук вōртї, мыйла оз зурась пуясас?

Ōнї, асья югыдас, бордъяссō неуна шевкнитыштōм сьōд дозмōр кажитчис ещō нин ыджыдōн. Паськōдōм бѣжыс сылōн вōлі пач пōдан кодъ. Сылысō нюжōдōмōн да юрсō пōлōстыштōмōн пōтка кывзїс кōнкō неылын шочиника кывлысь «ув-ув».

«Татчань локтō,— пон йлысь думыштїс детинка.—Повзьōдас ещō!»

Сэсся сїйō кутїс видзōдны, кытї эськō лōсьыдджык матыстчыны пōтка дїнō. Но быттьбкō нарошнō кыз пожōм дорын матын эз вōв неку-штōм пу, и кōть кытчань он мун, быдлаысь тыдалан дозмōрлы.

Та ыджадылы, дерт, инман, но усьо оз ылісянды?

«А усь коть эн, риск!»— вомгорулас нурбыльтіс Лёва да гымөбтіс-  
луйис.

Лыйом шы разалөмкөд тиөтш вөрсө шызьөдіс швачкакылысь гор.  
Ыджыд, съөд пөтка, кажитчө, пуясас кучкаліс аслас вына бордьяснас да  
воши.

— Эк-ма, эз усь!— жалпырысь шуис том морт да бергөдчис прөсек-  
лань.

«Гып-гып!»— сэки жө кыліс дублетон<sup>1</sup> лыйом. Повзыштөмөн Лёва  
сувтіс, дрөб тусьяс сяркнитісны кын пуясө. Дзик пыр жө водзладорсьыс  
кыпөдчисны съөд тарьяс да кутісны лэбны юр весьттис. Лёва эз и төдлы,  
кызди чургөдіс ружьесө да луйис. Öти лэбач из моз тювгысис увлань да  
кутіс пессыны лым вылын.

— Öтик эм!— горөдіс Лёва да уськөдчис пөтка дінө. Небеса кодь лөз  
да сөдз синьясас сылөн ыпьяліс радлун.— Но тырмас, тырмас жбыра-  
кывны,— нюмьялігтыр пөткаөс кутігмоз шуаліс сійө. Сэсся босьтіс тарөс  
сьыліөдыс да петіс прөсек вылө.

— Ставныс, буракө, лэбисны,— волнуйтчөмысла ещө нин тэрыба  
висьталіс Петя, ачыс пыр на чургөдөма ружьесө да, синьяссө лапйөдліг-  
тыр, видзөдалө гөгөр.

— Лэбиганыс али мый лыйлан? Ме со лэбигас лыйи да весьтасас и  
шнөпкысис,— ошйысьөмпырысь пөткаөс шыбитіс лым вылө Лёва. Öні нин  
сөдз синьясыс сылөн кажитчисны пыдөстөмөсь.

Пемыдлөз бархатөн лөсталісны тарлөн и морөсыс, и еджыд визьяса  
борд вылысыс, и читкыля пома паськыд бөжыс, кодлөн улысыс дзик  
шөрөдыс лым кодь еджыд. Борд улыс тарлөн руд. Синкым пыддиыс  
сылөн гөрд вурис, нырыс неуна увлань чукля.

— Ок, кутшөмөс шолкнитөмыд!— юрсө гогйөдлыштис да пөтка дінө  
матыстчис Петя.

— Кыйдөс вылө окайтны оз ков.

— Приметаяс?

— Абу менам, а дедрөн,— мыжапырысь нюмьөвтис Лёва.— Съөд  
дозмөрлы пукалігас лыйи зөв ылісянь да эз усь. Вот эськө сійө вөлі да!  
Вит та ыжда лоө!

<sup>1</sup> Дублет — кыкнан стволсьыс өтпырйө лыйом.

— Кор тэ лыйин, гашкё, дас съод юр мыччысисны репасъяссы, — тэрыба да ыштёмён кутіс висътавлыны Петя. — Ме отиклы сёмын и удиті лыйны юрас. Мукёдыслы лэбиганыс лыйи.

— Юрас, и эз усь! — шпыньмуніс Лёва.

— Уси жё од, эз и вёрзьодчыв!

— А кёні нё?

— Кёнкё тані, — шай-паймунліс Петя, веськыд кинас вёчис кытш, бергёдлыштис юрсё. Съод юрсіён дорёсалём мича чужём вылас вуджёртчис чуймём, тыдалё, вунёдомә сійё, кытчаны лыйёма. Сэссия кутіс дзоргыны оти местаё, буракё, аддзис мыйкё да надзёник исковтис. Мунігмозыс аддзис лымійё кодійём гёгрёс гуран, тыртём репас, сувтис сы дінё. — Лёсыда поздыслёмәбсь, — лыжи беды помнас индіс сійё гуран вылё. — Аддзан, пыраніныс кутшём ичот вёлёма, а пытшкёсыс мый ыджда...

— Тайёс ме аддзывлі нин, — дёмёмпырысь торкис сійёс Лёва. — А вот кёні «вёрзьодчывтём» тарыд? — нерыштис сійё ёртсё. — Колёкё, лэбис?!

— Эз, мися, лэб! Ме со эстысянь лыйи, этайё кыз пожом дорёдыс...

— Мыйла нё эскё дрёб туйясыс оз тёдчыны лым вылас?

— Дрёб туйяс?! — чуймис Петя, бытбёкё немотдлытёг сылы кучкисны шёкаас. Съод синкымъясыс чуқыртчисны, зэвтисны кымёс кусё. — Дрёб туйяс! — мёдысь шуис сійё. — Збыль од! Час корсям!

И мёдіс усьясыны оти репас дінсянь мёд дінё да недыр мысти горёдіс сэтшём радлун ёсь гёлёсён, мый вёрыс быдсён юрёттыліс.

— Э-э-э! Со тай, — дрёб тусьясён жугёдом дора репасысь съод ёкмыль кыскигмоз радліс детинка. — Видзёд, буракё, оти дрёб тусь сёмын и инмёма юрас, — сыліёдыс кутём пёткаёс видлаліс сійё. — Снайпер! А тэ нин он вёлі верит!

— Тэ дзик мыччысигас вевъялёмыд лыйны.

— Дерт жё!

— Репассыд лыйлыны, вёлёмкё, колё кужны.

— Быдлаё колё кужём. Велалам! Не боги горшки обжигают, шуё русской пословица.

— Мыйла нё русской?

— А кызди нё тайёс коминас шуан? Оз жё од енъяс гырничтё ожитайтны?! Кыдзкё абу и мича, — юрсё докйёдлыштис Петя.

— Мыйла нё обязательно татчё колё «енъясыс» да «гырничъясыс»?

Велөдчам и велалам — вот и ставыс. А тэ пыр мыйкө мудритан,— вома-  
лөм ногөн висьталіс Лёва.

— Ньöти ог мудрит. Ме öткодя радейта и коми кывсö и рочсö.

— Но ладнö, ладнö,— дöзмыштöмөн шуис Лёва.

Школаын велөдчигөн русскöй кыв сылы сетчис омöльджыка, дыр сійö эз вермы гөгөрвоны, мыйöн торъялöны «части речи» да «члены пред-  
ложения», и сöмын ёна зильöмөн да Петя отсöгөн русскöй кыв кузя таво  
воис четвёркаöдз, а то пыр вöлі тройка. И öни чайтис сійö, мый ёртыс та  
вылö намекайтö.

— Көть мый, а репасьясыс тарьясöс лыйлыны колö кужны! —  
чорыда шуис сійö.

Репасьясö тарьяс пырöны öгчукөрöджык. Мукöд дырйиис нейджыд  
местаö кодйисясны да быдөн асланыс гуö пырасны комын-нелямын  
душ. Көдзыд луньясö найö петавлöны сэтыс сöмын лунсьöмöсын час-мөд  
кежлö. Сьöd маच्याс кодьöсь пукалыштасны кыздзяс вылын, сёясны  
сэтыс исергаён öшалыс гарсö да, мыйöн пöтасны, вывсянь тювгыясны  
лымйö. Тадзи ас сьöктанас вöчасны джуджыд гуран да кутасны поздыс-  
ны, мукöдыс ылöдз мунасны лым увтыс. Найö зэв чуткöйöсь лым улын:  
мыйöн кыласны кутшöмкö шы, кутасны гораа жбыракывны-петавны  
гуясыс, лэптасны ас бöрсяныс лым буссö. Но көдзыд да водз асылын  
найö зэв дыша петöны шоныдінсыс и сибöдöны зэв матöдз. Мукöдыс  
весиг оз вөрзвыны, кор дінтыс муна. Репасьяс овлöны эрдаджыкинъ-  
ясын, вөр дорьясын, медсясö — кыдзаинын. Но репасьяс корсьны да  
сэтчö пырöм тарьясöс лыйлыны колö кужны.

Том вöралысыс пöрчиснынопьяснысö да чöвталісны сэтчö кыйдöссö.

Көнкö неылын кыліс Катшөлөн лёкног увтышталöм: «в-в-вув, в-в-  
вув», — быттёкö кодкö голяöдыс кутöма сійöс.

— Код вылö нин тадзсö увтö? — чуймыштліс Лёва. — Татшöм увтöм  
ме эг на кывлыв.

— А, колökö, ош гу аддзис да ош вылö увтö, — повзьöмысла дульсö  
нылыштис Петя. — Мый эськö вöчам?

И кыкнанныслөн мышку кузяыс визувтис көдзыд йирмөг. Лёвалөн  
банийöм чужöмыс еджыдöдз кельдöдліс, но сійö спокойнöя шуис:

— Чеччöдам гусыс да виам. Риск!

— Ме могыс нинöмла рискуйтнысö. Ветлам да висьталам дедыдлы.  
сійö мый шуас...

— Сэки өд сійө оз ло мян кыйөм. Ветлам көть да видзөдлам, гашкө и абу ош да.

— А ош кө?!

— Мый нө көть и ош! Бара нин повзин? Зарядит ружьетө өтка пуляөн. Ветлам!

— Ветлам, колөкө, эськө да,— патроньяс вежигмоз нурбыльтіс Петя.— Сөмын ог вөрзөдөй дедытөг.

— Верман котөртлыны дедла,— скөрысь шуис Лёва.— Ме и өтнам ветла.

Дыр төлкуйтны вөлі некор. Пон дугдіс увтны, но кутіс кывны сылөн скөрысь муззөм.

Детинкаяс босьтісны ружьяессө ки выланьс, медым, ковмас кө, пыр жө лэптыны сійөс пельпомөдзныс да лыйны, сэсся надзөник мөдісны вэссылавны. Регыд мысти найө адзисны Катшөөс. Сійө тільсис-вермасис кутшөмкө зэв ыджыд сьөд өкмылькөд: курччылас сійөс, кыкысь-куимысь чеччыштлас водзлань, эновтлас, бара чеччыштас.

— Дозмөртө кыскө,— вөртырнас горөдіс Лёва, ружьесө шыбитіс пельпом саяс да уськөдчис пон дінө. Петя сы бөрся.

Том кыйсьысыяс матыстчөм мысти Катшө эновтіс ассыс ношасө, сувтіс сы дінө да өлөдана синьясөн дзоргө челядь вылө: «Лыйны лыяныд, а сэсся эновтаньныд, весиг онө видзөдлөй, уси эз лыйөмторыйыд, мыйтөм кад менсьым прөста воштінныд»,— висьталіс понлөн видзөдласыс.

— Лёва, кызди нө мый тайө артмис?— ёртыс дінө матыстчис Петя да радысла сэтшөма тапнитіс сылы мышкас, мый пөтка дінө копыртчөм Лёва төкөтьө эз сун ныр вылас.— Айда ми!

— Катшө увтіс, ме лыйи, пөсь вывсьыс дозмөр лэбыштіс да уси, пон сійөс корсис — и ставыс,— пөткаөс юрөдыс лэптігмоз веськодя шуис Лёва.— Молодец, Катшө,— ошкыштіс сійө сәні жө сулалысь понйөс.

Пельпом весьтөдз юрсө лэптөм дозмөрлөн бөжыс инмис на лымьяс: сы кузьта сійө вөлі. Гөрд синкыма юрыс сылөн тошка, зобйыс лөс-талө лөзов бархатөн, голяыс да кынөм улыс сьөд, а мышку вылыс руд.

— Миян вөрьясын тайө медыджыд пөтка,— кынөм увтіыс кутөмөн дозмөрөс босьтіс мездорас Петя, быттьөкө төдмаліс сылысь сьөктасө.

— А тэ нин ошкысь повзин да дась вөлін котөртны гөртө,— нюмьөвтіс Лёва.

— Полөм да видзчысьөм абу өти. Ковмас кө, ме и смертысь ог

пов. А весьшөрө рискуйтны ог кёйы. Но ладнө, коть мый, а посылка тыр кыйим,— сдайтчис Петя.

— Кыям на өд. Луныс сөмын на заводитчис.

— А төдан, Лёва, мыйтөм мяян кодь вөралысьыд страна пасьтаад? Зэв өд уна. И быдөн кө мөдөдасны гоз-мөд посылка, кымын кар да кымын мортөс позяс вердны!

— И мөдөдалёны, и вердөны! Тэ, чайтан, ми сөмын гөгөрвоам тайөс?

— Ог жө өд! Ми асьным неуна сёрөнджык кватитчим.

Том вөралысьяс бура төдисны, мый мяян странаса уна миллион челядьлөн киясныс вөчалёны минаяс, төчиталёны детальяс танкьяслы да самолётьяслы, кыёны чулки-кепысь, вурёны көм-паськөм боецьяслы, быдтёны да чукөртёны ыджыд урожай асланыс рөднөй Краснөй Армиялы, кыйёны да сдайтёны государстволы ценнөй пушнина... Отсасьёны дорны враг вылын победа, нуөдны великөй тыш ыджыд правда вөсна. И асланыс скромнөй уджөн найө оз кёйыны кольччыны став йөзысь, кодья героическөя отсалёны фронтлы.

Детинкаяс төдисны и сы йылысь, мый сөветскөй йөз став выннысө зэвтөмөн өнө отсалёны оккупация улысь мездөм районьяслы, көмтөм-пасьтөм да горттөм йөзлы.

И сьөкыдлуньясысь повтөг найө зіля кытшлалісны джуджыд парматі, медым кыйны унджык зверь-пөтка. Найө, дерт, эз төдны, мый дасьтөма налы пөрысь парма.

Гоз-мөдысь нин Катшө кежөдліс челядьөс прөсек вылысь. Коряс ур коктуй, туялас да гораа кугас увтны, ачыс гөгралө пу гөгөр, нырсө лэптөма вывлань. Кык друг кежаласны сы дінө, лыясны урөс, сюясны сійөс тасма костаныс и бара водзө.

Прөсек дорысь сюрлі ещө өти тар чукөр. Детинкаяс өта-мөд вежмөн лыйлісны налы лэбиганыс, но ни өтиөс эз вермыны вины. Рөмдігас нин найө бергөдчисны бөр.

Сьөкыд нопьяөсь, мудзөмаөсь, но кыпыдөсь, шудаөсь, найө воисны керкаө. Кыдзи нө он радлы, өд кутшөм бур посылка артмас Житомирса челядьлы налөн талунья кыйдөсысь!

Кутшөм чөскыд лунтыр вөрын ветлөм бөрын гор дорын пуөм пөтка шыд! Кутшөм лөсьыд сөйөм бөрын шойччыны турунөн вольсалөм нар вылын!

Дед юасьыштіс челядьлысь талунья кыйсьөм йылысь. Тэрыба да

лӧсыда Петя висьтавліс сылы, а Лёва сӧмын коръясӧкӧ шыасьлывліс, кор нин ёртыс кутіс содтавны вӧвлытӧмсӧ.

— Да-а,— медбӧрын шуис Пиля дед.— Быдлаӧ колӧ кужӧм.

И регыд мысти вӧр керкаын эз кут кывны сӧрни. Сӧмын кыліс челядӧлӧн шкоргӧм да дедлӧн кызӧктышталӧм.

## ЫДЖЫД ЭРД ДОРЫН

Аскинас, югдандорыс, и челядь, и старик бара нин вӧліны вӧрыносъ.

Прӧсек дорын матын эз вӧв ни ӧти тар, и детинкаяслы лои кежны пожӧма вӧрӧ. Вомсӧ эз на калькнитлы и Катшӧ. Некутшӧм ловья шы эз кыв вӧрын, быттьӧкӧ войнас ставнысӧ виалӧма дед-Мороз, сӧсся некод вылӧ нин лоӧма усъласънысӧ да швачкакылӧ-поткӧдлӧ пуяссӧ. Ӧтилаӧ плетьӧн моз швачкас-кучкас, мӧдлаӧ...

Сӧмын мудзтӧдз ветлӧдлӧм бӧрын нин, кор ягыс помасис да вӧрыс вежсис,— ӧтарас сулалісны виж кока пожӧмъяс, а мӧдарас — пемыдвеж козьяс,—дзик яг дорсыс ӧти-мӧд бӧрся лӧбавны мӧдісны таръяс. Детинкаяс кӧть и унаыс лыйисны, но усъкӧдны вермисны сӧмын куимӧс.

Бӧрыннас, кор бара лои шынитӧв, найӧ пырисны кызд пу сора козья вӧрӧ. Гырыс козьяс костӧд кутіс тыдалыштны зӧв югыдін, быттьӧкӧ вӧрыс помасьӧ. Пуяс костӧд тыдовтчис ыджыд эрд.

Эрддорса вӧрын мӧдісны паныдасявны кутшӧмкӧ гырыс коктуйяс — топыд лымсӧ писъкӧдлӧма муӧдзис. И кыті мунӧма тайӧ коктуйыс, сӧні пельыс пуяс да пипуяс дӧввидзӧны еджыдӧсь, а мукӧдсӧ выліті чегъялӧма да шыръӧма йывъяссӧ. Тӧлӧн пӧрӧдӧм пипу дзик кырсытӧм, быттьӧкӧ кодкӧ гогналӧма сійӧс, а лымйыс сы гӧгӧрын ставыс розьӧсь.

— Лёва, йӧраяс ветлӧдлӧмаӧсь!— шӧпнитіс Петя.— Со тані ӧтик куйлӧма,— индіс сійӧ кузьмӧс ыджыд гуран вылӧ. Гураныслӧн бокъясыс шыльыдӧсь, кӧн тапкӧдӧма кодьӧсь. Лымйыс топалӧма дзик му бердӧдзис, весиг тыдовтчӧмаӧсь веж пув коръяс.

— Аддза,— шыасис мӧдыс.— Кӧнкӧ танӧсь найӧ. Сӧмын эн лый, кӧть и матӧ сибӧдасны.

— Оз позь, огӧ и лыйӧй... Колӧкӧ, огӧ и аддзылӧй.

Воссис помтӧм ыджыд эрд. Сӧні сӧмын кӧнкӧ ӧти-ӧтиӧн сулалӧны кузь да кыз кос пуяс — кондаяс, кыззи памятникъяс, кодъяс висьталӧны, кутшӧм гырыс вӧр коркӧ вӧлӧма тані. Ӧні діӧн-діӧн быдмӧ томиник

кыз пу рас, өти-мөдлаын тыдалоны дзугсьом юра бадь чукөрьяс. Уна вожа бадь йывьясыс тшөтшядөсь, быттьо кодкө нарошно шырома найос. Увтасмөм шонди водзас миллиард бикиньясон дзирдало лым, еро синьяста, и нинөм оз тыдав.

Ворыс тати коркө сотчывлөма, пуяс косьмалөмаось, төв унджыксө найос пөрлөдлөма вужнас. Вужьясыс чургөдчөмаось зэв вылөдз, лыбөдөмаось тшөтш мусө и ылысянь кажитчоны вөр керкаяс кодьось, лымтөм бокьясыс быттьокө сьодов стеньяс.

Тайо вөр кладбище — пөрөмин. Пөрөминьяс потшоны вөралысьлысь туйсө: крестон и вомөнон, уна вевсьон куйлысь gyрысь пуяс вомон он вудж, он мун! Сөмын джуджыд лымья дырйи лыжион муртса пьсьтан пөрөминөд, но и то ковмас кытшовтны вылын куйлысь пуяс да вужляяс гөгөр да колө видзчысьны, медым он веськав вывсяньыс рөскон да лымйон тырыштөм джуджыд гуранө. Усян кө сэтчө, он на и кай сетысь.

Челядь сувтисны сьод вужля дорө, нөрөвтчисны му стен бердас да дыр видзөдисны гөгөр. Вужля сайсянь тыдалыштисны сөмын налөн юрьясныс, ичөтик төвруыс койыштывлис налы чужөмбанас чорыд лымчирьясон, и видзөдны вөли сьөкыд. Эрд дорти стенаон быдмө вөр, и тайо ворыс кажитчө джуджыдөн да тшөкыдөн.

Эрд вылас ылын, вөр дорас, друг мыйкө сьодов рөма вөрзыштит, быттьокө вешийс өти вужля.

— Видзөд,— другыслы гыррдзаас кутчысьлис Пегя да төдлытөгыс босьтит ружьесө веськыд киас.

Өти бадь куст диньсь мөд динө вуджис зэв ыджыд вужляяс кодь жө сьод зверь. Тайо вөли ай йөра — войыв муын олысь медыджыд зверь. Нырвомыс мөслөн кодь жө, сөмын паськыд нырыс өшөдчөма шмакөн. Сьылысяньыс мышыввланьыс муно неыджыд гөрб, быттьокө дорышон сувтөдөма сэтчө кузь нитшка вутш. Зверлөн гоныс пемыдгөрд, рудов, кокьясыс кузьось да еджыдось; бөжыс көчлөн ыжда сөмын; каджьясыс шылыдысь, оз чурвидзны мөслөн моз. Со сийө сувтис бадь куст динө, шлоп-шлопкерис ыджыд да паськыд пельяснас, тыдалө, кылис кутшөмкө шы. Сэсья видзөдлис өтарө-мөдарө, чушнитис нырнас. Сийө, дерт, эз вермы адзыны вужля сайын сулалысь челядьос и эз кыв налысь дуксө сы вөсна, мый төвруыс мунис детинкаяслань. И вот сийө мөдис кусньөдлыны бадь йывьяссө да, кывсө пелька вөрөдигмоз, шырны найос.

«Со тай мыйла бадь кустьясыд тшөтшөдөма кодьось,— гөгөрвоисны

челядь. — Со кодi, вöлöмкö, шырё найöс. Тайö жö, дерт, и пипутö гогналöма, пельсы пуястö кырсыöма да чегъялöма».

Вөрзöдчытöг орчöн сулалысь да кыйöдчысь детинкаяс эз на и удитны сылöм бурмытöдзыс любуйтчыны этатшöм вöрса мича дивöыс вылö, кызди йöраысь татчаньöджык вöрсыс петiс сэтшöм жö мöд зверь.

Чуймöм детинкаяс синнысö лапнитлытöг дзоргöны зверьяс вылö.

Лёва друг пыркмуни, пельпом сайсыс нетшыштiс ружьесö да чургöдiс сийöс. Петя кöсйылис нин кутны сойöдыс да öлöдны ёртсö, но кор видзöдлис вөр дорлань, кытöни тыдалiс йöра да кытчань чургöдöма ружьесö Лёва, ачыс босьтiс киас ружьесö, тэрыба чегис сийöс да зарядитiс выль патроньясöн. Йöра дорсянь татчаньнджык неылын, ыджыд пу ув вылын, куйлис кутшöмкö адззывлытöм зверь. Сийö зэвтчöма шырёс кыйöдысь кань моз, тыдалö, лöсьöдчöма уськöдчыны код вылö кö, колöкö, сылань матыстчысь йöра вылö.

Резöбтiс лыйöм... Петя адззис, кызди сыркмунис ув вылын куйлысь зверь, сэсся тювгысис лым вылö, падмыштлис, быттьökö эз тöд, кодарлань пышйыны... Та коста вевъялис лыйны и Петя...

Зверь сунлис ныр вылас, сэсся дернитчис да кытчökö воши.

Лыйöм шыясысь повзём йöраяс гогнитiсны юрнысö — ой, мый вылнаöдз! — видзöдлисны öтарö-мöдарö, шлопнитiсны яя нырбордьяснас, чушнитiсны, сэсся сувтлисны бөр кокъяс вылас, вылö-вылö чеччыштiсны да, юрнысö челядьлань чукультöмөн да кок уланыс видзöдтöг, кутiсны тövзыны пöрöмин дортi вөрлань. Оз тай кутны найöс пöрöм пуясыд, оз лжöмдавны найö, кöть и оз видзöдны кок улас! Вылын куйлысь пöрöм пу вомөн чеччыштасны да кокныс оз инмыв, а чургöдчöм ыджыд пельясныс пу йывьяс весьтöдзыс воласны. Збылысь найöс позьö шуны природа чудесаён!

Чуймöмөн челядь видзöдiсны на бöрся. Сöмын нин тыдалö лым бусыс, а найö пыр на дзоргöны вөрлань, кытчö саялисны зверьяс. Лёва паськöдöма синьяссö, ставнас зэвтчöма. Киас босьтöм ружьейс дзöрис вавыв шатин моз. Петя калькнитöма вомсö, вийöриник тушаыс сылөн дзоньнас сырмис.

— Вот приз босьтан вöвьясыс! Ок, эськö, пуксывны кö на вылö! — пидисянь ышловзис Лёва.



— Кор тэ чургөдін ружьетө, ме сідзи чайті, мый тэ йөраыслы көсь-  
ян лыйны! — зэв тэрыба висьталіс Петя.

— Ог жө өд!.. Аддзылін, кутшөм зверь вөлі куйлө пу ув вылас?

— Лыйи да, дерт, аддзылі! А кытчө эськө сійө воши?

Том войтыр шай-паймунөмөн видзөдлісны өта-мөд выланьс, быт-  
тьөкө кыкнанныслы өттшөтш кутшөмкө өтитор уси дум выланьс. Чөв  
слігтыр найө зарядитісны ружьеяснысө өтка пуляясөн да надзөник  
исковтісны вөр дорлань, кыті муніс төдтөм зверь. Лым вылын төдчисны  
кыпыдөсысь паськыджык, кузь гыжъяса гөгрөс коктуяя, кодъяс бөрся  
сикөтшөн моз сярвидзө вир войтьяслөн гөрд визь.

— Катшөөс чукөстам!— шөпнитіс Петя.

— Кыліс өд лыйсьөмсө, ачыс локтас, оз кө ылав ур дінө либө тар  
дінө,— волнуйтөмысла да, тыдалө, польштөмысла пыдісянь лолыштіс  
Лёва. — Вай вөтөдам!

«Риск»,— ёртыслысь радейтана кывсө көсйыліс шуны Петя, но друг  
думыштіс, мый татшөм минутаө шутитны оз позь: верман падмөдны да  
торкны став делөсө, и сы пыдди, ызйөдөм могысь, шуис:

— Ёна, тыдалө, ранитчөма, ылөдз оз мун, оз кө уськөдчы миян вылө.

Катшө и збыль кыліс лыйсьөмсө да, лымйөд собигтыр, тэрмасис  
детинкаяслань. Арын кө эськө сійө важөн нин вөтөдіс найөс, а өні со  
мукөдлаас пель йылөдзыс вөйласьө — он котөрт тэрыб кокъяснад!

Гөгөр сюся видзөдалігтыр челядь мунісны коктуй кузя. Еджыд лым  
вылас ылөдз тыдаліс вир визьыс, быттьөкө кодкө пув коялөма. Но регыд  
мысти вөрыс кутіс вежсьыны. Ылісянь сійө кажитчис кык судтаөн. Уліас  
тшөкыда быдмисны посныдык козьяс. На вылө өшйөм лымйыс өтторъя  
вевт кодь, быттьөкө вевт вылас нин быдмөны өтка кузь пуяс.

— Сувт,— дрөгнитөм гөлөсөн, но чорыда шуис Лёва, ачыс крута  
бергөдчис шуйгавыв.

Неылын, муөдз өшөдчөм лапъяса кыз коз дінын, тыдаліс ыджыд  
сьөд ёкмыль. Зверь куйліс челядьлань юрөн, буракө, виччысис найөс...  
Эз на и удитны детинкаяс лэптыны ружье прикладсө пельпомөдзныс,  
кызди зверь сьөкыдпырысь чеччис, жергөдіс кузь ёсь пиньяссө и, колөкө,  
уськөдчис эськө сійөс туялысьяс вылө, но тайө здукас гораа гымөбтіс  
луйөм шы: повзьөм детинкаяс, быттьөкө сёрнитчөмөн, лыйисны өттшөтш...  
Зверь лөкысь горөдыштіс, уси лым вылө, быглясьыштіс, сэсся мыйвын-  
сьыс дернитчөмөн чеччис да довьялігтыр саяліс тшөкыд коз тільө.

Посни козьяс быдмөмаоьс сэтшөм тшөкыда, мый на костө муртса төрөны лыжияс и водзвылысь нинөм оз тыдав. Расті писькөдчысыя улөдз мышкыртчыласны — улітіыс пуясыс увтөмөсь да ылөджык тыдалө,— видзөдласны гөгөр, оз-ө тыдав съөд ёкмыль, да бара писькөдчөны водзлань — вирөсь коктуй кузя. Вөрзөдөм пуяс вылысь гырысь пластьясөн гылалө юр вылө лым, пырө сылі пиө, сылө да визувтө мыш кузя.

Друг мыйкө гир-гармуні Лёва бөрвылын.

— Ой! — быттьө көдзыд ваөн койыштисны сылы, и сійө бергөдчис. Горөдөм вылас бергөдчис и водзын мунысь Петя.— Кутшөма повзьөдін,— лыжияс вылө кавшасьөм Қатшөөс аддзис да шошаөдыс кутөмөн меліа тапкөдыштис Лёва.— Но, мун водзын, корсь, корсь!

Катшө видзөдіс скөрыськодь, быттьөкө көсийс шуны: «Мый дыра увті-увті да эн и кывлөй, а кытчөкө со келанныд этатшөм тілөдыс!» Но лыйсьөм шы серти да вир дук серти пон век жө төдіс, мый челядь вөтөдөны кутшөмкө зверөс, и сылы вөлі өбиднө, мый найө эз чукөстны сійөс. И скөрмөм пон панйис челядьөс да чеччалігтыр муніс вир дук кузя, а регыд мысти туялысьяс кутісны кывны сылысь эргөмсө:

— Эр-р-ы-ы!

— Вөтөдіс,— сувтовкерис Петя да, гылалысь лымйысь виччысьтөг, тэрмасьөмөн мөдіс писькөдчыны водзлань.

Рас помасис, воис гырысь пожөмъяса, гежөдик да посни коз сора пожөма вөр.

Пиньяссө жергөдөмөн, пашкыр кузь гөна, тешкодь ичөт юра, еджыд плешка зверь пластнитчөма лым вылө. Чунь кузьята гыжъяса, паськыд лапаяса кокъясыс сылөн дергайтчисны на, быттьөкө восьлалісны, но эз вермыны воськовтнысө.

Катшө сідзжө жергөдөма пиньяссө, сувтөдөма шошавывса гөнсө, сулалө неылын да эргө.

Петя сувтіс неылө, ружье прикладсө пунктис киняулас, ачыс шөйбөшөмөн видзөдывлө то пыр на вөрыштысь зверь вылө, то сы дінын скөралысь пон вылө, то бөрынджык локтысь ёртыс вылө. Лёва панйис сійөс, матыстчис зверь дінө, ствол помсө веськөдөма сылы пеляс — вөрзяс кө и лыйны.

— Вот гайө кыйдөс!— кызкө пыдісянь шөпнитөм моз шуыштис сійө. Кажитчө, лолавнысө сылы эз тырмы вөрса чистөй да көдзыд воздухыс, и та вөсна гөлөсыс тіралыштис.

Зверь ещѣ гоз-мѣдысь дернитліс лапаяссѣ, съѣкыда лолыштис да ланьтис.

— Кутшѣм зверь нѣ тайѣ?— другыс динѣ матыстчис да сэтчѣ жѣ сувтис Петя.— Ылісяныс тай дзик ош кодъ кажитчис, а ичѣт и вѣлѣма.

— Ог тѣд,— вочавидзис Лѣва.— Повзѣѣм вывсыд быдтор мѣдногаѣн кажитчѣ,— нюммунис сійѣ, лыжи нырнас тувкнитис зверлы бокас да, кор нин казяліс, мый зверь оз вѣр, лымыѣ сатшкис ружьесѣ.

Сідз жѣ вѣчис и Петя, ачыс варовитис:

— Асьным виим, а ог тѣдѣ кодѣс. Низь — абу низь, тулан — абу тулан, гашкѣ инѣ, вѣрканы, либѣ, колѣкѣ, сан, а гашкѣ и, латшѣг.

— Саныс да латшѣгыс ѣти,— гораа нин серѣктис Лѣва.— Ѡтилаын шуѣны «сан», мѣдлаын — «латшѣг».

— Вот тѣныд! Зоология велѣдим-велѣдим, а зверь ним ог тѣдѣй!

— Да...

— А вот дедыд зоологиятѣг тѣдас. Но вай мыйкѣ вѣчам,— тѣрмасис Петя, босьтис зверѣс кузь гѣна шошаѣдыс да кыскыштис асланыс.— Яйсѣ талысь, дерт, посылка вылѣ жѣ, а кусѣ сдайтам нянь вылѣ да мукѣд прѣдукта вылѣ. Да ѣд!

— Тѣ, Петрѣ, век тѣрмасын да уна больган,— вомалис Лѣва.— Виѣмаыд некытчѣ нин оз удит. А кытчѣ-мый сійѣс воштыны, бѣрыннас аддзам. Этшаджык пѣ сѣрнит да унджык вѣч.

— Вот и абу сідз,— торкис Петя.— Этшаджык пѣ кывнад из да унджык кинад вѣч. Но делѣыс ѣни абу таын. Дерт, дедыд висьталас, кытчѣ-мый тайѣс воштыны. А вот кыдзи сѣмын лѣчѣднысѣ?

— Этайѣс?! — Лѣва кутис зверѣс кык водз кокѣдыс да Петя ѣтсѣгѣн шыбитис сійѣс мыш саяс.— Босьт менсым ружьесѣ!

Лым вылѣ коли гѣрд сера еджыд тасыт кодъ гуран. Катшѣ исалыштис сійѣс, но весиг эз нюлышт.

Петя босьтис асьыс и ѣртыслысь ружьеяссѣ, петис водзѣ, но дзик пыр жѣ падмис. Кытис мунны? Бѣр важ туйѣд, тшѣкыд коз рас пыр татшѣм тушаѣн пискѣдчыны зѣв съѣкыд. Кытшѣвтны сійѣс да веськыда петны прѣсек вылѣ? А кѣни сійѣ прѣсекыс?

Петя кыскис зѣпсыс компас. Прѣсек вывтис кайиганыс петысь шѣндыслѣн кыаыс вѣлі шуйгаладорын. Прѣсекыс мунѣ лунѣ-войѣ. Кежисны найѣ сы вылысь веськыдвылѣ. Медым бѣр петны сэтчѣ, сідзкѣ, колѣ мунны асыввывланы.

— Бөрйи ориентир да дуит веськыда асыввылө,—сьökыд ноша вöс-наыс пöдыштөм гөлöсөн тшöктис Лёва.

— Ориентир?! Қызди тай военной занятияс вылад? Есть, бөрйины ориентир!— и Петя бөрйис синнас ылын тыдалысь кос конда да, сы вылө частö видзöдлывлгтыр, мөдис сэтчань, ёртыс сы бöрся.

## РЫТГОРУЛЫН

Унаысь нин вежсьылысны детинкаяс ношананыс: то Лёва нуас зверөс, то Петя, но прöсек век на абу. Шойччыны сувтлыны ковмис пыр частöджык. Унаысь нин юраныс волис дум: колökө, мөдарө мунсьö? Но мөдарө кö мунсьö, колö петны эрд вылө—пөрöминö. Оз, мөдарө оз мунсьы! Прöсек мунö лунö-войö — тайöс челядь бура тöдисны и шондi петöм серти и компас серти. А мый сийö вöли асыввылын, тöдисны кежөм серти.

Нопьясаныс налөн öтиыслөн кык съод тар, мөдыслөн öти, сэсся и тайö ношаыс. Көть и переменаөн нуöны сийöс, но кузянад съöктö и туйыд нюжалö. Тайöс тöдисны найö, и ориентирсянь ориентир вылө падъявтöг восьлалисны водзö.

— А ййöсь жö ми!— шойччыны сувтiгмоз горöдис Петя.

— Мый нин бара думыштiн?

— А со мый! Ме, шуам, нуа кыкнан нопсö и кыкнан ружьесö, а тэ тушасö. Сэки, пöжалуй, и вежласьнысö нинöмла: öтсьöкта кыкнанным-лөн лöö.

— Водзджыксö нö эн вермы думыштни та йылысь,—нопсö пөрчгитыр нурбыльтис Лёва, сэсся кокъяссö мынтöдис лыжи көвъясысь, тувччислым вылө, пидзöсöдзыс вöйи сэтчö да мөдис таявны лымсö. Артмис юждөм пыдöса гуран, код дiнö Лёва матыстис лыжияссö да мудзпырысь пуксис лабичö моз.

Петя öнi видзöдис сы вылө неуна чуймыштöмөн да, кор аддзис, мый сийö вöчö да мый артмис, гажая шуис:

— Мыйөн думышти, пыр и висьталi. А тэ нö мыйла «водзджыксö» эн висьтав, мый татшөм лөсыда позьö лабичтö вöчны?— сэсся матыстчис ёртыс дiнö, пөрччис лыжияссö, сiдзжö вöчис лабич да пуксис сыкөд орччөн.

— Тадзи вöчлывлöны сöмын ёна мудзөм бöрын да дыр кежлö шойччыны пуксигөн.

Колө висътавны, мый колян воодз Петя шочджыка кайлывліс кыйсыны вөрө. А Лёва война заводитчөмсянь выходной лунъясө нянь катөдліс дедыслы. Арын ветлывліс сыкод чөстуй кузя, төлын — капканъяс видлавны, да каникул чөж оліс вөр керкаын, и өні арталіс асьсө прамөй вөралысьөн. Детинка адзис, кутшөм сьөкыд пөрысь дедыслы ветлөдлыны вөрөд, кыйсыны. И сылөн лунысь-лун частөджык бергаліс юрас өти дум: энөвтны велөдчөм, заводитны вөравны — семья вердны, фронтлы отсавны. И кор нин сійө дзыкөдз решитіс та йылысь, висъталіс ёртыслы, Петялы, а сійө кальөг вомнас висъталөма пионервожатөйлы, коді волөма Лёваяс ордө да сёрнитөма дедкөд да мамыскөд... Қывлөма да волөма дед дінө и Лидия Ивановна — семилеткаса директор. Воөма сійө татчө во комын сайын нин, велөдлөма ещө земскөй начальнөй училищєын на, коді волөма тайө сиктас.

Пиля дедкөд найө зєв бур төдсаяс 1919 восянь, кор өтлаын партизанитлөмаөсь, и «учительша», кызди сійөс шуліс Пиля дед, весиг овлывлөма вөр керкаын. Лидия Ивановна өні — сиктын медся уважайтана морт. И вот сійө сёрнитөма важ партизänkөд да Лёва мамкөд. Тайө вопросө разбирайтисны весиг пионерскөй сбор вылын. И ставныс шуисны, мый Лёвалы нинөмла энөвтны велөдчөм.

Кык друг лөгасьлісны. Но өтчыд Петя шыасис ёртыс дінө да шуис, мый сылы кө пө сьөкыд өтнаслы нянь катөдлыны да прөмыс лөччөдлыны, сійө пө дась отсавны сылы, а батыслөн двухстволкаыс пө прөста жө өшалө порогув тувйын. Лёва прөститіс ёртсө, найө шуисны, коть мый, а помавны 7 класс, и война помасьөм бөрын пырны велөдчыны леснөй техникумө. Тайө лунсяныс Лёва ни өтчыд эз нин кайлыв вөрө өгнас. Тадзи Петя лон вөралысьөн.

— Дыр кө мөдам шөйччыны, вермам пемдыны, видзөдлы шонді вылад.— Петя индіс дзык лыжи туй весьтын пуяс костөд дзирдалысь шонді выдө. Сылөн гөрд чөлан дорыс бытьтөкө тшукөма вөрас, а тайө биа гөгылыс сибдөма пуяс костас.

— Пемдам кө и узям.

— Тані, көдзыдінас, лым вылас?!

— Не татшөм көдзыдөн на ми дедкөд узыльвлім. Ыдждыда биасян, ныв лыс вольсалан и гортын моз узян.

— Дерт нин, гортын моз! А миян и няньным абу.

— Ми өтчыд кык войков ветлөдлім нянь крөшкитөг и эг тшыгъя-

лөй. Урыд эм? Эм. Кулян сійөс и би вылын жаритан, ок, кутшөм чөскы-  
да сөян!

— Ур яй он жө сөй, фу,— юрсө пыркнитіс Петя.

— Он кө, тарыд тай нопъяд, сійөс куштам да жаритам. Но ог на  
пемдө, эн пов. Прөсекид матын нин.

— Код төдас?

— Он өмөй аддзы вөр сертигыс, прөсек дорад вөрыс вөлі кыз пу  
сора, со татшөм жө.

— Эг на велав лыддыны вөрыслысь книгасө. Төда, мый өтка пуяс-  
лөн лапьясыс кузджыкөсь лунвывладорас, пожөмлөн кырсыс сьөдджык  
войвывладорын, и ставыс.

— Дерт, ми вөрсө ни сәні став олысыяссө ог на төдөй. Со тайө, ась-  
ным кыйим и огө төдө, кутшөм зверь,— нюммуніс Лёва.

Недыр кезлө сөрни пансыліс на дінын куйлысь зверь йылысь, и  
дона-ө сылөн куыс, и уна-ө лоө яйыс, и мыйла вөлі кайөма пуө... Од  
первой ыджыд зверь тайө, кодөс кыйисны челядыас асьныс. И кыкнан-  
ныслөн радлісны сьөлөмясныс.

Катшө көть и мудзөма нин лунтыр лытмі собалігөн, но эз куйлы  
ныкыльтчөмөн, а водөма лапаяс вылас зверлань юрөн, скөрысь видзөдө  
сы вылө, быттьөкө полө чеччөмысь.

— Но, вай мөдөдчылам,— тэрмөдліс Петя.

— Окма, дыш нин эськө да, быть мун,— сувтіс да нөдзөвтчис Лёва.

Куимысь кымын шойччылісны нин, прөсек век абу. Вөрыс рудөдіс.

Көть Петя неуна и полыштіс вөрын узьөмысь, но сьөлөм вылас вөлі  
долыд. Од тайө төдтөм зверь ку вылас сетасны быдпөлөс прөдуктасө.  
Петя ваяс тайөс мамыслы, коді корас сійөс ас дінас, копыртас сылысь  
юрсө асланыс да, сьөд юрсисө небыда-небыда малалігтыр, кутас шуавны:

— Вердысьөй тэ менам, муса пийй! Батыд кө эськө вөлі гортын...

И детинка морөсын пузылас враг вылө лөглун, од фашистыяс вөсна  
абу гортас сылөн батыс, на вөсна сьөкыд олөмыс.

Детинка син водзын кыптыліс и мөд картина. Со сійө локтас шко-  
лаө. И Мишка Қозлов, кодысь быдөн полөны, и Вася Шашев, школаын  
медічөт велөдчысыс, и мукөдыас зэв унаөн кытшалөмаөсь Петяөс да,  
вомнысө калькнитөмөн, вежалан синьясөн видзөдөны сы вылө, асьныс  
зіля кывзөны Петялысь висьтавлөмсө, кызди найө вөтлысисны да кыйис-  
ны төдтөм зверөс. Сәки, дерт, төдны нин кутас, кутшөм зверь тайө.

Думыштчөмөн мунысь Петя друг чуймис. Сылөн син водзас лон югыдджык, быттьокö синсö вöлі тупкöма мыйöнкö и тайö туйёдсö бось-тисны.

— Ура!— мыйвынсыс горöдiс сийö да видзöдлiс öтарö-мöдарö. Вö-рыс потi кыкпельö, потасыс югыд, а доръясыс пемыдöсь.

— Ме тай шулi, мися матын нин прöсекыд,— ёртыслысь горöдöмсö гөгөрвоис Лёва да петiс радлысь другыс дiнö.— Со и лыжи туйным мян.

Петя шай-паймунi, быттьокö мөвпалiс, кодарö жö колö кежны, сэсся надзöник бергöдiс лыжияссö шуйгавыв да видзöдлiс бөрвылас. Лёва бер-гöдчис сэтчань жö.

Дась лыжи туй кузя мунны кык кокни, и найö мöдiсны исковтны джуджыд веськыд гуран пыдöстi моз. Туй вылö петöм бöрын весиг му-дзöмныс вунi раднысла.

Со и вөр керка дорö кежанiн, а со и сылөн саось стеньясыс. Восьса öдзöсöд пуркйö тшын, но оз кай вывлань, а рувьялiгтыр кытшлалö пуяс гөгөр да ньöжйöник разалö. Öтка кодзув моз рöмыдас дзирдалö ломтöм пывсян гор.

Дед воöма нин кыйсянiнысь да вевъялöма ломтыны пывсян. Öнi со мыччöма юрсö öдзöсöд, ачыс куйлö му джоджö вольсалöм турун вылын. Мыйöн сийö аддзис локтысь челядьöс, Лёва мыш сайысь зверöс, сунлiс тшын пиас да зэв öдйö петiс: пышына кöма, дженьыдик гөрд пася, шап-катöм.

— Кытысь тайöс аддзинныд?.. Кыдзи тайöс кыйинныд?..— волнуйт-чис старик.

Зверь тушасö Лёва шыбитiс южмöм лым вылö. Петя пелька пöрччис лыжияссö, ассыс и ёртыслысь нопьяссö да ружьяессö öшöдiс тув йылö, матыстчис зверöс видзöдалысь дедыс дiнö, кутiс сийöс гырдыдзöдыс да зэв збыльысь юалис:

— Тэ первой висьтав, кутшöм зверь тайö? А сэсся ме тэныд вись-тала помсянь помöдз ставсö.

— А сэтшöм зверь тайö: тi кö, шуам, слöйминныд мунны пу увтыс, кöнi вöлi пукалö тайö да кыйöдчö, öнi эськö энö вöлöй танöсь...

— Кыдзи тöдiн, мый тайö пу вылын вöлi пукалö да кыйöдчö?— чуймыштöмөн торкис Лёва, ачыс видзöдлiс зверлөн чукля кузь гыжъяс вылö да жернитöм ёсь пиньяс вылö.



— Сэтшөм нин талөн сямыс: кыйөдчыны, төдлытөг уськөдчыны, код вылө веськалө да косявлыны, а ачыс трус...

— Вот фашистыс!— горөдісны челядь.

— Пашист сяма и эм! А шуоны тайөс санөн.

— Сан! Рочөн, сідзкө, россобаха,— шуис Петя.— Талысь и яйсө, буракө, оз сёйны.

— Рочнад ме ог төд, кызди шуны, а ми нимтам санөн. А яйсө талысь весиг Катшө оз сёй, кутшөмкө аслыспөлөс лөк дук кылө яйсысь, дай куыс донтөм.

— Куыс донтөм, яйыс сёйтөм, а мыйла и кыйим,— дөзымыштіс Петя.

— Мый нө «донтөм» кө да «сёйтөм»,— ёртсө нерыштіс Лёва, коді некор эз каитчыв, мый вөчөма.— Зато лөк зверөс кыйөма, вөрса фашистөс.

— Кыйөма кө, бур нин. Яй и ку згөдитчас,— гажаа шуис старик.

И повзёмысла, мый вермис лоны зэв лөктор, и нимкодъысла, мый тадзи бура помасьөма ставыс, пöрысь мортлөн волнуйтчана гөлөсыс кажитчис томмөмөн.

Кузь гөна сан абу на удитөма ёна кынмыны, и медым бöрыннас эз ковмы сывдыны, старик пырысь-пыр жө заводитіс кульны сійөс. Кулиг-мозыс пöрысь вöралысь кывзіс Петялысь збыль «помсянь помөдз» вись-талөмсө да гөбөрвоис, мый сан, вөлөмкө, сэтшөма ылалөма сәні ветлысь йöраясөс кыйөдөмөн, весиг абу казявлөма кыйсысьсясөс. Қазяліс кө, дерт, пышійс. Сан сөмын кыйөдчөмөн да пу вывсянь төдлытөг усыласьөмөн кыйсө, а мути ветлігөн ружьеа мортысь пышійө.

Қор Лёва торкліс ёртсө да висьталіс, мый первой сійө лыиис и тэр-масигас ружьеыс, вөлөмкө, зарядитөма картөчөн, дед скöрыськодь шуис:

— Вöрын ветлігөн быдтор вылө колө лоны дасьөн: öти стволыс медым пыр вөлі зарядитөма öтка пуляөн, а гырысь зверь коктуй кө аддзан, кыкнан стволас öтка пуля пукты. Тэрмасыны ни повзыны некор оз ков.

— Көть и ошкөд паныдасян? — юалис Лёва.

Арнас на, первой лым вылын, найө Петякөд аддзылісны ош коктуй, дыр туялісны зверөс, но пемдіс да лон энөвтны. А мөдысь кайигкежлө лымъялөма, коктуйыс тырөма, и ош гу аддзыны детинкаяслы эз удайтчы. И өнөдз на Лёвалөн юрсыс эз петав мөвп—қорсыны ош гу.

— Тöлын сыкөд он паныдась, өні сійө гуын куйлө, певсө нөнялө, вөтлан, да оз пет. А, шуам, тулысын либө арын көть и сыкөд паныдасян, эн повзы, сөмын аслыд колө лоны дасьөн...

— Кыкнан стволад медым өтка пуля вөлі, да өд?— торкис Петя.

— Миян кыкыслөн нель ствол. Сідзкө, любой зверос вермам вод-  
тöдны зарядитчывтөг,— збоа шуис Лёва.— Дерт, он кө повзвы да он  
тэрмась, сэки и плешкас веськалан.

— М-да,— кыз синкым увтйыс видзөдліс Лёва вылө Пиля дед.—  
И ачыл кө он зевайт... Бать менө зэв прөстөя велөдліс не повны ошкысь...

— Кыдзи, кызди?

— Час, пырам да висьтала,— санос кульом бөрын кисө лымйөн  
мыськигмоз көйысис старик. Бытьёкө быд вөрзыштөм сылөн вөлі водз-  
ывь артыштөма. Ставсө вөчө тэрмасьтөг, лабутнөя.

## СТАРИК ÖЛÖДÖ ЧЕЛЯДЬÖС

Мудзөм детинкаяслөн оз узьсы, виччысьоны, кор дедыс дугдас ням-  
лясьны да висьталас, кызди велөдчыны не повны ошкысь. Вот коркө  
дедлөн сөйсис, сийө нөрвчис нар вылө да заводитис:

— Бать менам вөлі чотө, өти кокпöлыс чеглөма сортовка дорын.  
Ачыс зэв скөр. Гашкө и, дас арсянь сийө катөдис менө вөрө, петкөдліс  
чөстуйяс. Кор доймылөм кокыс мөдас юкавны, сийө мурзигтыр куйлө вөр  
пывсянын, а менө ыстас чөстуй видлавны.

— Дас арөсасө!— горөдчис Петя.

Лёва тувкис сылы гырджанас: ланьт пө да кывзы.

— Колөкө и дас кык нин вөлі, ог помнит,— водзө висьталіс Пиля  
дед.— Öтчыл арын ме вөлі кытшовта чөстуй кузя, пельпом сайын ружье.  
Вои өти лэч дорө, видзөда, пөтка пыралөма, пасьталаыс гөн, и весиг лэч-  
кыс абу. Муні водзө, кымынлаө пөтка абу пыралөма, быдлаө куш гөныс  
кольөма. Татшөмторйыс ме дырйи некор на эз вөвлы, и эг төд, коді гуся-  
лөма. Ме лэччи да ставсө тайөс висьталі бательы. «Он кө ви сийөс, өні  
он мын сыысь. Час, петкөдла ме сылы, кызди ветлөдлыны йөз угодыө-  
ясөд да пакөститчыны»,— шуис сийө. Ме первойсө эг гөгөрво, кодлы мый  
сийө көйө «петкөдлыны». Бөрын сийө меным висьталіс, ош пө тайө пакөс-  
титчө. Менам весиг юрсийө сувтліс, кок кусыньяс кутісны сырмыны.  
«Паныдаси кө ме ськөд»,— думайта ачым. И өнөдз на помнита—вой-  
быд ошкөс вөталі, пышьяла сыысь и некытчө ог удит. Асывнас бать сетіс  
меным зарядитөм нель патрон да шуө: «Ортсы зептад пукты, а кор тшөк-  
та, өтиөс вомад босьт, ружьеыл заряда нин». И нуөдис менө лэчьяс вид-

лавны. Да эз сійö туйöд, кыті ветлывлам, а мöдарсянь катöдiс медвылыс чöскöдз. Вот ми лэччам чöстуй кузя, шуи тай нин, кайимсö ми мöдлаті. Лэччам ньöжйöник, бать меным шöпкöдö: «Öнi сійö мянлы паныд кутас локны, мыйöн аддзан, сайöдчы пу сайö да зепсыд öти патрон вомад босьт, öдйöджык удитан зарядитны». Ме зэв ёна пола, и окота аддзывны, кодi мянлы паныд кутас локны. Бать казяліс менсьым полöмöс да бара шöпкöдö: «Кöч сьöлöм, некод тэнö нинöм оз вöч, ме дiнын мыйысь полан?—«Ньöти ог пов»,—шуа ме сылы, а аслам кывйöй оз артмав. «Бiлiсянь эн лый; кывзы, кор ме шуа куимысь: «Тше-тше-тше», коймöдысяс и лый да пель дiнас метитчы»,—водзö шöпкöдö сійö. Асьным пыр надзöник лэччам. Некöн нинöм абу. Ме нин рад сы вылö... Воим öти лэч дорö, сэнi тар куйлö. Сiдзкö, талун абу на кытшовтöма... Друг видзöда, мыйкö быттьö пыркнитчис. «С-сс»,—шуис бать да юрнас довкнитöмөн индiс меным пу вылö—«сайöдчы пö». Ме сувтi пу сайö, веськылдаторсяньыс чургöдi ружьеöс—сэки ме вöли бура нин лыйся. Видзöда. Ош патрайтö мöд лэчкö пырöм пöткаöс, юрсö пыркöдö, лапаяснас чайшö. Ылынкодъ на, но бура тыдалö. Сулалам, виччысям, кор сылөн öбедайтсяс. Полöм быттьöкö бырыштiс, сöмын кок кусыньяс тiралыштöны да лолавны сьöкыд. А кор сійö вöрзис да нювсигтыр мöдiс локны чöстуй кузя мянлань, ме кынми пу бердас... Со нин сійö кызь воськов сайын, а бать век оз шыась. Друг ош сувтiс: буракö, кыліс дукнымöс либö аддзис бательыс вöрзыштöмсö лыйны лöсьöдчигас. И ме вöтын моз кылі «Тше-тше-тше» да гымöбтöм-луйöм, сэся пезьгöдi. Порох тшын пырыс тыдовтчыліс, кызди ош сувтліс кык кок йылас, равöстiс вöртырнас да давай котöртны мöдарлань. «Босьт вомсыд патронтö, зарядит... вöтöд, вöтöд!»—ош моз жö равöстiс бать. «Пиля, вöтöд!»—ыджыда ёрчыштiс сійö, кор аддзис менсьым падмöмöс. Батьысь ме повзи ош дорысь ёнджыка. Мунiгмоз зарядитi ружьеöс, зептысь мöд патрон босьтi, сюйи вомö. «Эн пов, вöтöд. Пиля, эн пов, вöтöд да лый!»—бөрвылын равзiс бать. Ошкыд ёна ранитчöма, мунö зэв ньöжйö, ныр вылас усьлö да бара. Ме сысянь воськов нелямын сайын нин. Кызд тай сійö горöдас, сувтас бөр кокъяс вылас да ме вылö!

— Ой,—ёртыслы сояс кутчысис Петя.

Лёва, пиньсö йирыштöмөн, видзöдiс дедыс вылö, кодi сувтöма лжоджö да, кияснас шенасигтыр, висьтавлö:

— Ме эг и тöдлы, кызди ружьеöй лыбис пельпом весьтöдз, метитчи

веськыда паськыд морёсас да гымёбті-луйи. Сэссия ачим нинём ог төд, мый лои. Некумын воськов сайын куйліс ош, киргис. Чотігтыр матыстчис бать да, колөкө, нэмнас өтчыд шуис: «Молодец, муса пи, тэысь вёралысь лоё».

— И ошкыд кулі?— пыдысянь ышловзис Петя.

— Эз кө кув, эз вод,— дедыс пидди скёрысь шуис Лёва.— Кор тэ висьталан, кывзёны, а ачыл он куж кывзыны.

— Сэссия нинём,— бөр нар вылө пуксис Пиля дед.— Та бёрын эз нин сырмывны кокъясөй ошкыдкөд паныдасигөн. Бать регыд кулі, и дас квайт арёссиянь өтнам куті вёравны.

— А өгнад вилывлін эн оштө?— эз эновтчы Петя.

— Вилі... душ-мөдөс.

Өта-мөдсө торкалігтыр детинкаяс мөдісны юасыны и кутшөм ещө эмөсь сан кодь лёк зверьяс, кодьяс кыйөдчөны да фашистьяс моз төдлытөг вермөны уськөдчыны войтыр вылө, и кызди велавны лыйлыны репасын пукалысь тарьясөс.

Пёрысь вёралысь кызди кужис висьтавліс вёрын олысьяс йылысь, найөс кыйөм йылысь.

— Миян вөръясын ещө олө сан кодь жө мудер да горш зверь — вөркань,— висьтавліс дед.— Нырыс и вомыс, синмыс и пельыс дзик руд сера каньлөн кодьөсь, сөмын тушаыс ылжыдджык да кокъясыс кызөсь. Сэссия быдлаті кань кодь, сы вөсна и шуоны вөрканьөн...

— А мыйла эськө йөрасө лыйны оз позь?— друг торкис сійөс Лёва.

— Ай йөраөс позьө, мыйла оз позь. Сөмын колө разрешение босьтны да кусө и яйсө сдайтны.

— Мыйөн төдан энъ али ай?— эз терпитсы Петялы.

— Айыслөн э-э-та пасьяаөсь сюръясыс,— шергөдөм чуныаса кыкнан кисө юр весьтөдзыс лэптылөмөн да өтарө-мөдарө паськөдлөмөн петкөдліс дед,— дай уна вожаөсь.

— Ми тай нө талун кыкөс аддзылім да кыкнанныс сюртөмөсь вөліны,— шыасис Лёва.

— Гырысьясыс өні сюртөмөсь, збыль,— кватитчис старик,— недель куим-нөль сайын налөн сюръясныс усины, а мартын выль сюр мөдае петны. Но томджыкъясыс и өні на сюраөсь. Ті, буракө, пёрысь йөраясөс аддзылөмныд, гырысьясөс...

— Зэв гырысьоьсь, со мый джуджтаоьсь,— нар вылө чечыштіс да пөтлөкөдз лэптіс кияссө Петя.

— Во-во,— лэптөм ки вылас видзөдліс пөрысь вөралысь да содтіс:— Эньыс рамджык и сылөн нырвомыс мичаджык.

— Мөдыс энь вөлі,— мөвпалігтыр шуис Лёва, сэсся быттё мыйкө друг уси сылы дум вылас, и сійө тэрыба матыстчис дедыс дінө да волнуйтчыгтыр шуис:— Дедө, а дедө, ми кө разрешениесө босьтам да өти ай йёра кыям, төдан, кутшөм пөльза лоө, а?

Нар вывсянь джоджө чечыштіс и Петя да дедыс дінө жө сувтіс. Сулалөны найө пөрысь морт дорын, асланыс синъясныс öзйөны, чужөм выланыс кевмысяна юалөм.

Старик ньөжйөник лэдзчысис гыррдзаяс йылас, буракө, көсйыліс нин водны, сэсся мудзпырысь бөр веськөдчис, юрсяныс кок улөдзныс некымынысь видзөдліс сы дінын педзысь челядь вылө.

— Сы ыджда тушасьыд пөльзаыд, дерт, ыджыд,— мыйкө думайтігтыр шуис сійө.— Но абу на өд зэв кокни кыйнытө сійөс дай кодлыкө ковмас яйсө лэччөдлыны.

— Мый нө сійөс кыйнысө?! Талун ми вермим кыкнан йөрасө вины, позьө кө вөлі,— кияснас шенасис Лёва.

— Талунъя кодь удачнөй луныс, пиянө, колөкө, сэсся и нэмнаныд оз лолы,— торкис сійөс старик.— Таръясөс лыйөмныд, йөраясөс аддзылөмныд, санөс кыйөмныд. Гежөда удайтчывлө татшөмыд. Ме вот нэм ветлөдла вөрөд, а сөмын том дырйи удайтчывліс кыйны гоз-мөд йөраөс. Кузьөсь өд налөн кокъясныс! Сюсьөсь налөн пельясныс!..— лыддьөдліс сійө да сэсся юалис:— А разрешениетө сетасны-ө?

— Мыйкө тай шуан жө! Кыдзи нө разрешение оз сетны. Ми Лидия Ивановна дінө шыасям, сійө ачыс на и судзөдас,— эскөдана шуис Лёва.— Яйсө школа столовөйө, кусө слайтам.

— Дерт жө, сетасны,— отсаліс Петя.— Висьталам, кыдзи-мый, гашкө и, ещө на посылка-мөд позяс мөдөдны Житомирса челядьлы да и школа столовөяд яйыд згөдитчас. А лэччөдлөм вөснаыд тэ эн шогсьы, дедушка. Ми абу өтнаным.— Петя бергөдчис ёртыслань да мөдіс лыддьөдлыны чунь вылас:— Вова, Миша, Сеня, Вася... Миян звеноын кымын пионер, кодъяс эськө вермасны яйла кайлыны?

— Лэччөдлысьыд сюрө, кыйнысө колө-а,— вочавидзис Лёва.— Позьө на өд и мукөд звеносаясөс катөдлыны.

— Пионеръясös кöсьянный вөрö катöдны?— чуймыштіс Пиля дед.— Этатшöмъяссö, — петкөдліс сійö кинас джоджсянь метр вылнаті. — Нинöм оз артмы. Ас выланыд кö надеяныд абу, разрешениетö энö и босьтöй.

— Мыйла сэтшöмъясös?— повзыштіс Петя дед кывъясысь.— Ми öмöй ичөтöсь? Вова да Сеня весиг абу нин пионеръяс, а комсомолецъяс.

— Куим недель мысти ми асьным комсомолецъяс лоам,— быттö сідз-тадз пасйыштіс Лёва, ачыс бөр пуксис нар вылö, синкым увтыс видзöдіс дедыс вылö, виччысис, мый сійö шуас. Комсомолö пырöм йылысь сёрни на костын эз на вöвлы, и детинка эз тöд, кызди видзöдлас та вылö пöрысь дедыс.

— Мыйла нö стöч куим недель мысти?— юалис сійö.

— Ми сетім... м... Ми кöсьям сетны,— другыслысь сы вылö крута видзöдлöмсö казяліс да джөмдыштліс Петя,— да, кöсьям сетны заявление Ленин кулан лун кежлö. Примитасны оз эськö, кызди тэ чайтан?— дедыскöд орччөн пуксис сійö да топöдчис сы дінö.

«Кутшöм мелі»,— думыштіс Лёва, коді сьölöмсяньыс радейтіс дедö, но некор эз кужлив петкөдлыны асьыс чувствояссö. И öні сійö вежаліс другыс вылö.

— Тіянös, комсомолö?! Ог тöд,— падъялыштіс Пиля дед.— Ті кыкнанныд бур сьölöмабсь, смелöсь. А ме нö мыйөн тöда, мыйяс нöшта колöны комсомолнад лоны. Ме могысь, некутшöм пальша тіян абу, школааныд кö ставыс лючки-ладнö...

Петя висьталіс, мый велöдчöны найö бура. Аслас пö, Петя Қозловлөн, öти «тройка» сöмын математикаысь, да и сійö оз ло локтан четвертьын, а сэсся пö ставыс «четвёрка» да «пятёрка», а Лёва Чаринлөн пö весиг ни öти «тройка» абу. А поведение кыкнанныслөн зэв бур. Петя, дерт, эз висьтав, мый сійö коръяскöкө ылавлывлö футболөн ворсны да весиг пропускайтлывлö урокъяс. Та вöсна и нюмъөвтіс Лёва, но нинöм эз шу.

— Но и мый нö сэсся шөгсянныд? Водöй да узьöй, комсомольяс. Аски бара водз чуксала...

— А йöратö кыям, дедушка,— кызкө ас тöдлытöгыс меліа артмис Лёвалөн, весиг старик казяліс тайös да нюммуніс.— Қыйдöсыд öд эм нин мянлы лэччөдмөн, аски жö лэччылам да босьтам разрешениесö,— кевмысяна гөлöсөн шуис сійö.

— Лэччодмёныд эм,— сөгласитчис дед,— позыё и лэччывны. Но раз-  
решение босьтны ог тшөкты.

— Мыйла нё?

— Босьтан да он кё вермы кыйны, юръяндзим лоб. Йёраясыд талун  
танось вёліны, а аски кызь верст сайын лооны. Вётлысьны ме ог вермы-а.

— Но, сы ылнаодз оз жё мунны,— юрсё пыркнитис Лёва да бёр пук-  
сис нар вылө.

Дыр на кык друг кевмысисны стариклы, но сійё вайёдалис пыр  
выльысь-выль помкаяс да чорыда сулалис ас кыв вылас. И медбёрын  
веськыда шуис:

— Верманныд ещө энъ йёра вины, ті вокыдлөн артмас. Сэки мый  
мёдам вочны? Бёр ловзёдны?!

Тайё нин вёліны вывті чорыд кывъяс. Лёваос быттьо тойыштисны  
нар вывсьыс. Көмтөм кокнас сійё чеччыштис му джоджө да пёся висъ-  
талис:

— Тэ нё, дедушка, кодъясөн миянёс чайтан? Ми — пионеръяс да  
сэтшөмтор огө вочой ни огө вермой вочны. А өти ай йёраос кыям и яй-  
сё лэччөдлам да, кытчө тшөктасны, сдайтам.

— Тэныд нё, дедушка, кодныс жалдыжыкөсь: өти ай йёра али че-  
лядь?—мөдарладорсянь атакуйтис дедсө Петя.

И код тодас, мыйөн эськө помасис тайё вензёмыс: колөкө, ковмис  
сдайтчыны пёрысь мортлы. Но тайё здукас Катшө никөстис нар улын,  
чепөсйис өдзөс дорө да мөдис гыжъявны өдзөссө, вөйысьны ывлаө.

— Кодкө нё локтө али мый?— чуймисны челядь.

— Кутшөмкө зверь, көнкө, яй туша дуктө кылис да прөйдитис  
матити,— висъталис дед.— Петалөй, видзөдлөй.

Детинкаяс падмыштлісны, сэсся Лёва чужйөмөн востіс  
өдзөссө, Катшө чеччыштис порог вомөн да сунис пемыдас. Восьса өдзөсөд  
пуркнитис еджыд ру, а сы сайын тыдовтчис пемыдлөз гу. Кытчө сэтчө  
петан!

Шай-паймунөмөн Петя видзөдліс другыс вылө: лысьтам ог пө петав-  
ны. Лёва нинөм эз шу, сійё тшайподөн көмасис, фуфайкасө чөвтис пель-  
помьяс вылас, босьтис пельбсын сулалысь ружьесө да петіс. Петя — сы  
бёрся. Сувтісны, кывзёны, видзөдоны. Кельыдлөз сэзь небесаас пасъ-  
тала югъялөны кодзувъяс. Войвывладорас дөлалысь занавес вылын моз  
өта-мөд бёрсяыс вөтлысьөны, панласьөны лөзов-югыд гыяс, быттьо эзысь

зэр киссё кольтаясөн, а улисяньыс, пемыдинсяньыс, кодкө вешталё тайё кольтаяссё первой ётарё, сэсся мёдарё. Шувгыштё парма.

— Кутшом мичаа ворсё талун небесаыс, оз жё прёста шуны тайё ворсёмсё северной сияниеён,— любуйтчис Петя.— Збыль, сияйтё и эм.

— Аски кодздодас ещё ёнджыка,— сэзь небесасё кытшовтис синъяс-нас Лёва.— Пырам, некод, буракё, абу.

— У-у-у-ы-ы-ы, у-у-у-ы-ы-ы,—вөр шувгём динас сорласис мёдпөлөс шы, сийё кылыштис съод вөр шёрсяньыс да вочасён ланьтис.

Петя кутис мышкёдыс ёдзёсод пырысь ёртсё.

— Кывзы, кывзы, мый тайё?

— Воркутасянь изшом тыра поезд мунис,—висьталис мёдыс да солтис:— Сэзь, вот ылісянь и кылё! Корттуйёдзыд, колёкё, кызь километр лёё.

— И тайё войся поездыс отсасьё фронтлы, да ёд Лёва? Быд пельёс-сянь сэтчё мыйкё да мыйкё нуоны.

— Изшомыд ёні нянькөд ёткодь.

Та кості пуяс дінын вуджөртчис пон, нырсё лэптылёмён видзөдліс челядь вылё,—пөръясси пё, некод абу вөлёма,—чеччыштис джуджыд порог вомён да мыжапырысь водіс аслас местаё — нар улё, гор-дінё. Пырисны и челядь.

— Ме чайта, руч шиннялё, сийё ёд зэв ныриса, кылё яй дуктё, час аски видзөдлам,— шуис старик.

## ЛЫМ КОДЬ ЕДЖЫД ЛЭБАЧЬЯС

Аскинас дед керыштис санлысь яй тушасё нельпельё, куим тор шы-битіс пывсян йирк вылё, нельёдсё көрталіс бечеваён, медым бечеваыс судзас лыжи бөр помөдзыс да, лым вывті кыскигтыр, нуис вөрё. Лым вывті кыкис сы могысь, медым руч либё тулан ылісяньджык кыласны яй дуксё да туяласны сиалём капкан дінөдз.

Прөсек вылё петём мысти Лёва шуис:

— Дедлы абу окота ноксыны уна яйён, сы вёсна и дугөдө йёра кыйёмысь. Көть и партизанавлёма коркё, а сознательностьыс абу. Кыям ми и сятөг. Талун ветлам разведкаён: төдмалам, көнджык найё олоны, и огё повзёдөй. Аски жё лэччылам гортё да босьтам разрешение.

— Дедыд төдлытөг?— чуймыштөмөн юалис Петя.— Яй лэччөдлөмтө өд сийө казялас жө. Қызди нө сытөгыс?

— Разрешение кө сетасны, а ме төда, сетасны, да виам кө, сэки ачыс на рад лоө. А яйсө лэччөдлыны ми өд и веськыд туй на вермам пискөдны, медым вөр керка дорө не кежавлыны.

— По-пионерски-ө, колө шуны, по-комсомольски-ө тайө лоө?— падъя-лис Петя.

— Эн өмөй кывлы: мый мунө общөй пөльза вылө, ставыс «по-пионерски».

— Кывльвлі эськө да,— нюжмасис Петя, но веськыда өткажитчыны эз лысыт, полис, мый ёртыс бара шуас, повзин пө. — Лэччам да ми юалам та йылысь Лидия Ивановналысь, ладнө?

— Юалам, колөкө, сөмын огө висьталөй, мый дед оз төд та йылысь. Мунам...

И детинкаяс исковтисны лыжня кузя. Мунігчөжныс весиг ни өти тар эз лэбзъыв репасысь. Повзьөдлөм мыстыис найө, буракө, поздысялөмаөсь мөдлаө.

Со и тыдовтчис пөрөмин, сәти шондіа нин, и кызд расъясыс да бадь кустъясыс лөсталөны зарниөн.

Йөраяслөн төрытъя коктуясыс тырыштөмаөсь нөбалөм лымйөн, и гуран пыдөсыс оз тыдав да он и төд, кодарлань найө мунөмаөсь (йөралөн кокыс мөслөн кодь жө вожа гыжъя, и гыжтуй сертиис төдчө, кытчаны мунөма). Но челядь адзылісны төрыт налысь төвзьөмсө да мөдөдчисны сәтчаны, кытчаны найө пышйисны.

Коз вөрын өтлаасис некымын йөралөн коктуясыс. Тыдалө, найө унаөи вөлөмаөсь тәні и повзьөдөм бөрад ставныс мунөмаөсь өти туйөд, воргән жугөдөмаөсь лымсө. Қынмытөминъясті найө пыдөдз вөйласьөмаөсь да резөмаөсь нәйтсө.

Дыркодь нин мунісны челядь, но зверьяс пышйөмаөсь пыр медся сук вөрөдыс, весиг өтчыд абу петалөмаөсь эрд вылө либө гежөд вөраинө, и пискөдчыны на бөрся вөлі зэв сьөкыд.

Та пыдди Катшөлы талун вөлі кокни. Эрд дорын на көзяинъясыс сылы петкөдлісны чуньнысө да тшөктисны бөрын мунны и ни өтчыд эз горөдлыны: «Корсь! корсь!» И сөмын өтчыд Катшө ылавлі: йөраяс мунан туй вомөн вуджөма ур, и пон төдлытөгыс уськөдчис сы бөрся да вөртырнас мөдіс лявзыны ыджыд коз улын: «ув-ув-ув, ув-ув!»

Детинкаяс бергөдчисны сы динө, гөгралыштисны коз гөгөр, Лёва ичөтик чер тышкөн некымынысь тоньобтис лосьштөм козийö. Петя видзө-дис пуö, но сук лапьяс костөд нинөм оз тыдав, а вешйыштны да ылісянь-джык видзөдлыны вöлі некытчö: дзик орччөн сулалісны бара жö зэв гы-рысь козьяс. И урсö лои эновтны.

Öні Катшö восьлаліс йöраяс мунöминті туй юж вывті моз. Лэдзисны кө эськө сійöс водзылө, дерт, важөн нин сійö вөтөдіс зверьястө, кодьяс со пыр на мунöмаось öти туйөд ни öтчыдысь сувтылөтöг, ни öтчюд йирышт-лытöг, и пыр сук вөрөд, сукинсö корсигөн чукольдлөмаось öтарö-мөдарö. А челядь да пон вөтчисны нин километр нель-вит...

Со öти йöра кежөма, кырсьышталöма пельсь пуяссö, тшöтшөдышта-лөма йывьяссö, а недыр мысти и воргаа туй быри: ставныс разöдчалөма-ось йирсьыны. И ни öти куст абу кольöма, кытчö абу матыстчылөмаось йöраяс. Со и кык гуран орччөн, неуна бокинджык ещö некымын гуран, а ставсö он и вермы лыддыны. Дзөнь табун куйлөма.

— Тані йирсьöмаось да шойччöмаось, гашкө и узисны,—шöппнитіс Петя да зэв радпырысь видзөдліс ёртыс вылө.

— А дед вöлі шуö, кызь верст сайö пö мунісны,—сідзи жö гусьöник вашкөдіс Лёва.— Некытчö найö оз мунны. Қор колö, сэки и позьö кыйны. А öні эновтам найöс... разрешение босьтөдз.— Ид идзас рöма юрсиыс сы-лөн петыштöма шапка увсьыс да мича кытшьясөн сибдалöма руалыш-тысь паськыд кымöс вылас. Тэрмасьöмөн мунöмысла чужöмыс сэтшöма банйöма, мый весиг посньыдик берин чутьясыс гөрдөдыштöмаось. И та-йö гежөдика пукалысь берин чутьясыс, и неуна чангыль нырыс, и мурт-са төдчысь еджгов синкымьясыс, и паськыд кымöсыс вөчисны гөгрöсі-ник чужöмсö аслысьяма мичаөн да мусаөн.

Том вöралысьяс видзөдлісны компас вылө да веськөдчисны асыв-вывлань.

— Р-р-р-ш-ш-ш,— друг кыліс сьöлалөн лым вылысь лэбзьöм шы.

— Тшы-тшы-тшы тшы,— дзик матö пуксис да мөдіс тшетшкыны пöтка. Сійö пукаліс коз ув вылын руд сера ёкмыль кодь, гогийөдліс сорса юрсö да жебиник синьяснас видзөдіс локтысьяс вылө.

Ас төдлытөгыс Петя чургөдіс ружьесö да көсийс нин пезьгөдны.

— Эн лый, йöраястө повзьөдан,— öлөдіс Лёва, и мөдыс ружьесö бөр шыбитіс пельпом саяс.

А сьола, бытёккө тёдис, мый тайёяс абу опаснойёсь, эз и думайт лэбзыны, пукаліс да вежнысö петкөдліс челядьлысь.

— Кор позьö лыйнытö, сэки, небось, он аддзы тэнö,— дөзмөмпырысь сідз-тадз шуыштіс Петя.

Лёва нюмуніс: сійö кыліс ёртыслысь броткыштөмсö да сылы усн дум вылас öти арся лун. Усьöма гөн кодь небыд первойя лым. Кык друг пырисны козья вөрö. Кузь лапьяса коз увьясын тыдалісны на виж нитшкыс, веж корьясыс да вир кодь гөрд пув розьяс. Мөдісны жбыракывны сьöлаяс — «пув сёйысьяс», кызди нимтылісны найёс челядь, кор аддзылісны налысь «öбедайтанінсö».

Петя тэрыба суйис кисö питшөгас, көні, морөс зептас, новлөдлывлө вөлі сьöла пöлян. «Со тай мый вунöма»,— шуыштіс сійö вомгорулас.

Тулысын да водз арын пöлянөн чуксасьөм вылө сьöла первой шыася, сэсся шпоркнитас-лэбзяс да мукөд дырйиыс пуксяс дзик юр весьтад, сөмын босьт. Тöлын шоча шыасьлывлө и пöлянөн чуксалөм вылө оз матыстчы, но мөдас тэрыба ветлөдлыны ув вывтi да гогйөдлыны сорса юрсö. Сэки и аддзан сійöс.

Но пöляныс Петялөн вөлі вунöма гортас. И сійö зіліс аддзыны сьöлалысь пуксянінсö. Кажитчө, стөч пуксис со эсійö пуас, а воан да абу.

А öні со дзик ныр улын пукалө сійö. Но детинкаяс эз лыйны веж петкөдлысь сьöлаөс, весиг эз повзьөдны «сійöс, а чөв-чөлөн зілісны ылыстчыны «йöраяс оланінсянныс». Тадзи чайтісны найö да веритісны, мый налы сюри «йöра оланін».

Дерт, челядь эз вермыны төдны, мый зверьяс, колөкө, недыр йирсьыштөм бöрын да шойчыштөм бöрын бара на мунісны некымын километр сайö. Вермис лоны, мый и öні сюсь пельяснаныс кылісны найö лыжняслысь лым вывтi джажгөмсö да пышйöны, гашкө, со этайö коз вөрöдыс. Но том войтыр вөліны уверенөсь, мый йöраяс танөсь и оз ков найöс повзьөдны. Медся главнөйыс öні веськыда петны прөсек вылө да пасйыны на оланінö кежан туйсö. А прөсек вылө петны татысянь найö вөлі кужöны нин: ориентирсянь ориентир вылө веськыда асыввывлань.

— Мый нө тайö? — шензигтыр видзөдалö гөгөр Петя, ачыс сулалö прөсек вылын. — Эг и төдлө воим.

— Миян, буракö, пыр прөсек пөлөныс мунсьöма йöраяс бөрсяйд,— шунс Лёва да тшөкмуні: прөсек вылын некутшөм лыжи туй эз вөв.

Шай-паймунөмөн сувтісны кык друг да зілісны казтыштны, кодар-

лань найо мунісны пөрөминсянь. Войвывланьо кө, сідзкө вөр керка дорө  
кежан туйыс налөн лунвылын. Мыйла нө эськө дедыслөн лыжи туйыс  
абу?

— Ветлам татчань, сәні адзам,— лунвывлань веськөдчис Лёва,  
сэсся сувтіс ыджыд конда дінө, перйыліс мыш сайсьыс ичөтик черсө, лө-  
салыштіс кос пусө — пасйис йөраяс дінө кежанін.

Дыр на мунісны найо прөсек кузя, ылыстчисны «йөраяс оланінысь».  
Сэсся Лёва друг сувтыштіс да горөдіс:

— Катшө, корсь, корсь!

Лымті собалігтыр пон саяліс вөрө. Челядь чайтісны, мый тасянь  
йөраяс оз нин кывны лыйсян шысө.

Бадь дорьясын мөдісны төдчавны креста коктуйяс, быттьөкө прөш-  
виён кытшалөма бадь гөгөрыс. Регыд и асьныс, прөшви кысыясыс, мө-  
дісны шуркъявны дзик ныр увсыныс. Лымйысь на еджыдджык лэбачьяс  
сибөдасны дас воськов сайо, неуна лыбыштласны, бөр пуксясны. Некедз  
он вермы адззыны пукаліганыс. Водзө мунөмкөд тшөтш найо пыр содіс-  
ны и содісны, жбыракылісны-лэбалісны, быттьөкө уна челядь шыбласьо-  
ны лым мачөн. Детинкаяс пыр вөтчисны, то өтиыс, то мөдыс гыпнитлас-  
ляяс лэбиганыс. Лыйсьөмысь шызьбөм лэбачьяс мөдісны ылөджык пук-  
сявны. Со өти лэбач пыркмуніс лэбигас, тювгысис лымйө. Эз кө сійө  
чпорөдчы бордьяснас, он эськө и адззы. Сөмын нырыс, синмыс да бөж-  
йылыс съөд, сэсся некөн съөд чут абу, весиг кузь гөна кокыс еджыд.

— Нэмөн первой байдөг сюри,— лэбачөс лымйысь лэптис да мөдіс  
видзөдавны Лёва.— Ковмас дедлы висьтавны, сійө лэч пукталас налы.

— Найө, колөкө, сэсся оз нин и волыны татчө да. Аттө, кутшөм  
еджыд! Пукаланінсыс тайөс, пөжалуй, он и лый. Вай ещө вөтлысям,  
көть морт өтиөн оз-ө сюр,— водзлань искөвтіс Петя да регыд мысти  
сувтіс.

— Тайө мый?— кузьмөс чужөм вылас сылөн кынмис и юалөм, и  
падмөм.

— Вомөна прөсек!— юрсө гыжйыштіс Лёва.— Сідзкө миян мөдар-  
лань мунсьө, тайө прөсексө ми эг на вуджлөй.

— Буртор жө, зонмө, тайө прөсекьясыд, йөрын моз ветлан. А тайө  
кө эз вөв, ми эськө, колөкө, жаявтөдз мунім...

— Лыжи туйным эз во да өд казялім жө эськө,— дөзымыштіс Лёва.  
Сійө ньөти эз радейт, кор ёртыс казьтыштіс ылалөм йылысь. Байдөгъ-

яе быттьокö сыліны, öти эз ло. А кор челядь бөр бергöдчисны, лэбачьяс бара кутісны шпоракивны важинсьыс, кодакості кö бөр воалöмабсь сэтчö.

«Еджыд курögьяс» бөрся, кызди нимтіс найöс Петя, вöтлысьöмысь торкис найöс Катшö: сійö неылын увтіс ур вылö.

Том войтыр вөр керкаö воисны талун пöшти тыртöг: öти байдöг да öти ур. Но зато вöліны дөвöленöсь: найö тöдöны йöра оланін, вермасны босьтны разрешение — лыины йöраöс да лэччöдлыны яйсö. Кык друг чайтисны, мый дедыс шензьыны мöдас татшöм этша вайöмсьыд да ещö казялас, мый найö йöраясöс корсьöмабсь.

Шензьöм пыдди дед шуис, мый вöралігөн пö быдсямаыс овлывлö. Сэсся сійö висьталіс, мый тöрыт пö руч и вöлöма пывсян дінад да бөр бергöдчöма.

Санлөн яйыс, вöлөмкö, сэтшöм аслыссяма дука, мый весиг Катшö сійöс оз сөй. Тшыг ручыд, дерт, сөяс, и Пиля дед висьталіс, кызди сійö ылöдас ручöс тайö яйнас.

Челядь решитісны аски лэччывны гортаныс. Налы лэччöднысö пушнина лöсьöдигмоз дед кутіс варовитны руч йылысь. Мудзöм челядь водöмөн кывзисны.

— Ручыд кö велалас гусявлыны капканö сюрöм көчтö, сыысь некызд он мын. Вөрöгыд öд верст ылнаö кыскас көчтö капканнас да вöлисти сөяс. Он кö куж туявны, и капканыд вошö. Октöм капкан вылö кö пуктан көч тушатö—сэтшöм сюся гусялас, мый и капканыс оз пезьды. Улысас кö пуктан, сыв-мöд сайсянь кодйыяс да улысяньыс кыскас. Öд быттьокö кыйöдöма тэнсьыд пуктöмтö.

— Шуöны тай нö, руч пö лыжи туй вомөн оз вудж, а кызди нö эськö октöм капкан дінас локтö?— унзіль гөлөсөн юалис Лёва.

— Кызкö тай ылөдöмыд жö со эсіё ручтö; кызди сійöс кыйин дедушка, көч яйөн жö?— шыясис Петя. Дыр нин сынавлытöм съод юрсныс сылөн пöсьнас котасьлöма да косьмöма пратьясөн. Ёсь тшöкасö сійö пыкöма кипыдöсьяснас да, гырджаяснас нар вылö лэдзчысьöмөн, сюся видзöдö дедыс бөрся. Кызди и вöрын ветлігөн, старик ньöти тэрмасьтöг бөрьяліс куяссö да зэв виччысьöмөн пукталіс öтилаö, быттьокö полис, медым найö эз жугавлыны. «Менам вот пыр тэрмасьбö,— шогпырысь думыштіс детинка.— Бур вöралысь меысь оз артмы».

— Кынöмыс кö сямалас, сійö гор вывсьыд шыд пысьыд яйсö нуас,—

вочавидзис дед. — Этайо ручыд, кодлысь кусо ти видлалінныд, уна көчос менсьым пышйодліс. Кыдзи, думайта, кыйны тэнö. Думайті, думайті, и көч тушатö ме öшöді пу ув йылö да сідзи, медым ручыд судзыштö нисьö оз, а улысас, пу гөгöрыс, нель капкан пукті. Гоз-мöдысь воліс, эз матыстчыв: оз төд, буракö, кызди гусявнытö. Но тшыг синмыд пö тай лэчыд. Кынöмыд сямалö, а сэні син водзад көч туша öшалö. Лун-мöд сайын локтöма, унаысь гөгöртöма неыліті, сэсся судзöдчылöма көчылдла öтчыд-мöдысь да водз кокнас и тальччöма капкан вылад. Пессигас бөр кокыс мöд капканö веськалöма. Кык капканнад ылö он мун! Вои да кын нин вöлі... Быд зверлөн и пöткалөн öд аслас сям...

Пöрысь вöралысь мыйкö ещё на көсйис, тыдалö, висьтавны зверь-пöтка сям йылысь, но кыліс челядьлысь шкоргöмөн узыöмсö да ланьтіс.

## ВЕСЬТАСАЛІГÖН

Пöткаяс да пушнина челядьлы лэччöдмөн. И медым унджык сійöс вермисны лэччöдны, санлысь кусö колисны мöдысь кежлö, медым косьмö.

— Ти он дыр ветлöй? — внукъяссö колльöдігмоз майшасис старик.

— Аски жö бөр каям, каникул чöжыс кыйсям нин, — лыжиасигмозыс шыасис Петя.

— Воам кө аски, сёрөн воам. Колökö, и аскомысь, — скöрысь кодь видзöдліс ёртыс вёлö Лёва.

— Миян аски ковмас школаö ветлыны, гашкö, сэні дыр видзасны, — видзöдлассö казяліс да кызди вермис меліа шуис Петя, сэсся исковтіс.

Недыр мысти исковтіс сы бөрся и ньöжмыд вöраса Лёва. Сьökыд нопйыс кыскис бөрвыв, довйöдліс öтарö-мöдарö. Луныс вöлі гудыр, вывсянь усис паськыд лым, пуяс вылысь төв нöбöдіс лыа кодь чорыд лымчирьяс, чутöдліс чужöмнысö. Кок да кос юкалём серти дед виччысис ульдöм. Лыжи улын муркакыліс. Петя муртса тыдаліс гудырас. Лёва вöтöдлывліс сійöс сöмын сэки, кор мöдыс сувтліс шойччыны. Унаысь нин сувтлісны, весиг кыкысь кымын шойччисны лымйысь вöчöм лабичын. Воисны Давшор дорö. Туйыс таті мыйлакö зэв ыджыда кытшовтö: кежлас шуйгавыв ылö да шор мöдарас бөр локтö весьтасöдз, весиг со лыжняыс тыдалö.

— Весьтасавны кө, джын туй, — друг думыштіс Лёва, видзöдліс

чуяс костод тыдыштавлысь Петя выло, сэсся гораа шуис:— Риск!— да кежис лыжи туй вылысь.

Вылён мунны вöли сьöкыджык, но регыд лои чой горув, и лыжияс асьныс мöдiсны нуны. Лёва думсьыс радлiс, кыдзи сiйö лоö Петя дорысь водзынджык, а мöдыс виччысьтöмысла шармöдас сьöд синъяссö. Шор визьöглань матысмигөн кырйыс пыр лои крутджык. Лыжияс исковтiсны öни сэтшöм öдйö, мый поткöдöм сынöдыс жургис пель водзад, сöмын виччысь пуö люкасьöмысь, он кө удит веськöдыштны, и пасьмунан. Лёва бура кужис веськöдлыны лыжиөн и пелька чукльöдлiс пуяс косттi, беддя кинас видзис чужöмсö росъясысь. Медбөръя крут рöч. Трамплин вылысь чеччыштöм моз лыжияс торъявлiсны лым бердысь да бөр швачкысисны зуркыда... И сöмын сэки Лёва казялiс, мый шор гураныс сы водзын восьса: визулыс да кутшöмкö муртса тöдчыштысь ру сёйöмаöсь лымсö. Бужöд дорöд моз детинка крута бергöдчис да сэки жö аддзис, мый толаыс потi, и син лапнитöм дыраөн лым пластыскöд тшöтш лыжияс лэччисны шор гуранö да быттьökö сразу йизисны сэтчö — сибдiсны, ни бөрö, ни водзö. Лёва тököтьö эз уёт водзлань, муртса удитiс пыксьыны бедьянас. Лыжияс кутiсны вöйны сылысь лымъяс, и регыд мысти кöдзыд ваыс сотыштiс кокъяссö пидзöсбдзыс.

«Со мыйла, вöлöмкö, кытшовтö туйыд»,— чардыштiс мөвп.

Детинка видзöдлiс öтарö-мöдарö.

Шуйгаладор толаыс, кысянь сiйö уси, крут да джуджыд: сылысь дорсö муртса судзан лыжи бедь помөн. Веськыдладорыс — ньывкыджык, но кыдзи сы дiнöдз мунан, кор кокъястö көрталöма лыжияс бердö, а найöс весиг он вермы вөрзöдыштны. Водзладорас и бөрладорас — шорлөн чукльöдлысь воргаыс, сiйö сьöд, сöмын кытъяскö еджыд посъясөн вомöнавлö сiйöс лымйыс. Колö кызкö кайны этайö джуджыд бужöд вылас.

— Лыжияс колö разявны,— шöпнитiсны повзöмысла да кыммöмысла лöзöдöм вомдоръясыс. Детинка мöдлiс лэптыны кокпöвсö, но довтьөвтiс да тököтьö эз усь. «Ноп көтасяс»,— сотыштiс сьöлöмсö. Лёва курччис вомдоръяссö — пыкис доршасьысь синвасö. Морöсас мыйкö пуис да сьöлöмыс доймыштлiс, быттьökö көрт чуныяс топöдлiсны сiйöс. И та вöсна сьöкыд вöли лолавны. Мөвпьясыс корсисны, кыдзи да мый колö вöчны татшöм положениеас веськалысьы. Но татшöм ногаыс нинöм эз сюр. «Этатчö, пидзöс джуджда шорö, ог жö сгинит!»— пиньяссö йирыштiс Лёва.

Йөрмөм морт бара видзөдліс сы дінын стенаон сулалысь бужөд вылө, и друг сылы дум вылас уси, кызди найө челядькөд кодйивлісны лыа бужөдө пач, кодйивлісны сійөс чагторйөн либө куш кион. Лым бужөдыс өні вөлі сы дорсянь өти воськов сайын. Чунь вомлөсөн лыжияс-сө бокног вешталігтыр детинка матыстчис дзик бужөд бердөдзыс, сэсся лыжи бедьнас да кепыся кинас кодйис сэтчө пачкодь розь да пуктіс нопсө. Уджалігас неуна шоналыштіс.

Өні колө вөлі мынтөдчыны лыжиясысь. Тола дорө нөрөвтчөмөн Лёва сьөкыдпырысь лэптіс ваысь первой өти коксө, разис лыжисө, сэсся мөдсө. Лыжияс вылысь лэччөм бөрын ещө пыдөджык вөйи няйтаc. Детинка сувтөдіс лыжи пөвсө лым бердө, мөдсө босьтіс киас да зырийөн моз кутіс кодйины бужөдсө, и регыд мысти артмис ыджыд тшупөд, кытчө колө вөлі кайны да кодйины вылөджык мөд тшупөд. Но сэки жө Лёва казяліс, мый лым тшупөдыс оз лыбөд сійөс: чегъясьөны сылөн доръясыс.

Пөгибө воөм мортлөн думъясыс оз визлавны юрас, а чардалөны. Детинка босьтіс сувтөдөм лыжипөвсө да, өтар-мөдар помъяссө лымйө сүтшкыштөмөн, пуктіс сійөс тшупөдас, өшөдчис сы вылө морөснас да пидзикокасис. Пышина көмсыс да ватнөй гачсыс петысь ваыс вияліс лым вылас, сөнікыс өдйө йизис да артмис зумыдкодь площадка. Вөчны тадзи мөдөс, коймөдөс... и, гашкө, позяс мездысьны тайө нальксыс. Быд надея содтө вын. Мөд площадкасө йизьөдны вөлі сьөкыдджык, некыз судзөдны да лэптыны васө. Но өні төлкыс вөлі сюрөма нин. Лёва пөрччис кушенча кепысьсө, разис пышина көм көвсө да сійөн көрталіс кепысьсө лыжи бедь помас. Тшукнитлас сійөс ваө, лэптас, пыдзыртас да бара. Тадзи йизьөдлывлөны вөлі дадь сювъяс. «Лөвъя морт некор оз йөрмы!»— ачыс асьсө ышөдіс детинка да уджаліс мыйвынсыс.

Петя исковтис чөй горув, вуджис шор вомөн, кежыштіс туй бөкө, йөткыштіс мыр вылысь лымсө да пуксис шөйччыны. И сөмын сэки казяліс: мыйлакө ёртыс кольөма ылө. Пыр овльвлө вөлі, мый пуксьөм мысти и вөтөдас, а өні со абу и абу. Мый нө вермис лоны?! Гашкө, ёна мудзис да шөйччө көнкө неылын? И Петя нин думсыс видіс асьсө, мыйла эз бергөдчывлы да видзөдлыв. Ёд некор на татшөмыс эз лолы да он и төд, мый колө вөчны. Да и Лёваыс сэтшөм жө, оз нин шыась, мыйкө кө лөө. Петя дыр на пукаліс шай-паймунөмөн, виччысис, сэсся чеччис да мөдөдчис ёртыслы паныд, ачыс видзөдө, оз-ө лок сійө көнкө либө абу-ө кежөма шөйччыны.

— Эк, кутшом сюсь сийо, весьтасалома,— шензис Петя, кор воис лыжи туйяс вожаланинодз, сэсья кежис да мододчис Лёва туйод.— А ме и думыштыны эг кужлы, йой,— видис сийо асьо.

Шор дорё воигон, трамплин кодь роч йывсянь на, Петя адзис, мый лыжи туйыс помасьо буждоминё да сэни воряштё кутшомкё съод тор. Детинка крута штопоритис лыжияссё, матыстчис бужод дорё, кысянь мыччысьлывлё, вёлөмкё, лыжи пом.

— Лёва?!

— Петя!

Водзё ни оти кыв шутог Петя модис отсасьны ёртыслы — порччис лыжияссё да кутис таявны лымсё, вочис медборъя площадка.

Кор Лёва кайис сэтчө, сувтис другыскод паныд да видзөдлис сылы чужом вылас, быттьокё косийс тодмавны, мый думайтё сийо, сэсья весь-кодпырысь шуис:

— Вбралигон быдторийис вермас лоны. А тэ кызди кужин корсьны менё?— юалис сийо. Гөлөсас сылөн кылис дзэбны вермытом меллун да радлун, чужом вылас ворсис долыдлун.

— Вошин да. Ог од коль. Кежан туйтё од адзис. Вай биасьлам, косьтысьышт,— төждысис Петя.

— Оз ков, гортын косьмас, мунигон шонала.

— Мыйон нё мунан, кони лыжипөлыд?

И сэки найо казялисны, мый лыжипөлыс дай ноппыс Лёвалон эстон на, улын, руалысь шор бердас.

Петя кулыштис сямод, коз улысьясысь чегьялис кос увьяс да биасис мыр дорё. Лёва шонтысигкості сийо катөдис нопсё, лыжипөвсё. Сэсья матыстчис тшөтш би дорё да модис сывдыны другыслысь лым сорон йизьом лыжияссё, кодыасон нинөм вөлі и думайтны мунны. Сывдом ббрас сийо чышкалис найос кепысьтом кинас да сувтөдис кынтыштны.

— Йора яй кө лэчөддыны, дзик ковмас корсьны весьтас туй, абу жö быдлаті восьса,— руалысь кокьяссё би дорланьё отарё-мөдарё вешталігмоз шуис Лёва.— Йизьодам эстшөминсё,— юнас доккнитис сийо сэтчань, кыті шорыс сялкөдчигтыр пырө вөлі джуджыд лым улө,—да пос вөчам!

— Сэтчө позьо,— сөгласитчис Петя,— но колө тыртөг мунигон.

— Тэ тай өні тыртөм, мун вуджав.

Петя шөйөвошөмон видзөдлис другыс вылө, оз-ө шутит сийо, өні на

муртса ловйон мыні, а бара нин косьйо выль туй писькӧдны. Но ӧткажитчыны эз вӧв лӧсьыд. Сійӧ и ачыс тӧдіс, мый кытшовтны ӧні важ туйӧд ылын, а мӧдарас лыжняыс вӧлі зэв матын.

— Ветла,— лыжияс вылас сувтіс да исковтис Петя.

Бӧра-водза вуджаліс сійӧ шор вомӧн да гӧгӧрвожс, мый некутшӧм опаснӧсть абу.

Лёва тапкӧдыштіс пидзӧсьяссӧ, буракӧ, шоналӧм ва гачыс сотны мӧдіс яйсӧ, сэсса юалис:

— Но мый, кӧрттуй пос кодъ? Ме ӧд немвиччысьтӧг татчӧ веськалі. Но, мунам.

— Сэтчӧ он вӧй,— гажаа шуис Петя,— некутшӧм йизбӧдӧм оз ков.

И збылысь, найӧ регыдӧн петісны асланыс лыжня вылӧ. Лёвалӧн косьмытӧм гачьясыс кӧть и бара йизисны, весиг потласисны кок кусынь-ясӧдыс, кӧтасьӧм кӧм пытшкас емалісны кок чуньясыс, но сійӧ эз норась, а восьлаліс мыйвынсьыс, весиг шойччыны пуксьывны оз позь — кынман. Гортас воигӧн нин сійӧ шуис туй юж вывті орччӧн мунысь Петялы:

— Тэ кӧ эн во, ме эськӧ ӧні на, пӧжалуй, сәні вӧлі. Сӧмын тэ некодлы эн висьтав та йылысь, ладнӧ? Весиг дедыдлы. Сійӧ пыр и шуас: рака-яс пӧ сӧмын веськыда лэбалӧны. Кӧть и риск вӧлі, а весьтасалан туй сюри.

— Висьталӧмъяс оз лоны! А тэнад кокыд ёна кынмӧ?

— Паччӧрын шоналас!

Петя видзӧдліс ёртыс вылӧ. Ичӧтик берин чутъяса гӧгрӧс чужӧмыс сылӧн эз вӧв челядлӧн кодъ, а кызкӧ аслыснога серьёзной, весиг скӧр. Вӧсныдик упрямӧй вомдоръясыс сэтшӧм топыдӧсь, мый муртса тӧдчыштӧ кык гӧрд визь. Сӧдз лӧз синъясыс видзӧдӧны збоя да сюся, быттьӧ мыйкӧ пыр кыйӧдӧны, зільӧны аддзыны сэтшӧмтор, кодӧс оз аддзыны мукӧдыс.

«Да, тәнӧ, пӧжалуй, нинӧмӧн он повзьӧд»,— друг думыштіс Петя, и сәки жӧ син водзас сувтіс татшӧм картина.

Локтысь арыс серӧдлӧма нин вӧрлысь пемыдвез паськӧмсӧ гӧрд да виж дӧмасьясӧн. Зіля пӧльтӧ войтӧв, вомӧнӧн тшуплӧ Эжвалысь гӧрӧм му кодъ морӧссӧ. Челядь моз дзевсьясьомысь ворсӧ кельдӧдӧм шонді: нюмъѣвтӧм моз сійӧ быйкнитлас-мыччысьлас да ӧдійӧ бӧр саялас еджгов вурун пласт кодъ кымӧр сайӧ.

Лёва, Петя да ещӧ вит-квایت детинка пыжӧн вуджисны Эжва сайӧ, мунісны Ёвты ягӧ тшакла. Луннас зэрмис, кутіс буавны войтӧв.

Брѡдва кѡтасьѡм челядь недыр вотчисны вѡрын да сѣся бѡр лѣчисны пѣж дорѡ — гѡгѡр пу ни палич: биасьны некытчѡ. Кодсюрѡыс няргѡны нин кынѡм сѡмалѡм йылысь, тѣрзѡны-кынмѡны, чужѡмъясныс лѡзѡдѡмаѡсь, ловгѡнныс сувтѡма.

Воисны ва дорѡдз — видзѡдѡны. Эжваыс дурмѡма. Пывсян гыря гыяс быгьясьѡны, резсьѡны, сьѡласьѡны, быттьѡкѡ скѡралѡны-косясьѡны ѡта-мѡдныскѡд.

Мый вѡчны?

Лѣва сулалѣс лыа берег дорын, видзѡдѣс пессьысь ва вылѡ, тыдалѡ, мерайтѣс синнас — ылын-ѡ мѡдар берегѡдзыс.

— Кодѣ сынны пуксяс? — юалѣс сѣѡ недыр мысти.

— Ме,— шуис Петя.

— Сѡмын кѡть мед кутшѡма оз качнит, сыннытѡ эн дугды, ѡпаснѡйтѡ эн энѡвт,— ѡлѡдѣс Лѣва.— А тѣ энѡ полѡй, кужан кѡ веськѡдлыны, некутшѡм гыяс оз вермыны путкыльтны пѣжтѡ. Кѡть и койыштас — энѡ повзѡй,— шыасис сѣѡ посныдджыкъяс дѣнѡ.

Найѡ видзѡдѣсны Лѣва вылѡ сѣтшѡм доверчивѡй синмѡн, кутшѡмѡн вермѡны видзѡдны посни челядь асланыс вѡжак вылѡ, да, ѣна тшѡктытѡг, пуксялѣсны ваѡ лѣдзѡм пѣжѡ. Сѡмын ѡтнас Ваня повзѡм синмѡн видзѡдѣс Лѣва вылѡ да долис:

— Да ог, ме ог пуксьы, ог лысьт.

— Мыйысь полан, ме кѡ ог пов?— юасис Лѣва.

— Вѡйѡмысь. Мам шуис, вѡян кѡ пѡ, гортѡ эн лок,— ыджыда бѡрдзис Ваня.

Мукѡд дырйи кѡ, дерт эськѡ, серамвыв лѣптѣсны Ваняѡс, но ѡнѣ «вѡйѡм» кывйыс быдѡнлѡн бергалѣс юраныс, и весиг некод эз нюмѣвт.

— Кытчѡ нѡ воштысян, ѡтнад кольччан али мый?— скѡрысь юалѣс Петя.

— Берегѡдыс котѡрта, а пѣжѡ ог пуксьы.

Вичысьны вѡлѣ некѡр. Лѣва кутѣс пельпомѡдыс Ваняѡс, юрцас ловкнитѡмѡн корис ас дѣнас Петяѡс, и найѡ, кѣѡдыс да кѡкѡдыс кутѡмѡн, детинкаѡс пѣртѣсны пѣжѡ. Ваня водѣс кымыньѡн. Мукѡдыс пѡрччалѣсны шапкаяснысѡ да лѡсьѡдчисны ва койны.

Лыаладѡр ваыс вѡлѣ ляпкыдджык да ѡмѡльджыка гыалѣс. Но кор воисны ва шѡрѡ и гыясыс мѡдѣсны вылѡдз качѡдлывлыны пѣжсѡ да бѡр лѣдзны-исковтѡдны, быттьѡкѡ ва пѣдѡсѡдзыс, сѣк ещѡ кыкѡн водѣсны

кымынь. Берегсянь видзодысьлы, дерт, кажитчыліс, мый гыясыс нылыштисны пыжсö, а пыжын пукалысьяслы тайö вöлі чой горув исламöм кодь.

Петя видзöдiс öпаснöйяс вылас и, кор гураныс лолiс сы джуджда, мый öпаснöйыс эз судзлыв ваöдзыс, сэки сiйö кокныдыка курыштлiс сынöдсö, но эз дзугсьыв, ни сынöмысь эз дугдыв. А Лёва, туйсö бöрйигмоз, повтöм збой синъяснас видзöдiс челядь юр вывтi водзлань и, дерт, нинöм эз аддзы, мый вöчсис пыжын: кодi пукаліс, кодi куйліс.

Вуджны ковмис дыр: пыжсö лоö вöлі кутны төв нылыдыс, катчöс нырöн, и сöмын сэки неунаöн кежыштавны веськыдыв, мöдарладор берегланьыс, кор гыис лэптö вывлань, а увлань лэччыны колö веськыда, гы нывк кузя.

Берегыс дзик нин матын, но ещö дыр на ковмис катны вывлань, медым корсьны лөнътас да сэтчö сувтöдны пыжсö. Челядь збоймисны, лэбны лöсьöдчысь утка котыр моз гогнитисны юръяснысö, веег Ваня чеччис пыж пыдöсысь да, синсö лапйöдлігтыр, видзöдiс кырöм бужöд вылö, тыдалö, эз верит, мый бөр воöма асладор берегö.

И мыйöн сöмын пыж мыш чушнитiс лыаö да пыжыс бокногөн сувтiс зумыд берег дорö, детинкаяс резина маच्याс моз чеччышталiсны му вылö да шонтысьöм мogyсь кутiсны котравны öтарö-мöдарö.

А Лёва чеччис пыж бöжсьыс, матыстчис Петя дiнö, мыччис сылы дженъыд чуньяса чорыд кисö да нюмунöмөн шуис:

— Молодец, Петя, тэ вылö позьö надейтчыны,— сэсся шуйга кинас сэтшöма тапнитiс Петялы пельпомас, мый сiйö төкөтьö эз усь.

Öнi Петя оз нин и помнит, кор вöлі тайö случайыс — кык во сайын, али куим во сайын,— но тайö картинаыс эз вушйы юрсьыс, сы вöсна мый тайö вöлі дружба заводитчöм.

И öнi, кыйдöс тыра нопйөн вöрысь лэччигөн, ёртыскöд орччөн зумыда восьлалiгөн, шоныд да долыд вöлі Петялы сьölöм вылас.

## КОВМИС ВИСЬТАСЬНЫ

Аскинас сёр рытын Лёва да Петя бара нин вöліны вөр керкаын.

Öнi найö ветлöдлісны весьтас туйöд, «Лёва туйöд», кызди думсьыс нимтiс Петя. И збыльсь, лэччан-каян туйыс лои дженъыдджык. Но та лыльсь Петя эз лысьт весиг казтыштны, медым не скöрмöдны другсö.

Гортаныс лэччылiгөн, пушнина сдایتöм бöрын, найö мунiсны Лидия

Ивановна ордö — нуисны сылы ассыныс лэччөдөм да куштөм пөткаяссö. Пөткаяссö куштисны, дерт, эз асьныс том войтыр, а Лёвалөн посни чой-вокыс да мамыс, отсасыны воліс и Лена — Петялөн чойыс. Весиг Тимка— Лёвалөн медічөт вокыс, куим арöса детинка — тшөтш отсасис гырысь-джыкъясыслы. Сійö нетшкас-нетшкас тарлысь гөнсö да оз и төдлы, кызди инмөдчылас кыз чуньнас тарлы гөрд синдорас, быттьөкө шензьö, мыйла вурыштöма татчö кумач торсö. Дерт, Тимка эз төд ни эз гөгөрво, мый и сылөн ичөтик-ичөтик киясыс отсасисны тшыгъялысь челядьды. Но гырысьджыкъясыс төдісны тайöс,—Петя висьтавліс налы, кызди-мый, да сьөлөмсянныс уджалісны.

Лидия Ивановналы Лёва висьталіс, мый дедыс пö тшөктіс мөдөдны тайö пөткаяссö Житомирса челядьды.

Учительница чужөм вылысь Петя казяліс шөйөвошөм да пыр жö висьталіс, мыйла буретш Житомирсалы.

Пöрысь учительница бурпырысь нюмъөвтис да кöсйысис мөдөдны пөтка тыра посылкаяс «буретш» Житомирса челядьды.

Сэсса Петя зэв ылісянь заводитіс да висьталіс ай йөра кыйөм йылысь. Мый найö адзылөмаөсь нин чудө-зверьястө, весиг төдöны öні, көні найö олоны. Öдзөм мыстыис кутліс нин висьтавлны и сы йылысь, мый дед пö мыйлакө оз зэв окотит. Но Лёва торкис сійöс:

— Кыйнытö ми сійöс кыям,— эскөдөмөн шуис сійö, быттьөкө налөн кыйöма нин.— Сöмын медым разрешениесö сетасны да яйсö тшөктасны сдайтны школаö...

— Школаö?! — торкис учительница. Челядьды зэв төдса да пыр спокойнөй, неуна стрөг чужөмыс сылөн югдыштис. Здук кежлө сійö думыштчыліс да шуис:— Тайö эськө зэв бур вöлі. Но öд тиянлы сьөкыд лоö...

— Миянлы сьөкыд?!— улöс вывсьыс чеччис да учительница пызан дорö матыстчис Петя.— Кыйнысö ми кыям, а лэччөдлынысö отсаласны.

— Разрешениетö ме ачым судзöда,— сьөкыдпырысь чеччис пызан сайысь пöрысь учительница да кутіс пасьтасыны.

Сэки тэрмасигтыр Петя висьталіс учительницаыслы, кутшөм кывъяс тшөктöма дедыс гижны боецъяслы.

Лидия Ивановна кöсйö нин вöлі лэптыны пельпом вывсьыс шальсö джынвыйö дзор юр вылас, но кисö бөр лэдзис, юрыс чатөртчис, синъясас югнитіс гордость.

— Збыльысь, Пиля дед тадзи шуис?

— Кыыйысь кыййё.

Учительница бергөдчис не арлыд сертиыс тэрыба, быттьөкө кёсийс бссътны тув йылысь пальтосё. Но челядь аддзылісны, кызди юбка зепсыыс перйис сійё носёвик да чышкыштіс синъяссё. Сэссия пасьтасис да бергөдчис челядьлань. Чукурёсь чужомыс сылөн вөлі зэв мелі.

Челядь висьталомысь учительница эз гөгөрво сөмын отитор: мый вөчны оз окотит дедыс. Дерт, Лёва кө эз торк да Петя кө веськыда висьталіс ставсё, сэки эськё нинём сэтшөмыс эз ло, мый лои өні.

Разрешение, дерт, сетісны Пиля дед ним вылө, и Лидия Ивановна вайис сійөс Лёвалы гортөдзыс.

Вөр керкаысь петігөн Лёва шуис дедыслы, мый талун найё мунёны байдөг лыйлыны и Катшөос оз босьтны аскөдныс.

Понтөг, гусьөник, водзыланыс сюся видзөдігтыр, детинкаяс восьлалёны йөраяс коктууй кузя, весиг кызөктыліганыс тупкылёны вомнысё кепыся кинаныс. Но көть медым кутшөма эз зільны найё мунны гусьөн, лыжияслөн джажгөмыс кыліс ылөдз. Оти туйөд мунөм бөрын йөраяс разөдчавлісны йирсыны, медсясё баддя эрд вылө. Йирсясны сэні — шырасны бадь йивъяссё, чегъяласны посни пипуяс да пельысь пуяс — и водаласны шойччыны. Детинкаяс регыд казялісны, кутшөм сюся найё бөрийёны шойччанінсё. Қодарсянь петөмаөсь эрд вылас, оз сыладорас водны, а мөдарладорас, петанінланыс юрөн. Тыдалө, медсясё найё полёны туялөмысь, буракө, төдөны, кутшөм гырысь, дзєбны позьтөм да ылісянь тыдалана налөн коктууйныс. Мыйөн сөмын на коктууй кузя вөтчысьяс тыдовтчасны эрд дорын, найё нин аддзёны. Тшын-бус сөмын мунлө вөрын, быттьөкө ыджыд төвныр пөлыштлас. Оти коктууй кузя найё бара төвзясны километр нель-ө вит сайё чеччөданінсяныс. Вөтчы на бөрся!

Тадзи вөтлысисны детинкаяс некымын лун... Лунтыр исковтасны найё зверьяс бөрся и сөмын пемдігас нин кежасны йөраяс туйысь да кутасны пискөдчыны прөсеклань, кор муртса төдчыштысь визирка кузя<sup>1</sup>, кор компас серти. Прөсекьяс юклёны-шөралёны вөрсө нель пельөса клеткаяс вылө, тайё клетка пытшкөссияныс көть кодарө мун, коркө дзик петан вөр поткөдысь эрд вылас. Но и сэтсыянь колө кужны корсьны вөр керкаа прөсексё, коді нюжөдчөма лунө-войё: өд некымын километр сайті ськөд параллельнө мунө сэтшөм жө мөд, коймөд., а найөс

<sup>1</sup> Визирка — зэв векныдик прөсек.

вомоналоны рытив-асыввыло мунысь прөсекъяс бара жö некымын километр сайті öти-мöдсяныс, на костын воывлöны муртса тöдчыштысь визиркаяс. Вот тані и колö кужны лыддыны вөрлысь «книгасö». Шор визьöг — козъя вөр, яг — пожöма вөр, нюр — посныдик да шочиник пожöма вөр, пипу рас, кыз рас, пөрöмин — ставыс тайö вöралысьяслөн пасъяс.

Бöра-водза ветлöдлiгкості рöмыдыс сукмö, öдйö пуксьö тöвся вой. Сöмын пу йывъяс вывтыс лöзов-еджыд, сэся ставыс — лымйöсь пуясыс и ачыс лымйыс — руд. Чöv ланьтöм пармаын шуштöм-гажтöм. Пөвзöмөн гораа жбыркнитліс репасысь сьöла, и бара ставыс кулöмакодь.

Лёва муно водзын. Петялы муртса тыдыштö сылөн вуджрасьöмыс, сылы кылö лыжияслөн дзажгöм да йötкасян бедьяслөн часимоз равномёрнöя чарскöм: чарс, чарс, чарс... И он кöйы да думсьыд шуавсьö: öтик, кык, куим... Лыддян, кымынысь на ковмас воськовтны, бедьйыштчыны лыжи туйöдз, сэсянь—вөр керка дорöдз! «А колöкö, мöдарö мунсьö, либö тайö абу сійö прөсекыс?» — юраныс бергалö мөвп.

Но вот кыськö пемыдсьыс кылö Лёвалөн увереннöй гора гөлöсыс:

— Воим!

— Кытчö воим, Лёва?

— Асланым лыжи туй вылö, со и кежаніныд.

Петя оз аддзы некутшöм кежанінтъяс, но лыжияс увсьыс кылö южмöм туйсö, и детинкалөн сьöлöмыс долыдпырысь ыркмулö. Сідзкö, регыд вөр керка, шоньд керка, турунөн вольсалöм нар...

Но таысь кызди Петя юрын жуисны и мукöд долыд мөвпъяс. Гортас лэччылiгөн сійö лыддис мам ним вылас воём письмö. Тайö письмöсö гижöма командирыс сійö частьсыс, кöні служитліс Петялөн батъяс.

Командир тöждысьöмпырысь юөртiс, мый Николай Козлов пö дырнин эз вермы гижны письмö гортсаыслы: некымын тöлысь пö нин сійö враг тылын — разведкаын, но аслас частьскöд пыр йитсьылöма. Медбөръя юөрсö ыстiгөн сійö тшöктöма командирыслы гижны та йылысь гортсаыслы, медым пö найö оз шогсьыны сы вöсна.

«Ловъя, ловъя!» — детинкалысь сьöлöмсö малалiсны кывъяс. Петя некыз эз вермы гөгөрвоны, кызди сійö позьö вуджны фронт вомөн. Фронтыс öд — уна рада окопъяса зэв кузь визь, а сэнi быдлаын фашистъяс, чурвидзöны пушкаяс, пулемётъяс... «Самолётөн кымөр сайті, — писькөдчис мөвп, — а кызди нö нуksesны?» Көть мед кыз, а ловъя.

И, кажитчө, тайö кывсö шуалісны дзажгысь лыжняысыс, и чаркысь бедьясыс, и шувгысь пуясыс: «Ловъя, ловъя»...

Такöд тшöтш сёлöмыс доймывліс сылөн, кор думыштлис ёртыс йылысь, Лёва йылысь. «Сылы, коньöрлы, оз нин позь виччысьны батьсö.. А друг и, сылөн ловъя?! Колöкө сорасисны юөртигас. Гашкө, сійö враг тылын жö?» И «ловъя» кывсьыс радлуныс и ёртыс вöсна сёлöм доймöмыс кызкө аслысногөн сорласисны. Вот эськө кыкнанныслөн кö батыясныс ловъяöсь вöліны, сэки эськө öні жö, ёртыс бöрся вөр керка дінö матыстчигөн, Петя горöдіс: «Ура-а! Ловъяöсь, ловъяöсь!» Но öні лон чөв овны.

Тшыгöсь, мудзöмаöсь и дзик тыртöг челядь воисны асланыс вöралан гортаныс.

Лунысь-лун подозрительнöйджыка видзöдалö дед налысь тыртöм нопьяссö.

— Бара нинöм эз сюр?— шензьö сійö.— Вот татшöмыд менам эз вöвльв, медым дзик нинöм.

Некымын лун вöрын весьшöрö келалöм бöрын öтчюд Лёва эз вермы терпитнысö да шуис:

— Поснияссö ми огö кыйö, агырысьясыс оз сюрны.

— Кутшöм агырысьяс?!— чуймис старик.

Чөв олігтыр Лёва перйис зепсьыс ичöтик бумажка да сетіс сійöс ёртыслы, на пö лыдды сылы.

Петя тэрмасигтыр лыддис йöра кыйны разрешение да мукöд дырся серти дженыйдджыка висьталіс, кызди-мый вöлі делöыс.

— М-да!— сöмын и вермис шуны пöрысь вöралысь. Сэсся дыркодь чөв оліс да содтіс:— Асьныд комсомолö кöсьянынды пырны, а пöрысь мортöс ылöдланнды.

Бытьö дон көртөн дзижнитісны кык друглы, найö пырккылö чеччыштісны нар вылысь.

— Дедушка, ог жö öд!— сёлöмсяныс горöдіс Петя.

— Ми эг думыштлöй ылöдлынысö, а прöстö эгö көсйöй тревожитны тэнö, пöрысь мортöс,— муö видзöдлігмоз шуис Лёва.

— Тревожитны,— броткис дед. — А öні абу тревожитöм, кытысь найöс корсян.

— Талун на ми лунтыр виль коктуй кузя мунім,— көк моз шыясис Петя.

Старик кутіс юасыны, кытысь найō аддылісны выль коктуйяссō, кытысь чеччисны йōраяс. Сэся шуис:

— Вōтлысьōмнад тай мися найōс он кый. Кыйōдны тай вōлі кōсь-яннды,— сэся ачыс асьсō торкис:— А учительшаныдлы обязательно висьталōй, кызди тi ылōдлінныд менō и сийс.

— Кыям да сэки и висьталам ставсō,— ызийōдм могуць шуис Лѐва.

Мōд лунся асылыс вōлі гудыр, лунтōлыс вайōдіс чужōмō уль лым, пуяслōн бокъясыс да вōр керка стен вазьыштōмаōсь.

Петя дыр видлаліс, чышкаліс кинас лыжи пыдōсьяссō. Татшōм поводдя кежлас, дерт, колō мавтны найōс мазьōн, но кытысь сийōс босьтан. Дедлы лōсьыд, сылōн лызыыс кыса и некутшōм мазь оз ков.

Мунісны дзик выльлаті. Челядь висьтавлōм серти и, буракō, аслас чайтōм серти, старик нуōдіс веськыда сэтчō, кōні долженōсь лоны йōраяс.

Қор увтчигтыр вōтчысь понийсь пышйō кōч, сийō оз мун веськыда, а вōчас ыджыд кытш да обязательно локтас бōр сэтчō, кытысь чеччōдіс сийōс пон. Он кō удит лыйны, пон да кōч кытшовтасны мōдысь, коймōдысь, вōчасны, кызди шуōны вōралысьяс, первой круг, мōдōс, коймōдōс... Тайōн и пōлзуйтчōны кōч лыйлысьяс, найō оз вōтлысьны сы бōрся, а сулалōны ōти местаын, сэні, кытi ōтчыд пышйис нин либō кыгысь чеччис кōч. А пон увтōм серти позьō тōдны, кытысянь найō локтōны.

Татшōм жō сямныс и йōраяслōн. Қор на бōрся вōтчōны, найō сідзжō оз веськыда пышйыны, а вōчасны кытш, дерт, кōч дорысь ыджыдджыкōс, да медся нин джуджыд лымъя дырйи бōр воасны важ коктуйяс да сэтi мōдасны котōртны. Овлывлō, дерт, и сідз, мый мукōд йōраыс чукльōд-лiгтыр котōртас 25—30 километр да оз и волы важ коктуй вылас.

Пармаын эмōсь сэтшōм местаяс, мый вōрсō сэтчō быттьōкō кōдзō-маōсь план серти. Ōтилаын, яг вылын да нюр вылын, виж кока, веж юра сись кодь веськыд пожōмъяс. Мōдлаын, накōд орччōн, увтасiнын-джык, кок улōдзныс кузь паськōма, пемыд-веж козьяс. Пожōма козьяс йитвежыс<sup>1</sup> мукōдлаас сэтшōм веськыд, мый, кажитчō, налы сетōма учас-токсō сэтшōм стōча — некодныслы оз позь оськовтны ōта-мōд участок вылас.

<sup>1</sup> И и т в е ж — мыйкō ōтласянин.

Вөралысыя воисны татшөм йитвежас.

— Ти муной ягдор мозыс, син увсыныд энö воштöй коз вөр визьсö, ме сэнi лоа, а бөр öтлаасям первойя вомöна прöсек вылас,— висьталiс Пиля дед да шыасис понлы:— Қатшö, ме бөрся!

— Дедушка, аддзам кө, льям?— шöпнитiс Петя.

— Льянныд, дерт. Сöмын бура тöдмалöй, медым энö йöра оз весь-кав,— шуис дед да аслас ньöжмыд походканас пырис козья вөрö.

Старик некор эз тэрмасьлыв и, кажитчö, воськовтигас думайтö, кытчö пуктыны коксö.

Мöдöдчис шляка, став вöрыс лои улльöv пиын кодь. Водзын муныс Петя частö сувтыштлывлiс да бедьнас таркнитлывлiс лыжиас: пыркöдiс мавттöм лыжи пыдöсас көласьöм уль лымсö.

— Эн шумит,— öлöдiс сiйöс Лёва.

— Тайö поводлясö кө тöдöма, колö вöлөм мазь босьтны да мавтны лыжи пыдöсьястö. Ещö кө ульдас, не петны миянлы вöрсьяд.

— Некутшöм мазь оз ков, петам. Ачыл ещö лыжникөн висьтасян!

— Петав тэ водзас, уна-ö мунаң,— нюмунiс Петя. Сiйö тöдiс, мый дру-гыслөн лыжиыс тövбыд мавтлытöм, и татшөм уль лым вывтi ылöдз оз мун.

Но Лёва эз пет водзö, а нимкодьпырысь шуис:

— Мунöм шыыд инö оз кыв. Самöй йöра кыян поводдя. Сöмын мед кокуйыс сюрö-а. Дед тöдö, кор на бөрся вöтлысьнытö.

Небыд лунтöv шувгис пуяс костöд, гартлiс еджыл бобувьяс кодь паськыл корья лымсö. «Бут, бут»,— кылiс öтилаын и мöдлаын тукталөн<sup>1</sup> гылалöм, быттьökö кодкö чövталiс вывсянö сёй пиö гырысь изьяс.

— Тайö нö мый? — недыр мунöм бöрын сувтiс да юалис Петя.

Лым вылын тöдчис кутшöмкö аслыссяма туй, лөк гöрийөн гöрыштöм бөрöзда кодь. Тыдалö, кодкö мыйкö кыскöма сэтi, лымыйс тшупöдөн-тшупöдөн пешкыльтчöма.

— Кутшöмкö зверь, буракö, кыскöма мöд зверös,— ассыс чайтöмсö висьталiс Лёва.— Вай вöтöдам.

— Кодарсянныс кодарö нö сiйö мунöма?

Кутiсны видзöдавны. Туйыс пöшти выль на: вывсянö сапкысь лым-йыс ньöти на абу удитöма тыртны сiйöс. Зырыштчöм да пешкыльтчöм лым сертиыс челядь гөгөрвоисны, кодарлань мунöма тайö тöдтöм зверыс,

<sup>1</sup> Тукта — пу лапьяс вылö öшиöм лым.

да мөдөдчисны сэтчань. Туй нуөдіс дед кежанінсянь мөдарө, вуджис яг вомөн, лэччис шор визьоглань. Сэтысь детинкаяс и аддзисны, кызди лёкысь нетшкысьома да, водз кокъяссө водзлань шыблалігтыр, кыссьома кутшөмкө зверь.

— Руч! Лый, лый!— лёкысь горөдіс Лёва.

Петя өддзөдчөмөн котөртиштіс неуна да лыйис. Зверь довзёвтіс, нөшта гоз-мөдысь чеччыштіс да водіс.

Збылысь, тайө вөлі гөрд руч. Кык бөр кокыс сылөн пырөма капканө. Водз кокъяснас чеччалігтыр, бөр кокъяснас капкан вылө мыджсьөмөн, сійө пыр кыссьома, код төдас кысянь.

— Дедылөн кыйөм ручыс, буракө, пышйөма,— ружье прикладнас зверлы юрас кучкөм бөрын шуис Петя, аслас став тушаыс тіраліс, ловшыыс вөлі гора.

— Видзөд, мый вөчөмыд кучиксө, пакөдыс пырөма пуляыд, морөсөдыс петөма,— ручөс видлалігмоз дөзмөмпырысь шуис Лёва.— Дедыд оз ошкы таысь.— Сэсся шай-паймунліс сійө да содтіс:— Өдвакө дедлөн тайө ручыс. Татшөм капканыс миян эз вөвлы.

Лёва төдіс ассыныс капканъяссө: найө дөра пыдөсаөсь, вурлөма нырагезйөн, а тайө кутшөмкө марля пыдөса капкан.

— Кодлөн нө эськө? Коді матігөгөрас кыйсьө?— гажтөммис Петя.

— Код төдас коді. Километр квайт сайын эм вөралан керка, этайө шор йылас.

— Мый нө эськө вөчан тайөн? Эновтам али лэччөдам?

— Эновтны оз позь, ни лэччөдны оз позь!— решительнөя шуис Лёва.— Эновтан — весышөрө вошө татшөм донатор: талун жө туйыс тырө, и мортыслы оз сюр тайө. Лэччөдан — гусясьөм лоө.

Дыркөдь падъялөм да сёрнитчөм бөрын детинкаяс решитісны нуну ручөс сійө местаас, кытчө вөлөм пуктөма капкансө. Кор найө бөр воисны асланыс кежанінө, кытісянь заводитісны туявны капкана ручөс, вөлисти казялісны, мый тшөктыліс налы дедыс: мунны коз вөр визь пөлөн. И руч кыссьома буретш сэсянь, кытччань колө вөлі мунны налы. Но регыд мысти кыссьөм туйыс кутіс вошласьны, сэсся петкөдіс эрд вылө да дзыкөдз воши. Воис визирка. Сійөс мукөд дырйныс верман и не аддзыны — сэтшөм векни сійө, но казялан быд сө метр сайө сутшкөм ёсь йыла бөдь серти да лөсасьяс серти. Визирка вылын, коз увьясын, кыті абу тыртөма лымйыс, төдчышталіс лыжи туй.

— Руч кыйыссыд таті ветлөдлөма,— гөгөрвоис Лёва.

— Төдан мый? Вай тайос ошөдам ув вылө, и сийө аддзас,— вөзйис Петя.

— Карандаш тэнад абу?

— Мый сысы? — мөдіс гурйысыны морос зептас Петя, сэсся перйис карандашпом.

Ичөтик чернас Лёва кырсышыштис коз пу да гижис: «Кыйдөсыд коз тани», и улиас вөчис стрелка.

— А кыйсысысыс кө дедыд кодь неграмотной?— шуис Петя.

Лёва, падмыштліс, сэсся керыштис кык пелысь пу да воча-воча нёровтис туй вомоныс.

— Оні быд вөралысь гөгөрвоас, мый туйсө сылысь кодкө потшөма мыйлакө,— шуис сийө, сэсся босьтис ручос, пыртис неылө вөрө да ошөдіс коз ув вылө.

Бара на лунтыр келалісны челядь, талун весиг йөра коктуйсө эз адзвыны. Пывсянө воисны мудзось, тшыгось. Дед эз на вөв воөма. Қоркө и сийө воис. Сы пөрччысигкості жө Петя висьталіс руч кыйөм йылысь да сийөс дзөбөм йылысь.

Старик первойсө чуймыліс, коді велөдөма этайө челядьсө тадзисө вөчны, сэсся радпырысь нюмгөвтис да шуис:

— Аттө, трасичаыд, мый ылнаодз пышйөма, менам өд сийө капканыс.

— Абу миян,— юрсө пыркнитис Лёва.

— Тэ нө, зонмө, мый, он верит меным?— скөрысь видзөдліс внукуыс вылө Пиля дед.— Некор нэмын эг ылөдчыв татшөмторъяснас. Тэ — пионер, а ме — вөралысь. Йөзыдлөн кыйдөсыд меным, пиук, оз ков. А сэтшөмыс менам нель капкан. Мишка Пашө гөтырлысь арнас на нёбллі..

— Веритам, дедушка,— мыжапырысь шуис Лёва.— Ме өд сөмын шуи, мися, эг на адзыв татшөм капкансө. Аски ручтө лэччөдам.

— Велькыда кө шуны, ручыд сийө абу менам, а тиян,— бөр бура-сышыштис дед.— Ті кө эн аддзөй, и капканыс тшөтш воши.

— А өні ставыс бур лои: и ручыс, и капканыс сюри,— деда-пиаөс бурөдөм могысь пасйыштис Петя да кутис юасыны, мый аддзылөма дедыс.

Пөрысь вөралысь аддзылөма йөра коктуйяс. Но лым вөснаыс пө он төд, выль-ө-важ туйыс.

— Тайө поводьянас кө огө вермөй туявны да кыйөдны, миянлы сэсся не кыйны найос,— медбөрын висьталіс сийө.

## ЙӦРАЯС БӦРСЯ

Аскинас муртса кынмыштӧма. Пуяслысь лапъяссӧ и дінъяссӧ быттьӧкӧ стеклӧалыштӧма. Но небесаыс гудыр, и луныс должен лоны уль.

Дедныскӧд янсӧдчӧм бӧрын детинкаяс дыр мунісны чӧв-чӧв. Лыжияс улын дугдіс нин чарскыны, и уль сѣй кодъ лым кутіс сибдавын лыжи пыдӧсьясӧ.

Воис кутшӧмкӧ аслыссяма вӧр — кыз да дженъыд пожӧмъяс, а на костын ӧтилаын и мӧдлаын льяк бадъ кустъяс, мукӧдлаас зэв тшӧкыд том пипу рас. И вот тані кутісны воавны йӧра коктуйяс. Но он тӧд, важӧсь-ӧ-выльӧсь найӧ.

Лыжияс ньӧти эз исковтны, найӧс ковмис лэптавын да сідзи восьлавны. Челядь мунісны зэв надзӧн.

Бджыд пипу выліті чегӧма, йылыс сылӧн водӧма муас, а діныс ӧшйӧма чегӧминас, быттьӧ кодкӧ панӧма исласян кыр. Діныс кык метр вылнаын, но и сэті гольвидзӧ еджыд — кырсьтӧм. Пу гӧгӧрыс — йӧраяслӧн выль коктуйяс.

— Танӧсь,— шӧпнитіс Лёва, нёровтчыліс пӧрӧм пипу бердӧ, кепыся кинас чышкаліс лыжи пыдӧсьясӧ да кутіс вашкӧдны:— Тэ этайӧ коктуй кузяыс мун, а ме этаті. Ӧтлаасям прӧсек вылын. Гӧгӧрвоин?— гӧгрӧс щӧкаыс сылӧн сырмыштіс.

— Гӧгӧрвои.

Муртса на удитісны кык друг янсӧдчыны, кызди Лёва аддзис гудыр пырыс лым вылысь сьӧд рӧч, а рӧч вылас быттьӧкӧ кодкӧ ӧвтчис кушенча кепысьясӧн.

«Йӧра куйлӧ,— думыштіс Лёва да весиг дугдыліс лолавнысӧ.— Мы йӧн тӧдан энъ али ай сійӧ? Сюртӧм тай-а, энъ, буракӧ»,— жуисны юрас мӧвпъяс, кор сійӧ зэв надзӧн матыстчис сьӧд рӧчлань. Со нин сійӧ заводитіс метитчыны, но чувствуйтӧ, мый киясыс ёна тіралӧны, ствол помыс дзӧрӧ ӧтарӧ-мӧдарӧ. Детинка ляпкӧдчис, гырddзаяссӧ пунктіс пидзӧсьяс вылас, но киясыс пыр тіралісны, и сьӧд рӧч воши — саяліс мыльк сайӧ. Лёва бӧр сувтіс, но ыштӧмысла да волнуйтчӧмысла эз слӧймы весиг ӧти коккиас воськовтны водзӧ либӧ сатшкыны лыжи бедьсӧ да сы вылӧ пуктыны ружье помсӧ, а сулаліс кокъяссӧ паськӧдӧмӧн. Та вӧсна и дзӧрисны киясыс. Унаысь нин сійӧ ляпкӧдчыліс да бӧр сувтіс, но некыз эз вермы бура метитчыны. Сэсся кутіс матыстчыны пу дінӧ. «Энъ али ай, энъ али

ай?»— сьолём доймытөдзис думайтис том морт, воис пу динөдз да кутис дзоргыны, оз-ө тыдав көть сюр местаыс. Нинөм эз аддзы. А йөра куйлис сылань мышкөн, и нырвомыс сьлөн эз тыдав, сөмын пельясыс ворсисны аканьяс моз.

— Чечёда да пышйнгас лья,— решитис детинка, петис пу сайыс да тэрмасигтыр кутис матыстчыны. Сылы и дум вылас эз усьлы полём, мый йөра вермас чеччыны, уськөдчыны сы вылө да лямөдны гагийос моз.

«Ггы-ып!»— кылис неылын лыйём шы. Повзьём йөра чеччыштитис, первой чепөсийлис отарө, сэссия мөдарө — оз төд, кодарө пышйныны. «Энь вөлөма»,— ружьесө лэдзис Лёва. И дзик сийө жө минутаас вөрорыс чепөсийсны кык йөра — өтиыс небыжд сюра — да кутисны төвзыны сэтчань жө, кытччань котөртитис первойыс. Сэтшөм өдийө найө вуджрасисны пуяс костөд, мый том вөралыс эз слөймы сразу лыйны, и лыйис ылыстчиганыс нин. Сюраыс усьли пидзөсьяс вылас, быттёкө джөмдылис, гөрыштитис лымсө, бөр чеччис да воши син увсьыс.

— Тэ кодлы лыйин? — ылисянь горөдис йөраяс туйтис локтыс Петя.

— Сылы жө.

— Кодлы «сылы»-сө?

— Сюраыслы. Менам дзик ныр улын вөли куйлө сюртөм йөра да эг лый сылы.

— Збыль?

— Со сийө көни вөли куйлө, а ме эсийө пу саяс сулалэ. Энь и вөлөма.

— Оз веритсьы, кызди тэ вермин терпитны. А ме дзик вылысаньыс рои. Кыла, мыйкө руза-разакылө. Раскыс тшөкыд. Видзөда — кык йөра посни пипуяс чегьялөны. Ме и швачкөбти сюраыслы. Со тай кызди вырыс киссьө.

— Ме сылы жө содти. Усьли нин, да бөр пышйис.

— Усьли!— Юрсө дзөрөдигмос Петя став тушанас нюжөдчылис водзлань да воськовтис.

Детинкаяс мунисны йөра усьланинө. Одвывсьыс уөвтөм зверь муөдзис парсыштөма лымсө, весиг тыдалөны веж пув корьясыс. Лымийис пасьтала гөрд чутөсь резсьөм вирсьыс. Вирьскөд орччөн кояссьөма виж ва да нямлялөм пипу кырсь.

— Кыномас инмөма, весиг сөяныс петө. Ылөдз оз мун,— неуна чирьштөм гөлөсөн варовитис Лёва, ачыс, лыжиясө сьөкыда лэпталигмос, мунис зверьяс коктуй бөрся.

Вөрүн лои руа, лым вылысыс сөнiк, сей моз сибдö лыжи пыдöсö. Куимысь тувччан и сэсса кокыд оз лыб, сы мында кöласяс сэтчö сөнiкыс. Он мун! Детинкаяс пöрччылысны нин лыжияснысö, чышкалысны налысь пыдöсьяссö, сувтöдлысны косьтыны. Нинöм оз отсав, оз лыжи туй артмы, а лёкнога гураньяс кольöны мунöм бöрад.

— Лёва, бергöдчам, ог жö öд вермö вöтöднытö, а пыдö кö пырам, и петнысö огö вермöй, вөр керкаöдзыд огö воö,—гажтöмпырысь шуис Петя.

— Сийö, колöкö, эсийö коз саяс куйлö, а ми бöр бергöдчам! Ог! Вай мун, кытчöдз верман. Эновтам кö, туйыс тырö, и эта ыджа зверь весьшöрö пропадитас,—тшöктiс Лёва да сэтшöм скöрысь видзöдлiс ёртыс вылö, мый мöдыс мыжапырысь да кыв шутöг бара мöдöдчис водзлань.

Мунны пыр лои сьöкыджык и сьöкыдджык. Зверьяс котöртöмаöсь медсяс сук вөрöдыс. Посни пуяс вылысь лымйыс лемасис гач пидзöсьяссö, сылi да йиджис яйöдзныс. Регыд мысти челядь дзикöдз кöтасисны. Но пыр кыссисны водзö. Гоз-мöдлаысь аддзылысны найö, кызди ранитчöм йöра усьлöма, лукйöма лымсö, резöма вирсö да бара мунöма водзö.

Мунiгмозыс Лёва чорыда думайтiс, кызди эськö позис мынтöдчыны лыжиö кöласысь лымйысь. Коз лапьяс вывтi, нёрöм ньөрьяс вывтi вуджигөн весасьлiс лымйыс, и лыжияс мунлысны гылыдджыка. Тайöс гөгөрвоис и Петя да нарошнö мöдiс корсявны нёрöм пуяс, вуджавны на вомөн, сэсса кутiс чегьявны ки улас веськалöм ньөрьяс да шыблавны найöс водзвылас, лыжи улас.

— Посйы, посйы, тадзи кокныдджык,—сöмын öти вомдорьяснас нюмъевтiс Лёва, сэсса тшöтш мöдiс посйысьны. Мунны лои кокныдджык. Öнi найö ньöти эз зильны гусьөн мунны. Ранитчöм зверь кытчöкö усьö, сöмын колö суöдны сийöс, аддзыны, кытчö водас.

Петя бара збоймис да тэрмасигтыр мунiс водзын.

Ыштöм челядь эз и думыштлины дедныс йылысь. Сийö, дерт кöнкö, важөн нин волiс прöсек вылö, виччысьыштiс да мунiс. Колöкö, кылис лыйсьöм шысö да на бöрся локтö — тöдö öд, мый йöралы лыйисны.

Зэв жö нин дженьыд төвся луныд! Детинкаяс татшöм сьöкыдпырысьсö эз на и удитны кыссыны, колöкö, и нель-ö-вит километр, а бара нин рöмдö.

Петя видзöдлiс ёртыс вылö да казялiс, мый сийö муртса нин восьлалö, но бергöдчöм йылысь эз кöсйы и кывзыны.

«Узыны, тыдалö, лоö вöрас»,—ёртыс бöрся вöтчигмоз думайтiс Петя.

Лёва став тушанас друг йѳжгыльтчис да сюся мѳдїс видзѳдны пуяс костѳд.

Тайѳс казяліс Петя да тшѳтш кутїс дзоргыны сѳтчаны.

Гежѳд пуяс костѳд тыдалїс, кызди ылынкодѳ вѳрис кодкѳ ыджыд, сѳд. Сьылісѳ нюжѳдѳмѳн сїѳ судзласис метр судта пожѳм йывланы.

— Дозмѳр, — пу сайѳ сайѳдчигмоз шѳпнитїс Лѳва.

Бѳджыд сѳд дозмѳр сулалїс ас судтаыс пожѳм дїнын да зїля кокаліс лыссѳ — сѳйсич нїѳтик лап йывѳяссѳ да лыссѳ. Но лыйны оз позь: ылын. Ѳти пу сайсянь мѳд сайѳ дзѳбсясигмоз челядь кутїсны матыстчыны сы дїнѳ. Мунѳм шыыс налѳн кѳть и пѳшти эз кыв, но пѳтка, тыдалѳ, аддзис налысь вуджрасѳмѳсѳ, дугдїс сѳйнысѳ да ланѳтѳдчис, бытѳѳкѳ кывзысѳ. Сѳсся пыркнитчис, сѳѳкыда кыпѳдчис да, бордѳяснас швачѳд-чигтыр, лѳбис.

— Понтѳгыд он сїѳс лый! — пыдїсянь лолыштїс Лѳва.

Муртеа на лѳнис дозмѳрлѳн лѳбѳм шыыс, кызди лым вылысь шурк-кылѳ лѳбзис сѳла да пуксис кызд ув вылѳ. Лѳва гымѳбтїс-луйис. Пѳтка турбыльтчис сѳнїк кодѳ лымїѳ.

— Ачыд тай нѳ вѳлі шуан оз пѳ позь лыйсыны, а лыйин, — сѳлаѳс ѳсѳстїгмоз шуис Петя.

— Ѳнї оз позь?! Гыпїѳдлы, мыйта колѳ!

— Мыйла нин?

— Ранитѳмаыс медым ѳдїѳджык котѳртас да регыджык усьѳ.

— Сїѳѳтѳ да. Сїдзкѳ, ѳнї кодѳс аддзам, сїѳс и кутам гымѳдны.

— Аддзылім тай со кутшѳмѳс, да он на босѳт.

— Шуам, тарѳяс кѳ юр вѳсьтаным пуксясны, тулан либѳ руч кѳ паныдасяс...

Найѳ бѳр петїсны йѳраяс коктуй дорѳ да мѳдѳдчисны водзѳ.

Тыдовтчис гежѳд пожѳмѳяса яг дорѳс. Йѳраяс друг чукульѳтѳмаѳсь да бара пырѳмаѳсь козѳя вѳрѳ. Найѳ, тыдалѳ, пыр на котѳртѳмаѳсь. Вир туйыс тѳдчыштїс сѳмын кѳнкѳ-кѳнкѳ.

Лѳва сувтїс — виж кока пожѳмѳяс костын кѳнсюрѳ сулалїсны ѳтка-ѳтка кос пуяс. Найѳ кырѳтѳмѳсь, воймѳмысла лѳзов-рудѳсь. Йыланыс налѳн чурвидзисны кѳза сюр кодѳ косѳмѳм увѳяс. Тайѳ кос пожѳмѳясыс-лѳн коркѳ зѳв важѳн нин, гашкѳ, веж юра пожѳмѳяс чужтѳдзыс на, вужѳясныс сїсѳмалѳмаѳсь, пасѳкѳмныс кїсѳѳма-усѳѳма. И найѳ уна во чѳж сулалѳмаѳсь пасѳтѳг, косѳмѳмаѳсь гѳж водзас да тѳв вылас.

— Тодан мый? — мудзпырысь бергөдчис ёртыслань Лёва.—Вөралан керкаөдз талун ог жө нин воё, а таысь бур места да кос пескаиң сэсся оз нин сюр.

— Узьмөдчыны көсьян?! — чуймыштіс Петя, ачыс гөгөрвоис, мый йылысь сёрнитө ёртыс, но сылы пыр на эз веритсьы, мый ковмас талун узьны тані.

— Шойччыны асылөдз, югдандорөдзис. Вөралысьлөн пө көні вой суас, сәні и горт,—нопсө пөрччигмоз да сійөс кос пу дінө пуктігмоз гажаа варовитіс Лёва.

— Узям, ме сайын абу. Пескыс тай эм. Шондыс дасьтөма кос пестө,— сідз жө гажаа шуис Петя, коть чужөм вылас сьлөн пыр на вудж-расис шөйөвошөм. Дерт, зэв интереснө төвшөр төлын узьны вөрүн, бипур дорын. Но кызди нө узян уль лым вылын, көтасьөм паськөмөн? Сэки сылы дум вылас уси дедыслөн висьтыс, кызди сійө өтпөлөсөн узьлывлөма виөм йөра дінын, и детинкалөн сьөлөм вылас лои долыджык.

Яг дорын, пөрөм пу бердын, ыпъялө-ыргө кос пуясөн пестөм би, трачкакылө да резө югөръяссө пуясө.

Петя пукалө би дорын, лөсалөм колода вылын, куштө сьөлаөс, ачыс вомгорулас сьылө:

Широка страна моя родная,  
Много в ней лесов, полей и рек...

Сьылө, и кутшөмкө долыд-долыд пөсь визлалө лы-вем пырыс тайө сьыланкывсө сьылігөн.

Лёва лөсьөдө узяннн. Чинтөма кык кос краж. Кыкнанныслысь өти боксө лөсалөма метрөн-джыниөн кузя, куим чунь судта. Со өні өтнас тільсьө, быгыльтөмөн матыстө биланьө өти кражсө, но оз вермы. Петя казяліс тайөс, эновтіс сьөласө да тэрмасьөмөн матыстчис сы дінө.

— Мый нө он чукөст, он вермы-а? — шыасис сійө.

— Эг көйы торкны сьылөмтө!

— Тэ радейтан жө сьыланкывсө?

— Ог быдөнөс. Қор кыла тайө сьыланкывсө, ме син водзын кыптөны миян ыджыд да паськыд странаса у-на-уна вөръяс, муяс, юяс. И сэки радөйла, долыдөйла быдсөн ыпъявны мөдлас сьөлөмөй. Гөгөрвоан?

— Кызди нө! Быдөнлөн өд сідз!

Кыкнан керсö детинкаяс быгылытисны би дорö. Öтисö пуктисны улö, лöсалöминнас вывлань, мöдсö — выліас, лöсалöминнас увлань. Артмис кык кер судта стен, а керьяс костас кивомлöс судта да метрöн-джынйөн кузя öшинь. Медым вылысса керйыс оз быгылытчы, кыкнан керпомсö пуктисны пуяс костö. Регыд би вуджис татшöм ногөн вöчöм ноддя вылö да кутис ыргыны öшиньöдыс. Ноддяа би дорын шоныджык, а тайö кык краййыс тырмас войбыд.

Би дорсянь неылö детинкаяс вöчисны веж лыскысь пöлöс чом, улысас вольсавны найö ваялісны небыд ныв лыс. Ноддя билён шоныдыс кучкö чом вевтас, и сэнi паччöрын кодь шоныд.

— Танi коть тöвйы,— радліс Лёва.

— Тöвъям эськö да, сöмын мый кутам сёйны,—горш синъясөн сёлa вылö видзöдліс Петя, сэсся гурйысьыштис нопьяс да содтис:— Со менам став запас,— петкöдліс сійö кипыдöс ыджа нянтор.

— Менам тэ дорысь унджык.— Лёва перйис нопсысь быдса ид нянь да нель картофель.— Тырмас кыкнаннымлы. Вот ва йылысь ковмас думыштлыны.

— Лымйыс тай эм. Мач вöчам, сывдыштам да нёнялам.

— Лым сёйны огö на кутöй. Тэ жарит сёлатö да пöжав картофельсö,— шуис Лёва да воши рöмыдас.

Бидорса пуяс лöсталöны виж ыргөнөн, а на сайын дзурс пемыд. Көнкö ылын, вөр саяс, муртса тöдчыштис кельыдгöрд визитор. Буракö, сзэдыны кöсйö, шондi лэччаніныс тöкөтö вөссьыштöма и быттöкö потасод тыдыштö важөн нин лэччöм шондiлөн муртса чусалыштысь югөрьясыс. Сзэьдас — бөр көдздöдас.

Недыр мысти Лёва бөр локтис би дорö, киас сылөн книга лист дорысь неуна гырысьджык сямöд торьяс. Детинка босьтис öтиöс, кусыньтис сылысь öтар дорсö, карандаш кузья керыштöм ньөрлысь поткöдис помсö да суйис сійöс кусыньтöминас. Артмис ёсь пыдöса ичотик доз — чибльöг. Тадз жö вöчис мöдöс, коймöдöс... Сэсся тырталіс найöс лымйөн да сувтöдаліс би дорö.

— Сёйигкості и юан лоö дась,—нельöд ва доз сувтöдiгмоз шуис Лёва да пуксис колода вылö.

— Ловья мортыд тай некытчö жö оз йöрмы! Со и сёян дась.— Петя босьтис би вылысь бедь йылын чишкалём-жаритöм пöткаöс, вундiс шöри,

сэсса перъяліс бнысь шом кодъ съод пöжалöм картупельяс. Ставсö пукталіс ёртыс водзö, колода вылö.

Кор Лёва кыкис ноп зепсыс истöг кöрöбка, восьтыс сійöс, чепöльнас босьтыс сов да сявкöдыштыс яйтор вылас, Петя чуймыліс, быттьökö мыйкö гөгöрвоис, да юалöм моз шуис:

— Тэ тöдöмыд вöрад узыöмтö. Да öд? А меным эн и висьтав.

— Бура, дерт, эг тöд, мый стöч талун ковмас узыны. А вöрын ветлігөн запастор век колыштö.

— Кыдзи дедьд шуас: «Быдтор вылö колö лоны дасыөн». Да öд?

Сейигөн кыптыліс ичөтик вензьöм. Петя некыдз эз кöсйы сейны ёртыслысь няньсö, весиг пöжалöм кык картупельсö. Аслыд пö аски ковмас. Но Лёва сійöс сідз вомаліс, кутшöм нö пö тэ друг тадзнадтö, мый Петялы весиг яндзим лои.

— Но вот, öні позяс и водны, — сылöм лымйысь чибльöгö артмöм ва юöм бöрын шуис Лёва.

Кöмъяссö пукталісны юр уланыс, кыза вольсалöм лыс улас, выліас кепысь, шапка — юрлöс пыдди, öти фуфайкасö вольсалісны, мöднас шебрасисны да водісны билань кокөн. Ружьяс да чер пуктісны дінаныс.

...Синъяс асьныс куньсöны. Лёва водзын вöрыс югдіс. Сійö видзöдö сы вылö кысянькö вывсянь. Воськыд паськыд прöсекъяс преникөн шöралöны вöрлысь съод шабурсö. Долыда шувгö вөр, детинка син водзын дзоридзалö чужан му...

Петя куйліс восьса синъясөн, видзöдіс пемыдруд небеса вылö. Би весьтын эзысь бобувьяс моз кутісны бергавныгырысьджык и посныдджык лымчирьяс. Найö быттьökö эз усьны муö, а öта-мöд бöрсяяс лэбисны кытчökö водзö. Детинка эз тöдлы, кыдзи куньсисны синъясыс, и со öні видзöдö сійö кино вылысь адзылöм Валерий Чкаловлысь лэбалöмсö. Ачыс сэнi жö, лётчиккöд орччөн. Со найö лэбöны кымöрьяс бердті, ыркыдөн öвтыштыс шебравтöм чужöмас. Уліас вольсыштчöма помтöм парма. Парма шöрын чурвидзöны нефтянöй вышкаяс, заводьяслөн кузь трубаяс. Найö тöкөтьö оз судзны самолётöдз. Гырысь карьяс кольöны бөрвыв. «Ж-ж-ж!» кылö самолёт друг пырис ыджыд ю вомөн нюжөдöм пос улö. Петя весиг копыртліс юрсö, медым оз люкась.

Мудзöм челядьöс личкис чöскыд ун.

Дзурс пемыд. Съод вөр шöрын öтка кодзулөн югъялыштö би.

Шувгыштö парма, быттьö мыйкö мойдö.

## „ШУОМА — ВОЧОМА!“

Лёва садъмис водз.

Асыввылыс едждодыштёма. Вөрлөн өтторъя рудас тодчыштёны пуяс-лөн съод вуджөръяс. Би муртса чусалыштё. Петя йожгыльтчёма — юр и кок өтлаын. Лёва тэрыба пуксис места вылас, мөдiс лукйысьны юр улас — перйыны көмкот. Сы вөрөм вылө садъмис и Петя.

— Лосьыда и узим, — синъяссө куньтыралыштiс сийө. — Абу и ывла-ын узьөм кодь.

— Ме кыкыс кымын садьмылі би пестыны. Тэ, буракө, эн и садьмыв.

— Эг жө өд! Весиг немтор эг вөтась, буракө.

Сийө друг чошкөдiс пельяссө. Неылын кылiс: «Дзиж-дзая, дзиж-дзая».

Кыкнанныс звирк чеччыштiсны, кывзöны. Дзаяжөм матысмө.

— Колөкө, йөраясыд? — шөпнитiс Петя.

Друг еджгов рөмыдас кодкө вуджөртiс. Ас тодлытөгныс детинкаяс нюжөдчисны ружьяснысла.

— Дедушка! — сөлөмсяныс горөдiс Лёва да мөдiс шаркакывны-бергавны: нимкодьысла эз төд, мый вөчны.

Старик локтiс төрытъя лыжи туй кузя. Вөсныдик чарөмыс гораа дзаяжис.

— Лыйинныд, эз усь? — чом дорө сувтiгмоз на юалiс Пиля дед, ачыс сюся да төждысьөмпырысь видзөдө челядь вылө, быттьөкө көсийө төд-мавны, ставыс-ө лючки-ладнө.

— Лыйим, рушкуас инмөма, со этатi пышйөмаөсь, — тэрмасигтыр висьталiс Петя.

— Аддзылі. Рушкуас кө инмөма, верст нель-вит сийө пышъяс на. Ай?

— Ай жө өд! Ыджыд сюра, а кыкыс энъ, — висьталiс Лёва. — Ме эськө куйланиас суй, дзик эсийө пу ылнаөдзыс сибөдiс, да эг лый.

Дед нюммунөмөн видзөдлiс внукыс вылө, буракө, эз верит, мый Лёва вермис кутчысьны лыйөмысь, матын кө куйлiс йөра. Петя казялiс, мый дедыс оз верит, лыжиасис да муныштiс неылө.

— Со эта ылнаын вөлөма, — шуис сийө. — Пионерскөй кыв жө сетөма!

— Верита, верита, — нопсө пөрччигмоз пөся шуис дөрысь морт. — На, сөйыштөй да мунамөй регыдджык. — Колода вылө пуктiс сийө нянь да нуөм яй торъяс.

— Кутшом али сэйом! — тэрмөдліс Лёва.— Вөтөдам, сэні сёям.

— Тшыг кынөмөн төдтөм туйо оз петавлыны,— велөдіс старик.  
И детинкаяслы быть лои нурийштчыны.

— Дедушка, а кыз нө тэ корсин мянөс? — сэйигмозыс юаліс Петя.

— Дась лыжи туй кузяд!

— Катшөөс бара пывсянө йөртін? — понйыс друг уси дум вылас Лёвалы.

— Йөрті. Талун сылы зэв неокөга кольччынысө, өдзөссө гыжъялө.  
Ме моз жө войбыд эз узь.

— Тэ нө всян, али мый? Мыйла эн узь? — повзыштөм синъясөн  
видзөдліс сы вылө Лёва.

— Оз тай ков висьом. Ті вокыс висьмөданныд.

Детинкаяс пидісянь ышловзисны өттшөтш, кызкө зэв меліа да  
нсрапырысь дзоргисны старик вылө.

Йөраяс туй вылө воигөн вөралысьясөс паныдаліс Катшө. Ылысянь  
мыжапырысь сійө легөдіс бөжсө, восьлаліс ичөтик воськовъясөн, тыдалө,  
поліс матыстчыны.

— Тэ кызди воин татчө? — скөрысь шуис старик.— Керка өдзөстө,  
дерт, гурйив восьсөн колин.

— Локтіс кө и бур! — нимкодясис Лёва.— Катшө, та, корь!

Понлы оз ков кыкысь тшөктөм, сійө уськөдчис вир дука кокутияс  
кузя да воши.

Вөрын рөмыд на. Асья төвру небыдика малаліс пу йывъяссө, муртса  
кывмөн зельөдчыштіс йизыштөм лыс лапъясөн.

Йирмөгысла-ө, волнуйтчөмысла-ө Лёва кыліс, кутшөм ёна кутіс тіп-  
кыны сьөлөмыс. Талун кө оз вөтөдны да оз вермыны вины зверөс, став  
ветлөмныс налөн весь вошө. А яндзимыс кутшөм! Оні, көнкө, став сик-  
тыс нин төдө, мый Пиля дед пө разрешение босьтөма йөра кыйны. Найө,  
дерт, оз төдны, мый Лёва да Петя вөчисны тайөс дедныс төдлытөг.

Тыдалө, волнуйтчө и Петя.

Эрдаджыкинъясті чарөмыс сэтшөма дзажгис, мый ковмыліс сувтав-  
лыны пон увтөм кывзөм могысь.

— Ёна, тыдалө, ранитчөма, зэв ылөдз оз мун,— буракө казяліс че-  
лядьлысь сьөлөм пессьөмнысө да сувтыштлігөн бурөдіс старик, но ас  
төдлытөгыс шуис: — Талун, ме чайта, бара на ковмас вөрын узыны.

— Ковмас кө өд, и узям на, сідз өд? — меліа шуис Петя.

— Сідз нин, дерт! Мый вѳчан. Эта ыджда зверѳс ранитѳма да он зновт,— кыв сетѳм моз чорыда шуис пѳрысь вѳралысь.

— Каникул помасьтѳдз вѳтлыся, а ог зновт,— крапкѳптис Лѳва.

— И ме! — юрсѳ пыркнитис Петя.

Мѳдысь сувтлѳгѳн да кывзысигѳн кѳнкѳ ылын муртса кылыштис понлѳн лявѳстѳм, именнѳ лявѳстѳм, а абу увтѳм.

— Вѳтѳдис! — ышловзисны куимнанныс, сѳся сувтисны да кутисны кывзыны.

Пон гѳлѳс матысмис.

— Татчань локтѳны, котѳртѳй эсийѳ коз вѳр визьѳгѳдзис, сѳти, буракѳ, пышйѳны,— тшѳктис дед.

Челядь котѳртисны индѳминѳ. Пошкигтыр вѳтчис на бѳрся и дед.

Недыр мысти параѳн додьялѳм вѳвьяс моз тыдовтчавлисны пуяс костѳд кык йѳра, кыкнанныс сюртѳмѳсь. Пон лявксис на бѳрын ылын.

— Коймѳдыс бѳрся вѳтчѳ,— гусьѳникѳн шуис Лѳва.

Коркѳ и Катшѳ воис весьтасѳдз, сийѳ сьѳкыдпырысь чеччалис, мукѳд дырйныс вѳйласис, а кытсюрѳ лыбис чарѳм вылас да котѳртис виччысигтыр, но коймѳд йѳра эз вѳв.

Вѳралысьяс шай-паймунѳмѳн видзѳдлисны ѳта-мѳд выланыс. Кытчѳ лои сюраыс? Мыйла пон эз вѳтѳд сийѳс? Эз жѳ ѳд вермыны янсѳдчыны найѳ? Старик раз-мѳд шутѳвтис, думсьыс бергѳдны кѳсийс понйѳс, но бергѳдчас ѳмѳй сийѳ!

— Дедушка,— шыасис Петя,— ранитѳчымыс абу нин мукѳд дѳнас. Сийѳ, дерт, оз нин вермы пышйынысѳ. Кѳвмас корсьны сийѳс.

— Корсям жѳ ѳд!— дедыс пыдди вочавидзис Лѳва.— Куим лун тшыг ветлѳдла, а вѳтѳда! — И сийѳ бѳр петис вѳтччан туй ылѳ да мѳдис журѳдны сѳти, весиг бѳрвылас эз видзѳдлы, локтѳны оз мукѳдыс.

Петя регыд суѳдис ѳртсѳ, дед муртса вермис вѳтчыны на бѳрся. Муѳисны дыр.

Со найѳ воисны нин сѳтчѳ, кытысянь вѳтѳдѳма йѳраясѳс Катшѳ, и, некымынысь воськовтѳм мысти, аддзисны, кыдзи вѳрзисны да лыбисны куйлысь йѳралѳн сюръясыс. Пон абу и волѳма сы дѳнѳдз, а йѳра, буракѳ, абу и чеччылѳма пон увтѳм вылѳ. Но ѳни чеччис, збоя сувтис паныд, скѳрысь чушнитис нырнас, пыркнитис уна вожа сюрнас да лѳсьѳдчис водзсасьны. Бытьѳ команда серти, детинкаяс чепѳсийсны ѳгарѳ-мѳдарѳ да ляскысисны пуяс бердѳ.

— Морөсас метитчөй, морөсас,— кылісны найо дедыслыс збоймом гөлөссө.

— Гып! Гып! — кыліс лыйом шы.

Йбра нетшыштчис места вывсьыс, кыкыс чеччыштөмөн воис пөшти детинкаяс дінөдз, гораа ымөстіс да сьокыдпырыс пөри, улиас лямөдіс посни пуяссө.

— Дедушка! Кыйим жө! — горөдіс Петя да ёртыскөд тшөттш уськөдчис зверь дінө.

— Энө матыстчөй,— скөрыс шуис Пиля дед, дзор ускыс сьлөн тіралыштис.

И збыльыс, кулыс зверь сэтшөма чужийс бөр кокъяснас, инмис пожөмө да пуөдзыс кулыштис кырсьсө.

Лёва локтіс весьтасөдзыс да воськов дас сайсянь на лыйис зверлы пеляс, и мөдыс нюжөдчис да вөлисти ланьтіс.

— Эсію сюртөмыс та дорыс ыджыдджык,— мыйлакө пөрччис шапкасө да өвгыштис сійөн Лёва.

— Отиыс сәні ай жө вөлөма, сьлөн усьөма нин сюрис. Гырыс-джыкьясылөн тай, мися, водзджык усьө, а татшөм посныдджыкыслөн тайө төлысяс коркө усьө,— зверөс кулыны лөсьөдчигмоз кыпыда варовитис Пиля дед.

— Тырмас миянлы, да өд, Лёва? — некыз эз вермы дзевны радлунсө Петя.— Кымын пуд яй эськө лоө татыс, дедушка?

— Тіянлы лэччөдлымөн. Пуд дас-дас кык чистөй яйыс.

— Квайтөн кө кыкыс лэччөдам и ставыс, — зверөс кулыны отсасигмоз шуис Лёва.

— Пуднад морт вылө оз на вермыны лэччөдны челядыд. Йиджас та ылнасяньыд, — өлөдіс пөрыс морт. — Ті көть зэв посняссө энө катөдөй татчө. Сэсся бара жө унасө нинөмла катөднысө, ковмас кө узыны, пывсянад он төр.

— Ковмас кө и коз улын узям. Тэ, дедушка, эн маитчы, кыйөматө лэччөдлам нин. Шуөма — вөчөма! — ид идзас рөма юрсисө пыркнитис Лёва.

— Тэ бара коркө кытчөкө йөрмывлан он? — нюммуніс Пиля дед.

Петялөн сідзи и бергаліс кыв вылас висьтавыны: «Неважөн на йөрмыліс». Сэсся ачыс жө и думыштис: «А йөрмыліс-ө? Көть өд и ме эг во, сійө петіс жө эськө шорсьыд».

Час-мөдөн йөра туша уберитчис. Та кості воис Катшө, дыр поиктіс, сэсся мөдіс нювсыны яй дінын. Яйсө гырысякодь кералісны, торъяссө пукталісны лым вылө да вевтисны кунас, а выліас шыблалісны коз лысьяс. Қолисны сөмын талун лэччөдмөн.

— Дыр кежлө энө эновтөй. Руч либө тулан кө велаласны, ставсө новласны,— велөдіс дед, сэсся быгтьө мыйкө уси дум вылас да содіс:— Мыйта верманнды, ті сөвтөй нопьяныд да лэччөй, а ме ручныдла кежала.

— А сюрө-ө тэныд? — төждысьөмпырысь видзөдіс дедыс вылө Лёва.

— Ас туй вылысь сюрө жө? Ті веськыджыка петөй прөсек вылад, пуө лөсышталөй и кежанінсө бура пасйөй, лымъялас кө, медым сюрө жө тайө местаыс, да колодаяс вомөн туйнытө энө вөчөй. Катшө, мунам!

— Ми компас серти шөрт моз веськыда петам,— збояліс Петя.

Дед муніс. Пудъя нопйөн челядь петісны вөрөд. Мукөдлаас кызь метр кузьта конда водөма вомөнон. Он жө сійөс кытшовт! Өти сэтшөм конда вомөн вуджигөн Петялөн лыжиясыс исковтісны бөрвыв, ньывкөсөн сатшыны лымъяс, детинка шняпкысис боквыв, и некыз оз вермы бөр чеччыны.

Лёва серөктыштіс, но кор матыстчис да адзис, мый ёртыслөн лым-йөсь бан кузяыс вөсньыдик визьөн сөдзыштө вир, повзьөмөн юаліс:

— Петя, доймин?

— Эг, мыйла дойма. Сөмын этаті тай кытчөкө гыжйыштчис,— ёртыс өтсөгөн чеччигмоз гажаа варовитіс Петя.

Но пөрөм пу найө эз кытшовтны, а вуджисны веськыда. Мөдарланьыс исковтігөн Лёваөс сэтшөма зэркнитіс, мый весиг өти лыжипөлыс ратшмуныштіс. «Чеги кө-а?» — думыштіс детинка.

Та бөрын, ориентир бөрийгөн, Петя зіліс корсьны синнас пөрөм пуяс да ылісянь кежыштны, медым оз ков кытшовтны. Та вөсна и туйыс эз ло дзик «шөрт» кодь веськыд, а чукультөсь.

Эрддорса кызьяс вылын пукалісны да кургисны тарьяс.

— Со кытчө найө вешйөмаөсь,— сувтіс да бедьнас индіс Петя.

— Мыйла «найө»?

— Но, кодьясөс тай ми репассыд вөтлалім.

— Татшөм чукөрыд өд абу өти,— шойччыны лөсьөдчигмоз нопсө пөрччис Лёва.— Весиг койтөны найө уналаын. Ме кум койт төда.

— Ме эг на вөвлы тар койт вылад. Таво кайлам, Лёва, но?

— Кайлам, дерт! Ок, өд интереснө сәні,— ылынкодь тыдалысь тарьяс

вылө нимкодпырысь видзөдигмос висьталіс Лёва. Ыджыд съөд ёкмыльяс, быттьөкө пу йылын съөд рака позъяс, ошалісны кызъяс вылын. — Югыд тувсов вой, кыаыс гөрд, а тэ куйлан лыскысь вөчөм чомйын. Тадзи жө гөгөрыд пуксялөмаось пуяс вылө таръяс, кургөны отарын и мөдарын. Тэ виччысян, кор найө лэчасны муө, дзик тэ ныр улө, да мөдасны чушкыны — чу-ишш, чу-ишш!

Лёвалөн чушкөмыс артмис дзик тарлөн кодь, и Петя төдлытөгыс видзөдліс пуяс вылын бовъялысь съөд ёкмыльяс вылө: оз-ө нин найө чушкыны.

— Чушкигас и лыян? — юаліс сійө.

— Он на. Найө дыр ветлөдласны, асьныс борднысө өшөдөмаось да борд йивнас визыйөдлөны мусө, сэсся чукөртчасны отилаө да морөс-на-морөс воча кутасны косясьны да съөласьны: чу-ишш, чу-ишш!

— Петукъяс моз, да өд?

— Збыль, дзик петукъяс моз и косясьөны,— варовмис Лёва,— и сэки найө нинөм оз кывны, көть ставнысө оти-отиөн лыйлы.

— Весиг лыйсьөмсө оз кывны?!

— Оз жө өд! Витөс, квайтөс лыян, сөмын он босьтав: петан кө чомсьыд, мукөдсө повзёдан.

Кык друг чөв олыштисны. Сэсся Петя шуис:

— И мыйторйыс абу мян помтөм ыджыд да паськыд советскөй му вылын.

— Да-а, войнаыд кө эськө эз вөв,— ышловзис Лёва.

— Төдан мый? Война помасяс да мый эськө кутам вөчны? Ок, куштөм олөмыд сэки лөө!

Петя друг чечыштис лым гуранысь да сувтис лыжияс вылас:

О, шуда му!  
Тэ, рөдинай менам!  
Кор судзис эськө  
Менам дзоля сыв,  
Сэк помтөг, помтөг  
Кутлі эськө тэнө,  
Кыз рөднөй мамсө  
Кутлө рөднөй шив...—

юргис парма шөрын детинкалөн ёсь гөлөс.

Лёва долыдпырысь видзөдіс ёртыс вылө.

— А вермам ог эськө ми талун жө гортөдз лэччыны? — буракө, сёр-нисö вежөм могысь юалис сийö.

— Гортөдз?!

— Мый нө повзин? Пемдам кө өд, туйсö аддзам, гортыд сюрö и.

— Тэ вот менö збыль полысьбөн чайтан. Петам көть войшөр кадö да лэччам. Сöмын төрытья лым бөрад өдвакө туйтö аддзан.

— Мый нө, сідзи и эм да. Тэ пыр шуан: «лэччам, вöчам, мунам», а сэсся и содтан: «өдвакө». А кымын лун коли каникул помөдздыд? — ёртыслы казтыштіс Лёва.

— Нель.

— Но вот тайö нель луннас медым юр ни ку оз коль вөрö.

— Оз и коль.

Дед талун дыр эз во пывсянө. Челядь домтылісны нин из гор, пусисны, а старик век абу. Коркө и гир-гармуни керка өдзөсö да кыліс Катшөлөн никсөм. Кык друг нетісны паныд. Дзурс пемыд, көть кык синмад сутшкы, нинөм оз тыдав, көнкө кыліс лямпаяслөн чарскөм да стариклөн кашкөм. Лёва өдійö лыжиасис да муніс паныд. Сылы эз терпитсьы, сюрöма абу ручыс.

Керкаын нин дед висьталіс, мый руч пö пырöма абу сан яй дінö октөм капканö, а көч капканö, и визиркаыс абу, вөлөмкө, сийö, кодөс чайтлөма, а дзик мөд.

— А кызди нө сюри эськө? — юалис Петя.

— Нолтö, кызди эськө? — мудзпырысь пуксис нар вылө да шпынь-муніс дед.

— Аслад ветлан визирка мыйла оз сюр,— висьталіс Лёва.

— Сэтшөм визиркаыс менам, колөкө, дас, ставсö он кытшовт.

Дыр жуглісны юрнысö кык друг, кызди веськавны стöч сийö визирка вылө, кытчö вöлі пуктöма ручөс, кор сэтшөм визиркаыс дас.

— А кытчö ті петінныд руч дінсьыд? — кутіс юасьны дед.

— Йөраяс дінö.

— Сэсся?

— Мунім на коктуй кузя.

— Сідзкө, сэсянь первой визиркаыс и эм.

— И тэ мунін миян лыжи туй кузя?

— Эг жө өд. Волі сэтчөдз, аддзылі, кызди төрыт гөрөмныд лымсö, да веськыда петі,— висьталіс Пиля дед.

Ывлао петалигөн Лёва аддзыліс, кутшом пемыд сәні, да эз нин панлы сёрни войын гортө ләччөм йылысь. И вопросы ачыс решитчис — ләччывыны аски.

## ШЫЗЬЫЛІС ПАРМА

Яйла кайлыны окотитысьяс вөліны мыйта колө. Лёва дінө да Петя дінө волісны вөйысьсны и витөд классын велөдчысьяс, и квайтөдын, и сизимөдын; волісны и нывъяс, кодъяс кужисны ветлөдлыны лыжиөн.

— Гумладорысь ме пуд сьөкта идзас нөбъяс ләччөдлывла, — ошысьсис дас кык арөса Коля.

— Гумладорысь! А тайө кызь километр сайысь, — өлөдіс Петя.

— Мый нө, ог вермы ли мый? Көть комын, — эз дугды Коля да мунігас нин содтіс: — Кайла и пом.

Медым кокныдджыка ләччас кыкысьөн став яйыс, бөрйисны асла ныс классысь квайт мортөс, и аскинас зэв водз көкъямысьөн мөдөдчисны вөрө — ставныс ногыяось, лыжиабсь... мукөд дырся дорысь зэв рамось. Оз тойласьны, оз дурны и весиг оз горзыны, а сёрнитөны лабутиөя, вашкөдчөм моз.

Медводзын муніс Петя. Сиктысь петигөн нин сійө аддзис, мый кодкө вуджрасьө водзвылас.

— Коля, тэ нө кытчө?! — воис виччысьысь детинка дорө да гораа юалис Петя.

Шай-паймунөмөн да чуйөмөн ставныс сувтісны детинка дінө.

— Яйла. Оз али мый позь? — кевмысян гөлөсөн шыасис Коля.

— Асьтө ковмас көшөльөн ләччөдны! — шпыньмуніс Петя, и некымынөн серөктісны.

— Тэ мындатө өд ләччөда жө! — збоя шуис детинка, но төдчис, мый сійө польштө и вот-вот вермас бөрддзыны.

Петя пөрчис веськыд кысьыс кепысьсө, щуйга кинас ләптыштліс Колялысь ыджыд шапкасө да кепысьтөм кимышсө пуктыліс детинкалы кымөсас:

— Мый нө тэ, он-ө вись, другө, ме мында ләччөдны?!

Лёва видзөдіс детинкаяс вылө ни өтчыд нюмъөвттөг. Сійө некызди эз вермы гөгөрвоны асьыс ёртсө. И аскөд тшөтшъяыскөд, и гырысьджыкъяскөд, и учительяскөд Петя век зэв мелі да вежлив. А вот ичөтджыкъяс вылын Петя пыр шмонитө, зільө кедзовтны да серамывыв ләп-

тыны найӧс. Мыйла эськӧ? Пырджык серьёзной Лёваысь посныдджыкъяс неуна польштісны и школаын, и пувла да тшакла ветлігӧн, и ворсігӧн. Но Лёва некор эз вӧрзӧдлыв найӧс кинас и эз радейт серавны на вылын. Унаысь ӧлӧдлывліс таысь ӧртсӧ.

— Мед кайлас,— чорыда шуис сійӧ,— та ыджданас ме ӧтнам нин кайывлі сэтчӧдз,— сэсся докнитіс юрнас вӧрлань.

Лӧзьюгыд водзас вӧрыс кажитчис сьӧдов мореӧн, помтӧмӧн.

Кодьяскӧ пыдісянь ышловзисны, сэсся ставныс вӧрзисны мунны.

Коля лэптыштіс син вылас лэччысь ыджыд шапкасӧ, доршасьысь синваа синъяснас меліа видзӧдліс Лёва вылӧ да нюмъевтіс. Сэсся лӧсьӧдчис медбӧрӧ да ни ӧти воськов эз кольччыв мукӧдьясьыс.

Войнас усъыштӧма лым, тупкӧма кень кодь чарӧмсӧ, едждӧдӧма и пуяссӧ. Пу йывъясын шувгысь да лапъяс костын кышӧдчысь войтӧв коясис кос пӧим кодь лымйӧн. Вочасӧн тӧлыс пыр ыдждіс, шутьялӧгытър кутіс котравны вӧрті. Сійӧ кватитлас эрд вылысь лымсӧ, гартчысь сюръяӧн нуас кытчӧкӧ да бара волас. Но тӧвлӧн шутьялӧмыс, лымйӧн коясӧмыс ньӧти эз дӧзмӧд войвывса челядьӧс. Найӧ аддзывлісны нин татшӧм-тортӧ. И кызди тай турияс лӧбӧны ӧта-мӧд бӧрсяыс да гажаа горӧдлывлӧны коръяскӧкӧ, сідзи жӧ челядь чукӧр шывгис вӧрӧд, геждика кывлісны налӧн нимкодясян шыасьӧмъяс.

Пиля дед, буракӧ, виччысигас кылӧма челядь гӧлӧсьястӧ да петӧма пывсянсьыс. Видзӧдӧ да, тыдалӧ, лыддьӧ ӧтик-ӧтикӧн сы дінӧ воысьясӧс да сувталысьясӧс. Чужӧм вылас сылӧн тӧдчӧ и тӧждысьӧм и нимкодясьӧм.

— Коля, муса пи, и тэӧ тшӧтш катӧдӧмаӧсь,— шыясис дед медбӧръяӧн воысь дінӧ да видзӧдліс туй вылӧ: оз-ӧ локтавны ещӧ посныдджыкъяс. Сэсся бергӧдчис Колялань да содтіс: — Тэ, пиук, водзӧсӧ эн нин кай. Ми тэкӧд пывсянын олыштам. Менам талун шойччан лун. А лэччӧднытӧ тэныд эм сан ку, руч ку да мыйсюрӧ ещӧ.

Коля зілис зырсыны Лёвалань, виччысис сысянь отсӧг, а ачыс эз лысьт веськыда ӧткажитчыны.

— Куяссӧ ме ачым коркӧ лэччӧда,— шуис Лёва.— А тэ, Коля, эн на мудз?

— Ок, тайӧнтӧ! Эг жӧ ӧд! — кос лыс моз ӧзйис Коля.

Шойччигмоз челядь видлалісны сан ку, руч ку. Қодсюрӧыс весиг видлісны кимышнаныс, ӧсь-ӧ санлӧн гыжйыс. Но колӧ вӧлі аддзывны,

кутшом серьёзнойось волины чужомьясныс челядьлөн. Ни горзом, ни тойласьом, быттьокö пыр найö татшом рамось и волёмаось. Весиг пыв-сянö эз ставныс пыравны, а шойчисны джекъяс вылын.

— Но, шойччиннды? Огö на мунöй? — горöдис Лёва.

— Мунам! Мунам! — повзьöдöм воробей чукөр моз сявкмунысны öтарö-модарö челядь да бара кутисны лосьöдчыны öта-мод бёрсяяс.

— Тэ, Лёва, унаон эн сöвт нопьясад. Қокныдджык лоö лэччы-нытö, — öлöдис старик. — Позяс öд мöдысь кайлыны.

Начкөм йöра динö воём бöрын челядь видзöдалисны сылысь уна вожа сюръяссö, кузь гöна шоньд пасьсö.

— Мый нö төвнас сёйö та ыджда зверьс? — шензигтыр юалис Коля.

Петя видзöдлис гөгөр, буракö, думсьыс көсйис четкөдлыны, мый сёйöны йöраяс. Но зверьяс абу йирсьöмаось тани, и Петя эз аддзы, мый корсис синнас, сэсся чатөртис юрсö да зэв збыльысь висьталис:

— Бадь йивьяс шырö, пөрöм пипуяс тогналö, пельысь пуяс, льöм пуяс да том пипуяс чегьялö, кырсьсö налысь кульö да йивьяссö сёйö...

— Тайö, буракö, и бöжыс. Ой, кутшом ичөтик! А мыйон нö лёдз-номсö повзьöдлö гожөмнас?! — дивуйтчөм сорөн юасисны челядь.

Та вылö Петя нинөм эз вермы вочавидзны да шай-паймунөмөн видзöдис ёртыс вылö, оз-ö сийö мыйкö висьтав. Но Лёва мыйлакö нинөм эз висьтав, кызди йöра олö гожөмын, лөддза-номья дырйи. Сы пыдди висьталис быдтор тöдыс Сеня.

— Ме кытыськö лыддьывли, — висьталис сийö, — мый тайö кузь гöныс сылөн тулыс помланьыс усьö и кучикыс куш кольö.

— Этатшом ичөтик бөжнас, да ещö и гөнтөм! Оз öмöй вильöдны сийöс лёдз-номйыс?! — шензис Көля.

— Лөдз-номйысь мездьсьөм могысь сийö пырö-дзевсьö нюрö...

— Кызди сийö нюрö?

— А вот сиди, кодйыяс няйтас, уль нитшсö шыблалас ас вылас дай куйлö, сöмын пö ныр йылыс тыдалö, — эскөдис Сеня.

— Тшыглы али мый куйлö?

— Лөддза-номья дырйи сийö медсясö ваын олö, — быттьö друг мыйкö дум вылас уси Лёвалы. — Джуджыд кө ваис, келас да сёйö ва быд-мөгьяссö да налысь вужьяссö, а ляпкыдинын водөмөн сёйö. Дерт, шойч-чывлö пö и нюрын, — ошкөм ногөн Сенялань докнитис юрнас Лёва.

— Йбрайд пö öд быдтор сөйö,— водзö висьталіс Сеня,— и чöд, и чöдлач, и пувкор, и быдпöлöс ва быдмөгъяссö...

— Тайöс ме эг аддзыв и ог тöд,— торкис сійöс Петя.— А вот кызди тöлын олö да мый сөйö, ме ас синмön аддзылі да тöда зэв бура.

Челядь сёрнитісны лабутнöя да нбöжйөнник, быттьöкö полісны повзбöдны шувгысь вöрын тыдавтöм олысьяссö.

И сöмын сэки, кор Лёва да Петя кутісны сөвтны яйсö нопьясö, пöрысь парма шызыліс гажа том гөлöсъясөн. Быдөн корисны:

— Тайö этша на, содтышт!

А Коля кипöвнас лэпталö нопсö да шензьö:

— Эта мындайд öмöй лэччöдантор, ок! Со öти киön верма на лэп-тавны-а. Тани и вит кило абу.

Петя бөрйис ыджыдкодь тор да вöйис Колялы:

— На тайöс содтам. Верман?

— Верма жö öд,— югнитісны Колялön карöй синьясыс.

— Меным содты жö, меным содты жö!— бара пармаын кутісны юргыны челядь гөлöсъяс.

— Вася, тэ уна эн лöд, висьöm бöрад сьöкыд лöö,— тöждысис Лёва.

— Некутшöм висьöm нин менам абу,— висьталіс Вася да содтіс ещö öти яй тор.

Лэччигön медводзын живöдіс... Коля. Сійö, буракö, поліс бөрö кольбөмысь да лöсьöдчöма медводзö. И кажитчö, мый детинка оз кыскы дас вит-дас квайт килограмма ноп, а тыртөг исковтö зумыд лыжня кузя.

— Э-эк! — кодкö горöдіс Коля бөрвылын.

Сійö колода вомöныс вуджигön, кытчö тöрыт усылі Петя, Вовалön, медьен детинкаыслön, чегöма лыжипöлыс.

— Мöдлатіджык муной, мöдлатіджык,— кутісны горзыны бöрсаяслы.

Лыжиыс вöлі чегöма бөрладор помыс метрджын кузьта кымын. Вова яндысигтыр сулаліс да видлаліс лыжисö, быттьöкö көсйис бөрклеитны сійöс. Сэсся мыжапырысь шуис:

— Ме и тадзи воа вöралан керка дорöдзыд, а сэні аддзам.

— Кодлön көрттув эм? — горöдіс Лёва.

Быдөн мөдісны корсьысьны зепьясьыныс.

— Көрттувйыд сюрас,— быд зеп гудйис Коля да мыччис нель көрттув.

— Айда Коля! — ошкыштіс Лёва.

Некымын көрттув сюри и мукöдъяслön. Но öд колö вöлі вöчны

плашки, медым вывсыяныс тувъявны чегөминас. Ставныс шөйөвошины, пөрччалісны нопъяснысө да пукталісны лым вылө. Сөмын өтнас Коля сулаліс неылын нопъя да морөснас пыксьөма лыжи бедьяс вылас.

— Трамплин вывті исковтігөн менам коркө чеглі жө лыжипөлөй, — шуис сійө. — Ме босьті ичөтик пес плака, тувъялі сійөс вывсыяныс, и лыжиөй важсьыс ёнджык лои.

— Да? — сы вылө видзөдігмоз шурбыльтіс Лёва, сэсся недыр думайтыштіс, видзөдліс гөгөр да кежис нейджыд, веськыд кызд пу дінө.

Гөгөрвотөм синмөн челядь видзөдісны сы вылө.

Лёва перйис мыш сайсьыс ичөтик черсө, ньөти тэрмасьтөг пөрөдіс кыздсө, чинтіс сэтысь пес чурка да поткөдіс шөри. Сэсся босьтіс воргааджык джынсө да локтіс Вова дінө.

— А-а, со мый! — гөгөрвоисны кодсюрөйс.

Коля тэрыба пөрччис нопсө, матыстчис мыр дінө да шуис:

— Вай ме кута өти помсө, Вова кутас мөд помсө.

Пөшти лыжи пасьтаыс кызд пу плакасө Лёва тувъяліс чегөм лыжи вылысө, и көть лои сійө дөмаса, но ён. Вовалы лои зэв нимкодь.

— Тэысь, Қолька, морт лөб, — пывсян дінө воөм бөрын шөпнитіс сійө детинкалы.

Старик бергаліс челядь дінын, видзөдаліс налысь гөрдөдөм, пөсялөм, но довольнөй чужөмъяссө.

— Но, Коля, ёна-ө мудзин? — нумъялігтыр меліа юасис медичөтыслысь старик.

— Ме ньөти на эг и мудзышт, — збояліс Қоля.

А турөбыс пыр өддзис и өддзис, кусньөдліс пуяссө, шутьялігтыр нөбөдіс лымсө.

— Узыны ковмас да аски лэччыны, — майшасис пөрысь вөралысь. — Со мый вөчө поводдяыс! Бур морт понсө оз лэдз татшөмнас ывлаө.

— А аски кө ещө лөкмас? — дедсө потшис Лёва.

— Аски көть югыднас лэччанныд, а талун верманныд пемдыны.

Збылысь, некод эз төд, уна-ө нин кадыс. А пемдігөн петны да тыра нопьясөн лэччыны дас вит километр — абу шутка. Но тані узьөм йылысь Лёва эз и көсйы кывзыны: коді төдас, кутшөм лөө поводдяыс аски, аскомысь, а каникул регыд помасьө. Нинөмла прөста воштыны лунсө, неуна пемдыштөмыд — немтор. Петя, буракө, гөгөрвоис ёртыслысь думьяссө.

— Татысянь ми и пемыдөн письтам, дедушка, — шуис сійө, — Туй



дорсыс быд пу наизусть тōдам. А воймам кō, коз улын узям. Абу нин первойсы!

Нюммуныштōмōн Лѐва видзōдліс ѓртыс вылō, коді лун-мōд сайын на вōлі биысь моз полō вōрын узьōмысь, да шуис:

— Ставным ог жō тōрōй пывсянад, кодъяслыкō ывлаын жō ковмас узьны. Мед, колōкō, Коля да Вася кольччасны, аски лѣчасны.

— А ме бара и ог жō нин кольччы тїянысь,— юрсō пыркōдіс Коля. Кольччысь некод эз ло.

— Дерт, пуксōн позьō вōлі узьны шоньд пывсянын, а татшōм повед-  
дянас не жō петны туйō,— челядь чукōрōс кольбōдїгмоз пыр на броткис  
Пиля дед.

— Та мынданад нинōм огō лоōй, аски бōр воам татчō,— бурōдіс сїйōс Лѐва.

Сук вōрōд мунїгōн тōв скōралїс кōнкō вылын — шувгис, чушкис, шутьляліс, качайтїс пуяссō, гылōдіс на вылысь туктасō. Шоч вōраинъясын сїйō гудрōдліс ѓтлаб и вывсянь усьысь и увсянь лѣптōм лымсō да кояліс челядьлы чужōманыс. Кажитчō, мый найō келōны улльōв рōма сук ру пыр.

Петя мунїс медводзын, гōрдōдōм банбокъясыс сылōн кōтасьōмабсь: сылōма лемасьысь лымїйс. Лѐва медбōрын, сы водзын Коля, сѣсся Вася.

Кїлометр куим-нѣль мунōм бōрын Лѐва казяліс, мый Коля мōдіс частō сувтавлыны. Сувтлас, лыжи беддяссō сатшкылас лымїйō, кыкнан кинас лōсьōдыштас пельпомъяс вывсьыс ноп волысьяссō да тѣрмаситгыр бара мōдас исквотны водзō.

«Волысьясыс дойдōны. Мудзис нин, коньбōр»,— думыштїс Лѐва да горōдіс:

— Шойччыны!

— Шойччыны!

— Шойччыны! — вōрыслысь шумсō венны зїлігмоз ѓта-мōдныслы водзлань горзїсны челядь.

Но Петя мыйлакō дыркодь на эз сувт. Вōлōмкō сїйō бōрїйōма шойч-  
чанїн — ыджыд коз. Уліас сылōн артмōма чом: муōдз ѓшōдчōм кузь да сук лапьяс костōдыс сōмын кытъястїкō пырōма лымїйс коз улас, и сѣні — джуджыд гуран, гōгōрыс тола.

— Морт-мōдлы со татчō позяс пырны да водлыны шойччыны,— лапъ-

яс вылысь лымсö пыркöдигмоз шмонитис Петя. — Тані көть төвйы: керка-ын кодь шоныд.

Чом пытшкөсыс вöли пемыд гу кодь да ичöt: муртса төран пуксыны кыкөн-куимöч, и сэтчö некод эз пыр, а ставныс мөдiсны пуксявны төвсайладорас. Пуксялисны «скамьяе» вылö, кызди кайиганыс на велöдiс найöс Лёва.

Коля матыстчылис чом дiнö, видзöдлис сэтчö да бөр бергöдчис.

— Мый нö он пыр? — нюммунис Петя.

— Меным и танi зэв лөсьыд, — нопсö пөрччөм бöрын Лёвакөд орччөн пуксыны лөсьöдчигмоз збоя шуис Коля да ас төдлытөгыс чукуртчылис: тыдалö, кыткө зэв ёна доймис.

Лёва видзöдлис сы вылö, сэссия кутiс пельпомöдыс, кыскыштiс асланыс да ошкөмпырысь шуис:

— Тэ, молодец! Он вишки, он няргы. Тадзи и колö: кытчö мөдöмыд — мун, мый заводитöмыд — вöч!

— Дерт жö! — юрсö гогнитис Коля.

— Ме бара некор жö ог няргы, а бөрднытö ог и куж, — шыясис Вася.

И сэки челядь öта-мөд вежмөн заводитисны висьтавлыны, кодi куштöм сьöкыдинö веськавлöма коркö, но некод некор абу няргывлöма.

Вася да Вова колян во арнас пув вотигөн ылалöмабсь вөрö.

— Көть кодарö он мун, быдлаын нюр. А пемдыны нин кутiс, — висьтавлис Вася. — И лои узьмөдчыны вöрас...

— Тi, буракö, Гөгрөс нюр дорын вөлöмныд? — юалис Лёва. — Сэни эмöсь сэтшöм местаясыд: мунан-мунан пыр ягтi, а сэссия друг гөгөр лөö нюр.

— Вот-вот, сэтшöм и эм, — шыясис пырджык чөв олысь Вова.

— Оз öмöй позь вуджны нюрсö? — шпыньмунис Петя. Сийö бокногөн нөрөвтчöма коз лап бердö: чужöмсö сайöдöма коясысь лымсыс.

— Ок, пемыднас! — горөдiс Вася. — Аскинас, югыднас, вуджим, да и то Вова кыкысь кымын вöйлi коскөдзсыс...

— Но, эг жö көть коскөдз! — торкис сийöс Вова.

— Көть мый, а ёнакодь көтасьлим. Сэссия тшыгöсь, нянь абу. Но кынöм сямалöм йылысь эгö и казътыштлöй, — варовитис Вася.

— Гөгрөс нюртö колö косьтыны да сэтчö садитны сэтөр да öмидз, — шыясис Сеня — кыз нырьяса, паськыд чужöма детинка.

Ставныс серөктисны.

— Нюртөгүс өмөй мөстөүс абу нин?

— А вот ме лыддывлі книгаясыс, мый садтө пө колө садитны сэтшөминө, медым войвывладорас вөр вөлі, сійө лёк төвъясыс видзө,— пөся висьталіс Сеня.— Дерт, яблонясыс да мукөд плодөвөй пуясыс колө бөрийны лунвыв пөкатъяс, а өмидзид да сэтөрыд зэв бура быдмасны косьтөм нюр вылад.

Ставныс чөв ланьтисны да кывзисны Сенялыс. Челядь төдісны, мый Сеня ноксьө сад садитөмөн. Ошинь улас сьлөн быдмөны яблонясыс, ирга, сэтөр, өмидз... Школаын сійө веськөдлө юнөй мичуринецъяс кружокын өти звенөөн. Школалөн эм аслас ыджыд сад.

— Сідзкө, и вадор лоскад позяс садитны сэтөртө да өмидзтө! — серьезнөя шуис Вася.

— Позяс, дерт. Вот аддзыланныд, ме велөдча садоводө, и Гөгрөс нюрин и вадор лоскын колхозлөн лооны сэтөр да өмидз садъяс, а вадор пөкатъясын — яблоня садъяс! — сьөлөмсянныс висьталіс Сеня.

— А ме агрономө велөдча да Гөгрөс нюртө тэныд ог сет,— унзиль гөлөсөн друг шыасис Коля.

Бара ставныс серөктисны.

— Мый эськө тэ мөдан вөдитны сәні? — зэв збыльыс юалис Петя.

— Вадор пөкатъясас кузяла парникъяс вөчалам,— збыльыс жө вочавидзис Коля.— Огурцы, помидор, арбуз мөдам быдтыны...

Челядь варовмисны. Найө весиг вунөдісны, мый на гөгөрын ызгө, омлялө сьөд пемыд вөр. Вот найө лесникъяс, садоводъяс, агрономъяс... косьтөны нюръяс, лосьяс; стрөиталөны теплицаясыс, вьль керкаясыс, клубъяс, электростанциясыс... И Лёва син водзө сувтис кыпид картина. Налөн Жуөд сиктса мичаник керкаясыс дзоридзалыс сад пөвстынөсь, гөгөр веж. Эжвадор лунвыв скат вылын — ыджыд яблоневөй сад, улынджык — парникъяс да теплицаясыс, а медулын — кузя нюжөдчөма сэтөр да өмидз сад. Весиг абуөсь чурвидзисыс майөгъяс, потшөсьяс, а на пыдди мича визьясөн быдмөны веж пуясыс — ловъя потшөс... Дав шор потшөма джуджыд плотинаөн: шыльквидзө векныдык кузь пруд, бузгө электростанциясыс...

Коля да Сеня пыр на вензисны, кытчө мый бурджык садитны да пуктыны.

— Нюрнад да лоснад оз на ков мырддьясны,— торкис найөс Лёва:—

тырмас и садоводлы и агрономлы... А вадор лоскад сэтөръястө садитны позяс таво тулыс жö.

«Бара нин тэрмасьö»,— думыштис Петя.

— Вот сийö и эм, мый оз позы! — горöдис Сеня.— Унакод нин ме сёрнитли та йылысь, весиг предкод. Ставныс öлöдöны, ыстысьöны война вылö. Война!

Тайö страшнöй кывсьыс челядь йöжгыльтчисны, бытьтöкö юр весыттинис лэбис сизим юра гундыр.

— Война?! Война помасигкежас и колö лöсьöдчыны! — чорыда шуис Лёва.— А пионерскöй сбор вылад мыйла эн сёрнитлы та йылысь?

— Мый сёрнитан, ставныс тöдöны,— падмыштлис Сеня.

— Кызди «тöдöны»? — тэрыба пуксис нёрвотчöм Петя.— Ме вот первойысь кыла, мый нюрö да лоскö поэьö сад садитны.

— Тэ вöли он верит, мый и яблокъясыд да вишняясыд вермöны быдыны миянын да,— серамсорөн шуис Сеня.

— Кызди ог верит? Менам аслам куим яблоня быдмö. Но, муна-мöй! — тэрмасьöмөн чеччис да мöдис нопьясьны Петя.

Вöрын дзик нин рöмыд. Бёрсаясыс адзисны сöмын ёртъясыслысь вуджрасьöмсö. Петялы муртса тыдалыштö лымйөн тырём лыжи туй визьыс да чукльöдлысь трöпаыслөн руд потасыс.

Ещö кыкысь пуксылисны шойччыны ыджыд коз сайö. Öни нин унджыкыс шойччисны лыжияс вылас нёрвотчöмөн, юръяснысö нопьяс вылö пуктöмөн.

Медбөръя шойччанинас Сеня бара мöдис висьтавны Лёвалы сад вöдитöм пöльза йылысь. Мукöдыс чöv олгтыр кывзисны.

— Сэтөрөн поэьö лечитны цынга, ревматизм, коклюш... Öмидзөн — прöстуда. А тэ тöдан, Лёва, мый цынгаөн висьсысöс кö кутан вердны сэтөрөн — дас-кызь тусьөн лун — тöлысь-мöдөн цынгаыд бурдö.

— А тэ мыйөн тöдан?

— Иван Петровичтö тöдан, врачтö?

— Тöда.

— Сийö шуö, мый войвывысьыд пö дзикöдз поэьö бырöдны цынгатö сэтөрөн. Миян колхозлөн, шуам, лоö ыджыд сэтөр сад, варенье пуан завод и вареньесö ми кутам мöдöдны войвылö. Тöдан, кутшöм ыджыд делö тайö?

— Гөгөрвоа, гөгөрвоа! — торкис сийöс Лёва.— Сöмын ог гөгөрво,

мыйла нюжмасьнысö. Первой пионерскöй сбор вылын жö сёрнитам та йылысь, сэсся шыасям, кытчö колö. И таво тулыс жö садитам, мыйта вермам.

Сеня чеччыштис:

— Лёва, вай веськыд китö!

Лёва чеччис, найö киасисны.

— Но и ме тшöтш! — сувтис да Сенялы мыччис кисö Петя.

— И ме!

— И ме!

Сöмын öтнас Коля эз вöрзбы места вывсыс. Петя копыртчылис сы юр весьтö да ньöжйöник шуис:

— Узьö, коньöр.

Пельпомöдыс вöрöдыштöмөн Лёва садьмöдис сийöс. Коля восьтис синьяссö, буракö, йирмöгысла йöжгыльтчылис да пыркнитчис.

— Ме вот пыр тадзи, юрöс кö пукта и унмовся,— мыжапырысь вись-талис сийö.

— Нинöм, быдöйлөн овывлö,— сылы нопьясьнысö отсалгмоз бурö-дис Лёва.— Лэчигад шоналан, а гортад шойччан кöть аски луншöрöдз. Школаö мунны оз ков.

— Аски öмöй он кайлöй вöрад?

— Мисö кайлам.

— А менö и он кöсйы катöдлыны? — öбидитчис Коля.— Ме öд, Лёва, ньöти на, дзик ньöти эг мудз! — гөлöсас сьлөн кылис кевмысьöм.

— Но ладнö, катöдлам! — Коляöс ас водзвылас лэдзигмоз юрнас докнитис Лёва.

— Кык час кö ме узя, и став мудзöмыс бырö! — мунигас нин бергöд-чылис да гажапырысь шуис Коля.

«Лёва туйöд» шор вомөн вуджём бöрын петисны эрд вылö. Челядь быттьö сунисны зэв визув гудыр ваö. Лымйыс гартчис, гудрасис да тэрмасьöмөн кытчöкö мунис, и збылысь ставыс кажитчис ытвадырся визув юөн. А челядь вуджрасисны ичöтик сьöд чутьясөн, быттьöкö ва пыдöсас уялисны посни черияс.

— Веськыда! — горöдис Лёва, кор казялис, мый водзаясыс сувтышт-лисны: буракö, Петя воштöма туйсö.

— Вєськыда! Вєськыда! — кылісны гордѡмьяс.

Мышьянъ пѡльтыс войтѡлыс йѡткис парусѡн моз. Ѳти усьлѡ, мѡд... Ставныс сувтыштласны, матыссаыс отсалас ѳртыслы чеччыны, и бара водзѡ... Тайѡ тѡлыс жѡ ѡні вѡлі Петялы компас пыдди, и сійѡ бура тѡдіс, кодары́ налѡн сиктыс: вѡрѡ каян туй вылѡ стѡч, дерт, он во, но сиктѡ воан.

Со лым гудыр пырыс югнитліс битор, бѡр вошлі, бара дзирдыштлис. Со кутіс югьялыштны мѡд, коймѡд...

Петялы кѡть и эз волы дум вылас полѡм сы йылысь, мый найѡ ыла-ласны да оз воны гортаныс, но кор сійѡ воис первойя керка дорас, кызкѡ кокныдджык лои сьѡлѡм вылас. Сійѡ тѡдіс, мый и аски тайѡ жѡ лоѡ, мый тайѡ мудзѡм челядьыс аски ставныс бара кайласны вѡрѡ да лѡчѡдасны сѡтысь коляс яйсѡ. Дум вылас сылы уси и Сенякѡд киасьѡм, сідзкѡ, чорыд кыв сетѡм. А Лѡва да Петя кѡ сетісны кыв, сідзкѡ, таво тулыс жѡ лоѡ заводитѡма ыджыд делѡ: колхознѡй садьяс панѡм. «Қолѡ лѡсьѡдчыны война помасигкежлѡ». Дед лѡччас вѡрысь, мѡдас гѡтѡвитчыны гѡриг-кѡдзигкежлѡ. И тайѡ жѡ челядьыс петасны муяс былѡ, коді агсасьѡ, коді кѡйдыс ваялѡ... Қоркѡ и батьяс воаласны война вылысь, и бара лоѡ гажа, шуда олѡм...

Школаын вѡлі битѡм, сѡмын ѡти ѡшинь югьяліс ѡтка кодзув моз.

«Виччысьѡ», — кильчѡ вылѡ кайигѡн нин думыштіс Петя.

Збылысь, налы паныд петіс Лидия Ивановна. Қиас сьлѡн «летучая мышь».

— Воинныд?! Ставныд? — меліа юаліс учительница, лѡптис пѡнарсѡ юр вєсьтѡдзыс, тѡждысына синьяссѡ чѡвтлис челядь вылѡ, кодьяс сулалісны лым сюрья кодьѡсь, да быттьѡкѡ лыддис, збыль-ѡ ставныс воѡмаѡсь.

Қладѡвѡйын Лѡва видзѡдліс аслас радейтана учительницаыслы тѡдса да нор чужѡм вылас, кыз шаль увсьыс петыштѡм дзор юрси вылас да аддзис, мый Лидия Ивановна зѡв дѡвѡльной. Сідзи и кѡсийссьѡ сылы аттьѡавны тайѡ челядьсѡ, кодьяс, гордѡй чужѡмаѡсь да важнѡйѡсь, сдایتалісны ѡні учительницаыслы асьыныс ылыс вѡрысь лѡчѡдѡмторсѡ. Татшѡм дѡвѡльнойѡн Лидия Ивановна овывлѡ, кор пуктѡ класснѡй журналѡ кодлыкѡ «пять».

И Лѡвалы воисны юрас кывьяс, кодьясѡс унаысь шулывліс учительница: «Народ — сійѡ вын, коді вермас вѡчны быдтор. А сѡветскѡй народ-

лӧн выныс сын и эм, мый и коми и роч, ненец и украинец, карел и казах олӧны ӧти думӧн, вӧчӧны ставсӧ ӧтувӧн. Татшӧм йӧзкӧд позьӧ победитны любӧй врагӧс. И ми победитам!»

Детинкалӧн долыд-долыд лои сьӧлӧм вылас, кор кутис чувствуйтны, мый сийӧ ачыс и тайӧ посныдик йӧзыс, сьлӧн ӧртъясыс, тайӧ великӧй советскӧй народлӧн юкӧныс, и мый тайӧ ичӧтик юкӧныс вермӧ вӧчны и тшӧтш вӧчӧ ыджыд делӧ, кодӧ сьӧлӧм вылас воӧ учительницаыслы. Сидзкӧ, сьӧлӧм вылас воас и гырысьяслы и весиг свет вылас медыджыд да меддона мортлы — Сталин ӧртлы. И Лёва Чарин юрын, коми том вӧралыс юрын, кутисны бергавны кывъясыс тайӧ великӧй мортсылӧн:

«Победа ачыс оз во, сийӧс колӧ шедӧдны».

Детинка вӧли дась кӧть ӧни жӧ, гортас волытӧг, бӧр кайны вӧрӧ да кыйсыны-вӧтлысыны зверьяс бӧрся.



Городская Детская  
БИБЛИОТЕКА № \_\_\_\_\_  
г. Сыктывкар, П.О.Камы

## О Г Л А В Л Е Н И Е

Вөр керкаын . . . . .	3
Быдлаё колё кужём . . . . .	12
Ыджыд эрд дорын . . . . .	20
Рытгорулын . . . . .	27
Старик ёлдё челядьёс . . . . .	33
Лым кодъ еджыд лэбачьяс . . . . .	39
Весьтасалигён . . . . .	45
Ковмис висътасыны . . . . .	51
Йёраяс ёоря . . . . .	60
„Шуёма — вёчёма!“ . . . . .	67
Шызылис парма . . . . .	74

## ЛЫДДЫСЬЫСЬЯС!

Коми Государственной Изда-  
тельство корö ыстыны отзывяс  
тайö книга йывсьыс, кутиöма  
сийö тiяны кажитчис. Отзыв-  
яс колö ыставны татиöм адрес  
кузя: Коми АССР, г. Сыктыв-  
кар, Дом печати, Коми Гос-  
издат.



2 ш. 85 коп.

